

Vasega Matutua

Lesona Tusi Paia o le Sapati

Vasega Matutua

Lesona Mai i le Tala Lelei e Tusa ai Ma Le Molimau a Ioane (Vaega 1)

Ianuari–Mati 2025 Vol. 101, No. 1

Ulutala o Lesona

1. O le Tala Lelei e Tusa Ai ma le - Molimau a Ioane	4
2. O le Tama'i Mamoe a le Atua	9
3. O le Fa'aipoipoga i Kana	14
4. Iesu i Totonu o le Malumalu	19
5. Iesu ma Nikotemo	25
6. O Musumusuga a le Agaga Paia	30
7. Iesu ma Ioane lē Papatiso	35
8. Iesu ma le Fafine Samaria	40
9. O le Fanau Mai o Se Misionare	46
10. Iesu ma le Atalii o le Tasi Alii	51
11. Iesu ma le Tagata o Petesa e Faigata ona Gaioi le Tino	56
12. O le Pule a le Alo	61
13. Ua Fafaga e Iesu Le Motu o Tagata	66

Lesona Tusi Paia o le Sapati, o se polokalame su'esu'e lea o aso ta'itasi, o loo fa'avae atoa lava i le Tusi Paia ma le Agaga o Valoaga e aunoa ma ni manatu fa'aopoopo. O si'itaga ua fa'apupu'uina i le tulaga e mafai ai, ina ia maua ai manatu manino ma le tu'usa'o. O puipui [] o loo fa'aaoga i nisi o fa'amatalaga ina ia mautinoa ai le manino, malamalamaaga ma'oti o le manatu o loo talanoaina, ma faigofie ai ona faitau. E matuā fautuaina lava le su'esu'eina atili o tusi o loo aumaia ai la tatou Lesona.

Aiā o meatotino © 2025 e le Matagaluega a le A'oga o le Sapati, Koneferenisi Aoao a le Seventh Day Adventist Reform Movement, 5240 Hollins Road, Roanoke, Virginia 24019, USA. *
www.sdarm.org *

Lesona Tusi Paia o le Sapati (USPS 005- 118), Vol. 101, No. 1, Ianuari–Mati 2025. Saunia ma fa’asalalauina e le Matagaluega a le A’oga o le Sapati a le Seventh Day Adventist Reform Movement General Conference, Lomia ma tufatufaina e le Reformation Herald Publishing Association, 5240 Hollins Road, Roanoke, Virginia 24019–5048, U.S.A.

Fa’aliliuina e P. Wily.

Upu Tomua

O le tausaga lenei, o le a tatou su'esu'eina ai lesona o kuata e fa e fa'atatau i *le Tala Lelei e Tusa Ai Ma Le Molimau a Ioane*. Talu ai ona o lona agamalu, o le tusitala o le tusi lona fa, na te le o fa'ailoaina mai o ia lava, na te le o faia fo'i se fa'amatalaga e fa'atatau ia te ia lava, e fa'apea, o ia o le tasi o so'o e to'a lua ia sa muamua lava mulimuli ia Iesu (Ioane 1:37). Peita'i, o loo ia fa'aigoaina o ia o "le isi so'o," "o le so'o lena," "o le so'o . . . na ia alofa i ai," "o le so'o sa alofa i ai Iesu," ma "le so'o na molimau i nei mea uma" (Ioane 18:15; 19:26; 21:20, 23, 24). Talu ai ona o lo o ta'uina mai igoa o isi so'o iloga a'o le igoa o Ioane e le o ta'uina mai, e foliga mai o loo fa'ailoa mai ai o ia na tusia lena tusi.

E tusa ai ma le fa'amatalaga a le Agaga o Valo'aga, o le tusitala o le tala lelei lona fa, o Ioane lea, "le so'o e alofa i ai Iesu." O ia o le tasi o so'o e to'a tolu lea sa molimauina le mamalu o Keriso i luga o le mauga sa liua ai o Ia, ma Ona tiga i le togala'au i le taimi na soso'o tonu lava ma Lona moliaga. O lona olaga o se fa'ata'ita'iga maoa'e lea o lo o fa'ailoa mai ai, e mafai e le mana o le Atua ona liua atoatoa se "atali'i o le faititili" e avea o se tane uiga alofa ma loloto lona iloa fa'aleagaga.

"O Ioane sa ia pipi'i ia Keriso e fa'apei ona pipi'i o le vine i le poutu mauualuga. Na ia onosa'ia lamatiaga o le fale fa'amasino mo Lona Matai, ma sa ia fa'atalitali fa'ata'amilo ai i le satauro, ma ina ua ta'uina mai le tala e fa'apea ua toe soifua mai Keriso, na ia fa'ata'alise atu i le tu'ugamau, o lona vilivilita'i na ia muamua atu ai nai lo Peteru oso vale.

"O le alofa fa'alia ma le finafinau le fa'apito na fa'aalia i le olaga ma le amio a Ioane, o loo fa'atusalia mai ai lesona e le mafa'amatalaina lo latou taua i le ekalesia kerisiano. E le'i maua fa'alenua e Ioane le amio matagofie lea sa fa'aalia e lona olaga mulimuli ane. O lona uiga fa'alenua, sa i ai ona vaivaiga leaga lava. E le'i gata ina ia fa'amaualuga, fai taua, ma fa'anaunau mo le mamalu, ae e le fa'autauta fo'i, ma loto tiga pe a fa'amanu'alua. O ia ma lona uso na fa'aigoaina o 'atali'i o le faititili.' O le ita leaga, o le fa'anaunauga mo le tauimasui, o le uiga o le faitio, sa i ai uma lava i le so'o pele. Peita'i i lalo o nei uiga uma, na silafia ai e le Faia'oga fa'alelagi le vilivilita'i, fa'amaoni, ma le loto alofa. Na a'oa'i e Iesu lenei uiga sa'ili'ili mo ia lava, fa'ato'ilaloina ona fa'anaunauga, ma tofotofoina lona fa'atuatua. Peita'i na Ia fa'aalia atu ia te ia le mea lea sa fa'anaunau i ai lona loto—o le matagofie o le fa'apaiaina, le mana e liua ai, o le alofa."—The Acts of the Apostles, 539, 540.

O tagata tusi tala iloga uma anamua o loo latou fai mai o le tusi o le tala lelei a Ioane, na tusia i Efeso e tusa ma le T.A 90 po'o tua atu. O le so'o sa tu'uina i totonu o se ulo ga'o sa pupuna ma sa ia le oti ai i se uiga fa'alenua, ma na mulimuli ane ona tulia ese atu ai lea o ia i le motu o Patamo (Fa'aaliga 1:9). O iina sa ia tusia ai le Fa'aaliga. O le soloa'i atu o Nerva e fai ma tupu i le nofoali'i i le (T.A. 96) na mafai ai ona toe fo'i atu Ioane i Efeso, o iina o lo o talitonuina sa fa'aauau ai ona ia nofo ai se'ia o'o i lona maliu i le taimi o le nofoa'iga a Trajan (T.A. 98–117).

Tau ina ia ta'ita'iina e le Agaga o Keriso a tatou su'esu'ega i lenei kuata, ma pa'i mai i o tatou loto i le tali atu i Lona alofa!

O le Matagaluega o le A'oga o le Sapati a le Koneferenisi Aoa

Nofoaga Autu mo Auaunaga Eseese mo le Soifua Maloloina ma A'oa'oga i Paraguay

O le Faigamalo o tagata o Paraguay o se atunu'u lea e si'omia uma e le eleele i Amerika i Saute, o loo tuaoi ai ma Argentina, Bolivia, ma Brazil. O le faitau aofa'i o tagata e tusa ma le 6.1 miliona, 96.1% o lea fuainumera o tagata latou te fa'ailoaina mai o i latou o tagata lotu Kerisiano (88.3% Katoliko ma le 7.8% o isi fa'atuatuga Kerisiano); 2.6% e leai ni a latou tapua'iga, a'o le vaega o loo totoe e patino i isi tapua'iga pe latou te le'i fa'ailoaina mai fo'i. O le tamaoaiga o le malo e fa'avae tasi i fa'ato'aga—aemaise ai lava fatu o le la'au o le soy—ma i le 50 tausaga talu ai, ua fa'afaileleina fo'i e Paraguay se pisinisi tele lava o le eletise e ola i le vai.

O ulua'i tagata ekalesia SDA Reform Movement sa taunu'u mai iine'i mai i Hungary i tausaga e amata mai i le 1940, ma o le galuega na fa'alauteleina atili i tausaga e amata mai i le 1950 e ala atu i le auaunaga fa'atau tusi, ma mulimuli ane ai i tausaga o le 1970 e ala i le galuega o le togafitiga o ma'i fa'amisionare. O loo i ai i le tatou nei la matou vaega matagofie lava o tagata ekalesia tumu i le fa'atuatua i aai autu.

E tele ni tausaga sa i ai la matou nofoaga autu o le soifua maloloina fa'alenua sa fa'agaioia i le laumua i le aai o Asunción, ma sa mafai ai ona matou fa'asoaina atu le tala lelei i le tele o tagata ma a'oa'oina ai le soifuaga o tagata totoe o le Atua. O le fesoasoani a le Atua ma la matou vaega o tagata faigaluega agava'a o tomai eseese, o lea matou te fa'amoemoe ai ina ia toe amatalia le fale o auaunaga i le soifua maloloina—peita'i o le taimi lenei, o le auala mo lea auaunaga ia fa'agaioia ai e aveva o se auaunaga fa'atala'i i totonu o le aai, fa'atasi ai ma se toe fa'aopoopoga i le nofoaga i le vao ina ia fa'ataunu'uina ai le poloa'iga a le Atua: “ ‘O ese mai i aai. Ia fa'usia tou falema'i, o a outou a'oga, ma ofisa i nofoaga e mamao ese mai i nofoaga o loo sili ona to'atele ai le aofa'i o tagata.’ ”—*Selected Messages*, bk. 2, p. 357.

O le manatunatu la i lenei sini, na matou maua ai se fasi eleele i se nofoaga matagofie mamao i tua i le vaega o Paraguari, e tusa ma le 66 km. (41 maila) mai i le laumua. Ua i ai la matou fale tapua'i ma le fale mo le faifeau i luga o lenei eleele, peita'i ua na o le amataga lava lenei. O le sini o le fausia lea o se fale tutotonu mo auaunaga eseese fa'atasi ai ma se nofoaga fa'avae mo le soifua maloloina, a'oga a le ekalesia, fale tapua'i, ma se fale mo le fausiaina o meaai maloloina e tausia ai e le tagata ia lava.

Matou te ole atu i le loto foa'i o lo tatou au uso i le lalolagi atoa ina ia fesoasoani mai ia i matou ina ia fa'ataunu'uina lenei sini. O lo tatou galulue fa'atasi o le a aumaia ai le fa'amalosiaga ma fa'alototeleina ai i le vaega mulimuli e mana'omia e fa'amae'aina ai le galuega. Tatou te fa'alagolago atu i le mana ma le alofa tunoa ofoofogia o le Atua ma tatou te mautinoa o le a fa'amanuia e le Atua taumafaiga o lo tatou au uso tu'ufa'atasi i le lalolagi atoa ina ia fa'amalosiaga ma fa'alauteleina tala'iga i totonu o lenei vaega o Lona tovine.

O o Outou uso ma tuafafine mai i le Matagaluega i Paraguay

O le Tala Lelei e Tusa Ai ma le Molimau a Ioane

MAU TAULOTO: “Ua liu tino tagata le Upu, sa mau foi o ia ma i tatou, (na matou matamata i lona mamalu; o le mamalu lava lea o le Alo e toatasi o le Tamā,) ua tumu o ia i le alofa tunoa ma le faamaoni.” (Ioane 1:14).

Faitauga Fautuaina : *Patriarchs and Prophets*, pp. 44–51, 111–116.

“Na amata mai lava i le vavau atoa o Keriso sa fa'atasi lava ma le Tama, ma ina ua Ia tauaveina i luga ia te Ia lava le natura fa'aletagata, sa tasi pea lava i La'ua ma le Atua.”—*Selected Messages*, bk. 1, p. 228.

1. IESU, E TASI MA LE TAMA

Ulua'i Aso

Tesema 29

a. O le a le fa'amatalaga a le Upu a le Atua e fa'atatau ia Iesu a'o le'i fanau mai o Ia i le tino tagata? Ioane 1:1, 2.

“Mai lava i aso o le vavau o le Alii o Iesu Keriso sa tasi lava o Ia ma le Tama; o Ia o le 'fa'atusa o le Atua,' o le fa'atusa o Lona silisiliese ma Lona matagofie, 'o Ia o le pupula o Lona mamalu.' O le fa'aaliaina o lenei mamalu lea na Ia afio mai ai i lo tatou lalolagi. Na Ia afio mai i lenei lalolagi fa'apogisaina e le agasala ina ia fa'aalia le malamalama o le alofa o le Atua. —ina ia avea ma 'le Atua ma i tatou.' ”—*The Desire of Ages*, 19.

“O Keriso, le Upu, le Alo e to'atasi o le Atua, sa tasi ma le Tama fa'avavau—tasi i le natura, tasi i le amio, tasi i le sini—e na o Ia lava na mafai ona ulufale i fuafuaga ma sini uma a le Atua.”—*The Patriarchs and Prophets*, p. 34.

b. O le a le finagalo o le Tama ma agelu e fa'atatau ia Iesu? Salamo 45:6; Isaia 9:6; Eperu 1:3, 6–8.

“O agelu o auauna ia a le Atua, e susulu mai i le malamalama o loo tafe mai e le aunoa mai ia te Ia ma fa'ata'alise atu i apa'au televavave ina ia faia Lona finagalo. Peita'i o le Alo, le ua fa'au'uina e le Atua, 'o Ia o Lona fa'atusa ua matua tutusa lava ma Ia,' le pupula o Lona mamalu,' 'o loo taofia mea uma e le upu a Lona mana,' e pule silisili o Ia ia i latou uma.”—*Ibid.*

2. O LE FAIGA O LE FOAFOAGA

a. O ai na foafoaina mea uma? Ioane 1:3, 10; Kolose 1:15–17; Eperu 1:2.

“O Keriso na Ia fofolaina lagi, ma folasia fa'avae o le eleele. O lona aao na tautauina lalolagi i le vateatea, ma foafoaina fugala'au o le fanua . ‘O Lona malosi na fa'atuina fa'ata'alise mai ai mauga.’ ‘O le sami e Ona lea, ma na Ia foafoaina.’ Salamo 65:6; 95:5. O Ia na fa'atumulia le eleele i le matagofie, ma fa'atumulia le ea i pese. Ma o luga o mea uma lava oi le eleele, ma le ea, ma le vanimonimo, na Ia tusia ai le fa'amatalaga e fa'ataui i le alofa o le Tama.”—*The Desire of Ages*, p. 20.

b. Fa'amatala pe na fa'aapefa ona foafoaina lalolagi ma le iunivesa . Salamo 33:6, 9; 104:1–6.

“Na fetalai le Atua, ma o Ana upu na foafoaina ai Ana galuega i le lalolagi fa'alenua. O le foafoaga a le Atua ua na o se fale teu oa tele lea o mea ua saunia mo Ia Na te fa'aaogaina i le taimi lava Na te finagalo malie i ai.”—*The SDA Bible Commentary* [E. G. White Comments], vol. 1, p. 1081.

“A'o tula'i mai le eleele mai i le a'ao o Le na foafoaina, sa matua matagofie lava. O lona fogaeleele sa foliga eseese i 'mauga maualuluga, mauga maualalalo, eleele laugatasi, sa felavasa'i ai vaitafe ma vaituloto matagofie; peita'i o mauga maualuluga ma mauga maualalalo e le'i tifato i lalo ma gaoa, ma tumu i vaega maualalalo mata'utia ma vanu loloto e fefe ai, e fa'apei ona i ai i le taimi lenei; o tausii'usi'uga ma'ama'ai gaoa o le tino papa o le eleele sa tanumia i lalo o le eleele lelei, lea sa fa'aolaina a'e ai i ona itu uma se ola taumasuasua o la'au o le vao. Sa leai ni taufusi leaga poo ni toafa e le ola ai se la'au. O pupu vao matagofie ma fugala'au ma'ale'ale sa fa'afeiloa'iina mai mata i itu uma lava. O nofoaga maualuluga na fa'apaleina e la'au na sili atu lo latou matagofie nai lo so'o se la'au o loo ola i le taimi lenei. O le ea, e le'i fa'aleagaina e le manogi leaga, sa mama ma maloloina. O le va'aiga atoa o le eleele na sili atu lona matagofie nai lo le laufanua fa'amatagofieina o le maota silisili ona matagofie. O le au o agelu sa latou va'ava'ai i lea va'aiga ma le fiafia, ma latou olioli ai i galuega ofoofogia a le Atua.”—*Patriarchs and Prophets*, 44.

“E le o ioeina e le Tusi Paia ni tausaga e tele na liua lemu ai le eleele mai i se tulaga nunumi. O aso fa'asolosolo ta'itasi o le foafoaga, o loo faailoa mai e le fa'amaumauga paia, sa aofia ai le afiafi ma le taeao, e fa'apei o isi aso uma lava na mulimuli mai ai. O le i'uga o aso ta'itasi o loo aumaia ai le i'uga o le foafoaga a le Atua-foafoa.”—*Ibid.*, p. 112.

3. O LE MALAMALAMA O LE IUNIVESA

a. O ai le Amataga o le ola uma ma le malamalama—ma e fa'apefea ona fa'amanuiaina ai i tatou i lenei Amataga? Ioane 1:4–9; Galuega 17:28.

“O [Keriso] sa fetalai mai e ala ia i latou uma lava na fa'ailoaina mai i augatupulaga uma le upu a le Atua i le tagata. O le amio silisili ona lelei uma lava o loo fa'aalia i tagata sili ona ta'uta'ua ma sili ona amio lelei i le lalolagi, o ata lafoia uma nei o Ia lava.”—*Education*, p. 73.

“O Keriso o Ia o le 'Malamalama, lea e fa'amalamalamaina ai tagata ta'itasi uma e fanau mai i le lalolagi.’ Ioane 1:9. E fa'apei ona maua e tagata uma le ola e ala mai ia Keriso, e fa'apea fo'i ona maua e tagata uma se ave o le malamalama fa'ale-Atua e ala mai ia te Ia.”—*Ibid.*, p. 29.

“O le mana o le Atua o loo fa'aaogaina pea i le taofia i luga o mea na Ia foafoaina. E le fa'apea na amata loa ona fa'agaioia le tino, ona fa'aauau ai pea lea ona ia gaii e ala i lona lava malosi, lea e tata ai le fatu, ma soso'o atu ai lea manava i lea manava. O manava ta'itasi uma lava, o tata ta'itasi uma lava a le fatu, o se fa'amaoniga lea o le tausiga a Le o loo tatou ola ma gaii ai i totonu ia te Ia. E amata mai lava i le iniseti e sili ona itiiti e o'o atu i le tagata, o mea ola ta'itasi uma lava o loo latou fa'alagolago atu i aso ta'itasi mo Lana tausiga. . . .

“O le mana malosi o loo galue e ala atu i le natura atoa uma ma fa'atumauina ai mea uma lava, e le ua na o se tapula'a ma se malosi lea o loo salalau ma fa'agaioia atoa ai le natura, e fa'apei ona fai mai ai nisi o tane fa'asaienisi. O le Atua o Ia o se agaga; ae o Ia fo'i o se peresona ma'oti, aua o le tagata na faia i Lona fa'atusa. I le avea o Ia ma peresona ma'oti, o lea ua Ia fa'aalia ai o Ia lava i totonu i Lona Alo.”—*Ibid.*, p. 131.

b. O le a le fetalaiga a Iesu e fa'atatau ia te Ia lava? Ioane 9:5; 8:12; 3:19; 12:46.

“I upu nei, ‘O a'u o le malamalama o le lalolagi,’ na fa'ailoa mai ai e Iesu o Ia o le Mesia. O le toea'ina o Simeona . . . na ia tautala e fa'atatau ia te Ia, e fa'apea o Ia o 'se malamalama e fa'amalamalamaina ai tagata o Nu'u ese, o le mamalu fo'i o Lou nu'u o Isaraelu.’ Luka 2:32. O nei upu sa ia fa'atatauina ai ia te Ia se valoaga e iloa e Isaraelu uma. Na fa'ailoa mai e le Agaga Paia e ala mai i le perofeta o Isaia, ‘O le mea matua mama ina ia fai Oe ma A'u auauna, ina ia fa'aea mai itu aiga o Iakopo, ma ia toe fa'afo'isia mai e ua fa'asaoina o Isaraelu; o le a Ou avatua fo'i oe e fai ma malamalama i nu'u ese, ina ia fai Oe Ma'u fa'aolataga e o'o i tuluiga o le lalolagi.’ Isaia 49:6, R.V. O lenei valoaga na malamalama uma i ai e fa'apea o loo tautalagia e fa'atatau i le Mesia, ma ina ua fetalai Iesu, ‘O A'u o le malamalama o le lalolagi,’ na iloa e tagata Lana fetalaiga e faapea o Ia o Le na folafolaina.”—*The Desire of Ages*, p. 465.

4. O LE ATUA MA I TATOU

a. O le a se mea na valoia e Isaia e fa'atatau i le suafa o Keriso? Isaia 7:14. O anafea na fa'ataunu'uina ai lenei valoaga? Mataio 1:22, 23.

“Talu ai ona sa afio mai Iesu e nofo fa'atasi ma i tatou, tatou te iloa ai o loo silafia e le Atua o tatou tofotofoga, ma Na te lagonaina fo'i o tatou fa'anoanoaga. E mafai ona malamalama atali'i ma afafine ta'itasi uma o Atamu, o lo tatou Atua-foafoa o le uo lea a tagata agasala. Aua, i mataupu uma lava o le alofa tunoa, o folafolaga ta'itasi uma lava o le olioli, o gaioiga ta'itasi uma lava o le alofa, o fa'atosinaga ta'itasi uma lava o loo fa'aailoa mai i le soifuaga o le Fa'aola i luga o le fogaeleele, tatou te va'aia ai 'le Atua ma i tatou.’ ”—*The Desire of Ages*, p. 24.

b. O le a le mea na faia e Iesu ina ia a'apa mai ai ia i tatou i lo tatou tulaga pa'u? Ioane 1:14; Filipi 2:5–8; Eperu 2:14–18.

“Na tauaveina e Keriso lo tatou natura ma nofo fa'atasi ma i tatou, ina ia tatou iloa Lana amio ma Lona soifuaga faaleatua. O le Atua na fa'aalia i le tino fa'aletagata; o le pupula-le mava'aia i totonu o le tino-va'aia fa'aletagata. Na mafai ona iloa e tagata mea e le'i iloa e ala i mea ua iloa; o mea fa'alelagi na fa'aalia e ala i mea faale-lalolagi; na fa'aalia le Atua i foliga tagata.”—*Christ's Object Lessons*, p.17.

“O le Alo o le Atua na osofa'ia i la'asaga ta'itasi uma lava e malosi o le pouliuli. Ina ua mae'a Lona papatisoga na ta'ita'iina atu o Ia e le Agaga i le vao, ma puapuagatia ai i fa'aosoosoga i aso e fa sefulu. . . . Ana fa'apea e le'i tofusia o Ia i lo tatou natura, semanu e le'i mafai ona fa'aosoosoina o Ia e fa'apei ona fa'aosoosoina o le tagata. Ana fa'apea e le'i mafai ona Ia gaua'i atu i fa'aosoosoga, semanu e le'i mafai ona avea o Ia ma o tatou fesoasoani. O se mea moni taua lava, na afio mai Keriso e tauina taua i le avea o Ia ma tagata, mo le tagata. O Lona fa'aosoosoga ma Lona manumalo e ta'u mai ai ia i tatou e tatau ona fa'ata'ita'i le aiga tagata ia te Ia; o le tagata e tatau ona tofusia i le natura o le Atua.”—*The SDA Bible Commentary*, [E. G. White Comments], vol. 5, p. 1082.

“O le ufiufiina o Lona mamalu i le avea o Ia ma tamaitiiti o se aiga tagata pa'u, o se koleniga silisili lenei na tu'uina atu i ai e le Perenise o le ola, Ia lava. Na fa'apena ona Ia fuaina Lona malosi ma Satani. O le na tuliese mai i le lagi sa tauivi i lona malosi atoa mo le manumalo i Le sa ia loto leaga i ai i totonu o lotoa o le lagi. Oka se mata'utia o lenei tauiviga! E leai se gagana e mafai ona fa'amatalaina. Peita'i i le lumana'i e le o toe mamao o le a malamalama ai i latou ua manumalo i le toto o le Tama'i Mamoe ma le upu o le latou molimau.”—*Ibid.*, pp. 1081, 1082.

5. O LE SINI O LE FANAU MAI O IESU I LE NATURA PA'U O LE TAGATA

a. O le a le mea na affio mai Iesu e fai mo le aiga tagata? Ioane 3:16, 17; 1:12; Luka 19:10.

“O Keriso na inosia ma sauaina e fa'apei o le tulaga sa tatau ona o'o ia i tatou, ina ia mafai ai ona fa'amanuiaina i tatou e fa'apei ona tatau ia te Ia. Na fa'asalaina o Ia mo a tatou agasala ia e le'i tofusia ai o Ia, ina ia ta'uamionuina ai i tatou i Lana amionu, lea e le'i tofusia ai i tatou. Na Ia puapuagatia i le oti sa patino ia i tatou, ina ia mafai ai ona tatou maua le ola e patino ia te Ia. ‘O Ona fa'alavalava fo'i ua fa'amaloloina ai i tatou.’ ”—*The Desire of Ages*, 25.

b. E fa'apefea ona toe fanaufouina i tatou e ala i le maliu o Keriso? Kalatia 4:5–7; Eperu 2:10.

“Na faia e Keriso se taulaga atoa ma atoatoa, o se maliu e atoatoa e lavea'i ai atali'i ma afafine ta'itasi uma lava o Atamu o le a fa'ailoaina le salamo i le Atua mo le solia o Lana tulafono, ma fa'aalia le fa'atuatua i lo tatou Ali'i o Iesu Keriso. . . . O Keriso o Ia o le Kapeteni o lo tatou fa'aolataga, ma o Ona lava puapuaga ma Lona maliu ua Ia tu'uina mai ai se fa'ata'ita'iga i Ona so'o uma e iloa ai o le mataala ma le tatalo, ma taumafaiga vilivilita'i, na mana'omia ia i latou pe afai latou te manana'o latou te fa'ailoa sa'o atu le alofa lea sa nofo i totonu ia te Ia mo le aiga tagata pa'u.”—*Testimonies for the Church*, vol. 2, p. 664.

“E alofa le Atua i Lana fanau usiusita'i. Ua Ia saunia se malo, e le mo tagata le fa'amaoni, ae mo Lana fanau ua Ia tofotofoina i totonu o se lalolagi ua fa'aleagaina e le agasala. I le avea o i tatou ma fanau usiusita'i, ua ia i tatou le avanoa sili ona taua o le mafutaga ma le Atua. ‘Afai o le fanau,’ o Lana fetalaiga lea, ‘o suli fo'i' i se tofi e fa'avavau lava. . . . o Keriso ma Ona tagata e tasi lava i latou.”—*The SDA Bible Commentary*, [E. G. White Comments] vol. 6, p. 1077.

FESILI TOE FAAMANATU

1. O le a le natura o loo ia Iesu talu mai le vavau?
2. O ai na fofolaina lagi ma folasia fa'avae o le eleele?
3. O ai e puna mai ai malamalama moni uma lava?
4. O le a le igoa o loo fa'asuafaina ai Iesu i le Isaia 7:14?
5. O le a le natura na faia ai Iesu i Lona tauaveina o lo tatou natura agasala?

O le Tama'i Mamoe a le Atua

MAU TAULOTO: “Na faasauaina o ia, sa fa'atigainaina foi o ia, ae e le'i tautala mai o ia; e pei o se tama'i mamoe ua ta'ita'iina o Ia ia fasia, e pei fo'i o se mamoe i luma o e sele lona fulufulu, ua gugu o Ia, o Ia foi ua le tautala mai” (Isaia 53:7).

Faitauga Fautuaina : *The Desire of Ages*, 132–143.

“Ia taula'i atu e le tagata salamo ona mata i ‘le Tama'i Mamoe a le Atua, Na te aveesea le agasala a le lalolagi.’ ”—*The Faith I Live By*, p. 107.

1. O LE MOLIMAU A IOANE LE E PAPATISO

Ulua'i Aso

Ianuari 5

- a. O le a se mea na fa'ailoa mai e Ioane le papatiso e fa'atatau ia Iesu? Ioane 1:15–18.
- b. Na fa'aapefea ona fa'ailoa atu e Ioane, ia lava i ta'ita'i fa'alelotu? Ioane 1:19–23. O le a le valoaga na ia fa'ataunu'uina—ma o le a fa'aapefea ona tatou feso'ota'i atu i ai? Isaia 40:3–5.

“I la'asaga ta'itasi uma lava o le tala'aga o le lalolagi lenei sa i ai lava mea faigaluega a le Atua e tauaveina i luma Lana galuega, lea e tatau ona faia i Lana lava auala ua fa'atonuina mai. O Ioane le papatiso sa i ai lana galuega fa'apitoa, lea sa ia fanau mai e faia ma sa tofia fo'i i ai o ia—o le galuega lea o le saunia o le ala o le Ali'i. . . .

“O [lana auaunaga i le vao] o se fa'ataunu'uga sili lea ona iloga, ma moni, o le valoaga.”—*The Southern Watchman*, March 21, 1905.

“O le Ali'i na Ia tu'uina atu ia [Ioane le papatiso] lana fe'au. Na ia alu atu ea i faitaulaga ma ta'ita'i ma fesili atu i ai pe mafai ona ia folafolaina atu lenei fe'au?—E leai, na aveesea o ia e le Atua mai ia i latou ina ia le a'afia o ia i o latou uiga ma a latou a'oa'oga. O ia o le leo o le sa alaga i le vao, [Isaia 40:3–5]. O le fea'u tonu lava lenei e tatau ona tu'uina atu i o tatou tagata; ua tatou lata lava i le i'uga o le taimi, ma o le fe'au o lenei, Ina teuteu ia e outou le ala o leova; ia ao ese ma'a; ia outou fa'atuina se tapula'a mo tagata. O tagata e tatau ona fafaguina. E le o se taimi lenei e alaga ai e faaea, e filemu ma saogalemu.”—*Selected Messages*, bk. 1, p. 410

2. O SE GALUEGA O LE FA'ASATAUROINA

- a. Ina ua afio mai Iesu ia Ioane ina ia papatisoina o Ia, na fa'a'pefea ona fa'ailoa mai o Ia e Ioane ma ia molimau ai i Lana galuega i tagata lautele? Ioane 1:29, 34. O le a le valo'aga na fa'ataunu'uina e lenei tulaga? Isaia 53:4–7.**

“O Keriso o Ia o le Fa'aola o le tagata i le amataga o le lalolagi e fa'a'pefi lava ona avea o Ia ma ona Fa'aola i le taimi nei. A'o Ia le'i fa'aofuina Lona itu atua i le natura agasala o le tagata ma Ia afio mai ai i lo tatou lalolagi, o le fe'au o le tala lelei sa tu'uina atu e Atamu, Setu, Enoka, Metusela, ma Noa. O Aperamo i Kanana ma Lota i Sotoma sa la folafolaina atu le fe'au, ma, mai i lea tupulaga i lea tupulaga o avefe'au fa'amaoni sa latou fa'ailoaina mai Le o le a afio mai. O gaioiga ma fa'atinoga fa'atulagaina o tapua'iga a Iutaia sa fa'atuina e Keriso lava Ia. O Ia o le fa'avae o la latou fa'atulagaga o taulaga fasia, o Ia o le Tama'i Mamoe moni silisili o a latou auaunaga uma fa'aletapua'iga. O le toto na fa'amaligiina a'o ofoina atu taulaga fasia na fa'asino atu i le maliu o le Tama'i Mamoe a le Atua. O taulaga fai ata uma lava sa fa'ataunu'uina uma i totonu ia te Ia.”—*Christ's Object Lessons*, p. 126.

- b. Na fa'a'pefea ona fa'ailoa atu e Ioane, Iesu i Ona so'o? Ioane 1:35, 36. O le a le a'afiaga o ana upu i luga ia i latou—ma o le a le mea na tupu soso'o ane ai i lona lava olaga? Ioane 1:37.**

“O le aso na soso'o ai [ina ua mavae le papatisoga o Keriso], a'o tutu latalata ane so'o e to'a lua, na toe va'ai atu ai Ioane ia Iesu i le lotolotoi o tagata. Na toe malamalama a'e foliga o le perofeta i le pupula mai i Le e le'o va'aia, a'o ia alaga a'e, 'Fa'auta i le Tama'i Mamoe a le Atua!' O upu ia sa fa'atumulia ai loto o le au so'o i le fiafia. Latou te le'i malamalama atoa i ai. O le a le uiga o le igoa ua tu'uina atu e Ioane ia te Ia—'o le Tama'i Mamoe a le Atua'? O Ioane lava ia na te le'i fa'amatalaina. O lo latou tu'ua o Ioane, na latou o atu ai e sa'ili ia Iesu.”—*The Desire of Ages*, p. 138.

“Na fa'ailoa atu e Ioane i ona so'o, o Iesu o Ia lea o le Fa'aola na folafolaina mai, le Fa'aola o le lalolagi. A'o fa'ai'ui'u lana galuega, sa ia a'oa'oina ona so'o ina ia latou va'ava'ai ia Iesu, ma ia mulimuli atu ia te Ia o le Faia'oga silisili lea. O le olaga o Ioane sa tumu i le fa'anoanoa ma le fa'afitia o ia e ia lava. Na ia fa'asilasilaina mai le ulua'i afio mai o Keriso, peita'i e le'i fa'atagaina o ia na te molimauina Ana vavega, ma olioli ai i le mana na fa'aalia e Ia. Ina ua o'o i le taimi o le a fa'amausaliina ai e Iesu Ia lava i le avea o Ia ma faia'oga, na iloa e Ioane o ia lava e tatau ona oti. O lona leo na seasea fa'alogoina, se'ivagana ai i le vao. O lona olaga sa nofo to'atasi. Na te le'i pipi'i i le aiga o lona tama, ina ia olioli ai i fa'atasiga ma i latou, peita'i na ia tu'ua i latou ina ia mafai ai ona fa'ataunu'uina lana galuega.”—*Early Writings*, p. 154.

3. O ULUA'I SO'O O IESU

a. O ai nisi o ulua'i so'o o Iesu? Mataio 4:18, 21. O le a le naunautaiga na latou fa'aalia ia Keriso ma o le a le umi o la latou ulua'i feiloa'iga ma Ia? Ioane 1:38, 39.

“O le tasi o le to'a lua [sa mulimuli ia Iesu] o Anetere'a lea, le uso o Simona; o le isi o Ioane le e tala'i. O ulua'i so'o nei o Keriso. O le osofia o i latou e se musumusuga e le mafai ona te'ena, o lea na latou mulimuli ai ia Iesu—o lo latou naunau e talanoa ma Ia, peita'i na latou matua ofo ma gugu, o lea na fa'atumulia ai i latou i le matua taua tele o le manatu lea, ‘O le Mesia ea lenei?’

“Na silafia e Iesu na mulimuli atu le au so'o ia te Ia. O i latou ia o ulua'i fua o Lana auunaga, ma sa i ai le olioliga i totonu o le loto o le Faia'oga fa'alelagi a'o tali atu nei tagata i Lona alofa tunoa. Ae na Ia faliu, ma sa na ona Ia fesili atu, ‘O le a le mea o lua sa'ilia?’ Na Ia finagalo e tu'ua sa'oloto i la'ua ia toe fo'i i tua pe tautala mai fo'i i lo la'ua fa'anaunaga.

“E tasi le sini sa latou malamalama i ai. O Le o loo fa'atasi ma i latou na fa'atumulia ai o latou manatu. "Na latou alaga mai, ‘Rapi, . . . o fea E te nofo ai?’ I se talanoaga pu'upu'u i autafa o le ala latou te le'i maua ai le mea lea sa latou fa'anaunau i ai. Na latou fa'anaunau ina ia tu'ua na o i latou ma Iesu, ina ia latou nonofo i Ona aao, ma fa'alogologo i Ana upu. . . .

“Ana fa'apea e i ai ia Ioane ma Anetere'a le agaga le talitonu o faitaulaga ma ta'ita'i, semanu e le maua i la'ua o avea ma tagata a'o'oga i aao o Iesu. Semanu la te o mai ia te Ia e pei o ni tagata faitio, ina ia fa'amasino i Ana upu. E fa'apena ona tapuni e le to'atele o tagata le faitoto'a i avanoa sili ona taua. Peita'i e le'i fa'apea ona faia e nei ulua'i so'o. Sa latou tali atu i le vala'au a le Agaga Paia i tala'iga a Ioane le papatiso. O lenei ua latou iloa le si'ufofoga o le Faia'oga fa'alelagi. Ia i latou, o upu a Iesu na fa'atumulia i le ola fou ma le upu moni ma le matagofie. O se malamalama'aga fa'alelagi na fa'asusuluina mai i luga o a'oa'oga a Tusi o le Feagaiga Tuai. O autu o le upu moni e tele ona vaega na tula'i manino a'e i le malamalama fou.”—*The Desire of Ages*, p. 138, 139. [Author's emphasis.]

b. O le a se mea na faia vave e ulua'i so'o ina ua mae'a ona la feiloa'i ma Iesu? Ioane 1:41, 42.

“Na sa'ili Anetere'a ina ia fa'asoa atu le olioli na fa'atumulia ai lona loto. O lona alu atu e sa'ilia lona uso o Simona, o lea na ia alaga atu ai, ‘Ua matou maua le Mesia.’ E le'i fa'atali Simona mo se vala'aulia lona lua. O ia fo'i sa fa'alogo i le tala'iga a Ioane le papatiso, ma na ia fa'ata'alise atu i le Fa'aola.”—*Ibid.*, p. 139.

4. TALEPEINA I LALO O LE UIGA FA'AILOGA TAGATA

a. Fa'amatala le mea na tupu ina ua valaaulia e Iesu le so'o na soso'o mai lona mulimuli ia te Ia. Ioane 1:43–45.

“Na usita'i Filipi i le fa'atonuga, ma o le taimi lava lena na avea ai fo'i o ia ma tagata faigaluega mo Keriso. Na vala'au Filipino ia Natanielu.”—*The Desire of Ages*, p. 139.

b. O le a se mea e mafai ona tatou a'oa'oina mai i le auala na mafai ai e Keriso ona fa'ato'ilaloina le fa'alotolotolua o Natanielu? Ioane 1:46–49.

“A'o va'ava'ai atu Natanielu ia Iesu, sa ia fa'anoanoa. E mafai ea e lenei tane, o le na fa'aalia mai fa'ailoga o galuega tiga ma le mativa, ona avea ma Mesia? Ae e le'i mafai ona filifili Natanielu e te'ena Iesu, aua o le fe'au a Ioane na aumaia ai le talitonuga i lona loto.

“I le taimi na vala'au atu ai Filipino ia Natanielu, ua alu ese atu lena o Natanielu i se vaega paganoa o fa'aputuga o la'au e manatunatu ai e fa'atatau i le fa'asilasilaga a Ioane ma valoaga e fa'atatau i le Mesia. Sa ia tatalo afai o Le ua fa'ailoa mai e Ioane o le Fa'aola lea, ia fa'ailoaina mai ia te ia, ma na afio ifo loa le Agaga Paia i luga ia te ia ma le mautinoaga e iloa ai ua asiasi mai le Atua i Ona tagata ma fa'atuina a'e se nifo o le fa'aolataga mo i latou. . . .

“ ‘Na tali atu Iesu ma fetalai atu ia te ia, Na ou iloa oe a'o e i lalo o le mati, a'o le'i valaau atu Filipino ia te oe.’

“Na lava lava lea. O le Agaga o le Atua lea sa molimau ia Natanielu i lana tatalo na o ia i lalo o le mati, lea na fetalai atu ia te ia i upu a Iesu. E ui lava ina masalosalo Natanielu ma gaua'i atu i le fa'ailoga tagata, ae na ia sau ia Iesu ma se fa'anaunauga fa'amaoni mo le upu moni, ma o lenei ua fa'amalieina lona fa'anaunauga. O lona fa'atuatua na sili atu nai lo le fa'atuatua o le sa aumaia o ia ia Iesu. Na ia tali ma fa'apea mai, ‘Rapi e, o Oe o le Alo o le Atua; o Oe o le Tupu o Israelu.’

“Ana fa'apea e talitonu fa'alagolago Natanielu i a'oa'o mo le ta'ita'iga, semanu na te le maua lava Iesu. O lona va'ai ma lona fa'amasino mo ia lava lea sa avea ai o ia ma so'o. E fa'apea fo'i i le to'atele i le taimi lenei lea e taofia e le fa'ailoga tagata mai i le lelei. Semanu e matua ese lava le i'uga pe ana fa'apea latou te 'o mai ma va'ai'!

“A'o latou talitonu fa'alagolago i ta'ita'iga a pule fa'aletagata, e leai se tasi o le a sau i le iloa e lavea'iina ai, o le upu moni. E fa'apei o Natanielu, tatou te mana'omia ia tatou su'esu'eina le upu a le Atua mo i tatou lava, ma tatalo mo le fa'amalamalama a le Agaga Paia. O Le na silafiaina Natanielu i lalo o le la'au o le mati o le a Ia silafiaina fo'i i tatou i o tatou nofoaga lilo o le tatalo. O agelu mai i le lalolagi o le malamalama o loo latalata ia i latou e sa'ili ma le loto maulalo mo le ta'ita'iga a le Atua.”—*Ibid.*, pp. 139–141.

5. O SE LAGI MATALA

a. O le a se mea na folafola atu e Keriso ia Natanielu—ma aisea? Ioane 1:50, 51.

“[Ioane 1:50, 51.] O iinei o loo toeitiiti lava a fetalai atoatoa mai ai Keriso, I luga o auvai o Ioritana na matala ai le lagi, ma na afio ifo ai le Agaga e fa'apei o se lupe i O'u luga. O lena va'aiga e na o se fa'ailoga lena e iloa ai o A'u o le Alo o le Atua. Afai e te talitonu fa'apena ia te A'u, o le a fa'aolaina lou fa'atuatua. O le a e va'ai o le lagi ua matala, ma e le toe tapunia lava. Ua Ou tatalaina atu ia te outou. O agelu a le Atua o loo o a'e, ma aveina a'e tatalo a e matitiva ma puapuagatia i le Tama i luga, ma toe o ifo, ma aumaia fa'amanuiaga ma le fa'amoemoe, loto tele, fesoasoani, ma le ola, i fanau a tagata.”—*The Desire of Ages*, p. 142, 143.

b. O le a le mea e tupu pe a tatou taliaina Keriso? Ioane 4:14; Fa'aaliga 22:17.

“A talia e se tasi le upu moni ona o lona alofa i le upu moni, o le a fa'aaliaina fo'i lenei tulaga i lona uiga fa'atauina ma uiga eseese o lona leo. Ua ia fa'aailoaina mai mea ua ia fa'alogi i ai, va'ai i ai, ma tagotago i ai i le upu o le ola, ina ia maua e isi le mafutaga fa'atasi ma ia e ala i le iloa e fa'atatau ia Keriso. O lana molimau, mai i laugutu ua pa'i atu i ai malala ola mai i le fata, o le upu moni lea i le loto o loo tatala atu ia taliaina, ma galuea'iina ai le fa'apaiaina i le amio. . . .

“Na semanu e ausia e le Atua Lana sini i le lavea'iina o tagata agasala e aunoa ma le tatou fesoasoani; peita'i o le auala mo i tatou e fausia a'e ai se amio e fa'apei o le amio a Keriso, e tataua ona tatou tofusua i Lana galuega. O le auala e ulufale atu ai i Lona olioliga—le olioliga o le va'ai i tagata ua toe fa'atauina mai e Lona maliu—e tataua ona tatou auai i Ana galuega mo lo latou fa'aolataga.”—*Ibid.*, p. 142.

FESILI TOE FAAMANATU

1. Aisea na vala'auina ai Ioane le Papatiso, ina ia alu i le vao?
2. E fa'apefea ona tataua ona tatou fa'aaogaina le olaga o Ioane le Papatiso i o tatou lava olaga?
3. O le a se mea e mafai ona tatou a'oa'oina mai ia Ioane ma Anetere'a ina ua la fetaia'i ma Iesu?
4. E fa'apefea ona mafai ona fa'alototeleina i tatou e ala i le fa'asilasilaga vave a Natanielu?
5. O le a se mea e fa'aalia ai pe moni, pe e le moni fo'i lo'u fa'atuatua ia Keriso?

O Le Fa'aipoipoga i Kana

MAU TAULOTO: “So'o se mea lava e fai mai ai o ia ia te outou, ia outou faia” (Ioane 2:5, vaega mulimuli).

Faitauga Fautuaina : *The Desire of Ages*, pp. 144–153;
Messages to Young People, pp. 403–418.

“Na amata e Iesu le galuega o le toe fuata'iina e ala i Lona fa'alatalata mai i le uiga agalelei i le aiga tagata.”—*The Desire of Ages*, p. 150.

1. O LE AMATAGA O LE AUAUNAGA A KERISO

Ulua'i Aso

Ianuari 12

a. O fea na amata ai e Iesu Lana auauunaga i luga o le fogaeleele? Ioane 2:1, 2.

“E le'i amataina e Iesu Lana auauunaga e ala i se galuega tele i luma o le fono a Iutaia i Ierusalem. I se fa'atasiga i se fale i se tama'i nu'u o Kalilaia na fa'aaogaina ai Lona mana e fa'aopoopo ai i le olioliga o le tausamiga o se fa'aipoipoga. Na fa'apena ona Ia fa'ailoaina atu Lona agaalofofa i tagata, ma Lona fa'anaunauga e auauuna i lo latou fiafiaga. I le vao o fa'aosoosoga, na Ia inumia ai le ipu o auega. Na afio mai ai e foa'i atu i tagata le ipu o le fa'amanuiaga, e ala i Lana fa'amanuiaga e fa'apa'ia ai so'otaga o le ola fa'aletagata.”—*The Desire of Ages*, p. 144.

b. O le a le mea na tupu i se taimi umi lava a'o le'i o'o i le i'uga o le tausamiga o le fa'aipoipoga? Ioane 2:3.

“[O Maria] na fa'anaunau ina ia fa'amaonia atu e Iesu i le motu o tagata o Ia moni lava o Le ua fa'amamaluina e le Atua. Na ia fa'amoemoe o le a i ai se avanoa mo Ia Na te faia ai se vavega i o latou luma.

“O le masaniga i aso na, mo tausamiga ma sauniga fiafia o le fa'aipoipoga ina ia fa'auauina mo ni nai aso. I lenei taimi o fiafiaga, a'o le'i fa'amutalia le tausamiga, na iloa ai ua uma le uaina. O lenei tulaga na matua tele ai le le mautonu ma le fa'anoanoa. E le'i masani ai le leai o se uaina i tausamiga fa'apitoa o olioliga ma le fiafia, ma o le leai o se uaina o le a foliga mai o le a fa'ailoa mai ai le leai o se uiga tali malo.”—*Ibid.*, pp. 145, 146.

2. O KERISO MA LONA TINA

a. O le a se fa'amatalaga a le tina o Keriso, ma o le a Lana tali? Ioane 2:3, 4.

“[Ioane 2:4.] O lenei tali, e foliga mai ia i tatou e fa'afuase'i e le'i fuafuaina, ae e le'i fa'ailoaina mai ai se uiga le fa'auo ma se le fa'aaloalo. O ituaiga upu na fetalai ai le Fa'aola i Lona tina, sa tusa ma aganu'u a atunu'u a Sasa'e Tutotonu. Sa fa'aaogaina aga'i i tagata na i ai le fa'anaunauga ina ia fa'ailoaina i ai le fa'aaloalo. O gaioiga ta'itasi uma lava o le soifuaga o Keriso i le lalolagi sa loto gatasi lelei lava ma poloa'iga na tu'uina mai e Ia lava, 'Ia e ava i lou tama ma lou tina.' Esoto 20:12. I luga o le satauro, i Lana gaioiga mulimuli o le alofa aga'i i Lona tina, na toe fetalai atu ai lava Iesu ia te ia i upu lava ia na Ia fetalai atu ai muamua, a'o Ia tu'uina atu lona tina i le tausiga a Lona so'o sili ona fa'apelepele. I le tausamiga o le fa'aipoipoga ma luga o le satauro, o le alofa lea na fa'ailoaina i le leo ma le va'ai ma uiga, na fa'auigaina ai Ana upu.”—*The Desire of Ages*, p. 146.

b. O le a le fa'amatalaga a le tina o Keriso i auauna—ma e fa'apefea ona fa'atatau upu nei ia i tatou i le taimi lenei? Ioane 2:5.

“O so'o [o Keriso] e tatau ona sili atu ma sili atu pea ona avea ma malosi i le folafolaga o le upu moni a'o latou fa'alatalata atu pea i le fa'aatoatoaga o le fa'atuatua ma le alofa mo lo latou au uso. Ua foa'i mai e le Atua le fesoasoani mo mana'oga fa'afuase'i uma lava e le mafai ona tutusa ma o tatou tomai ma mea e mafai ona tatou faia. Na te foa'i mai le Agaga Paia e fesoasoani i faigata ta'itasi, ina ia fa'amalosia lo tatou fa'amoemoe ma o tatou mautinoaga, ina ia fa'amalamalamaina ai o tatou mafaufau ma fa'amamaina ai o tatou loto. Na te finagalo ina ia maua mea e lava lelei mo le galuea'iina o Ana fuafuaga. Ou te fai atu ia te outou ina ia e sa'ilia le fautuaga mai i le Atua. Sa'ili o Ia ma le loto atoa, ma 'so'o se mea lava e fai atu ai o Ia ia te outou, ia outou faia.' John 2:5.”—*Testimonies for the Church*, vol. 6, pp. 414, 415.

c. O le a le fa'atonuga a Iesu i le auauna i le fa'aipoipoga, na te faia? Ioane 2:6–8.

“I autafa o le faitoto'a sa i ai fagu vai ma'a tetele e ono, ma sa fetalai atu Iesu i auauna ina ia faatutumu i vai. Ona latou faatutumuina lea. Ina ua mana'omia le uaina ina ia fa'aaogaina i le taimi lava lena, na Ia fetalai mai, 'Ina asu ane ia, ma avatu i lē pule i le tausamaaga.' Ua le o le vai lea sa fa'atutumuina ai fagu, a'o le uaina na tafe atu.”—*The Desire of Ages*, p.148.

3. O LE UAINA A KERISO

a. Ina ua tufaina atu le uaina, o le a le tali a le sa pule i le tausamiga? Ioane 2:9, 10.

“E le'i iloa e le pule o le tausamiga po'o le au vala'aulia fo'i ua uma le uaina. Ina ua latou tofo atu i le uaina na aumai e auauna, sa iloa ai e le pule o le tausama'aga na sili atu le uaina lea nai lo so'o se isi lava uaina na ia inu ai muamua, ma na matua ese lava mai i le uaina lea sa tufa mai i le amataga o le tausama'aga.”—*The Desire of Ages*, p. 148.

b. O le a le ituaiga uaina na foa'i atu e Keriso? Isaia 65:8.

“O le uaina lea sa foa'i atu e Keriso mo le tausamiga, ma le uaina lea sa Ia foa'i atu i le 'au so'o e fai ma fa'ailoga o Lona lava tino, o le sua mama lea o le vine. O le uaina lenei o loo fa'atatau i ai le fa'amatalaga a le perofeta o Isaia ina ua ia tautala e fa'atatau i le uaina fou 'i le fuifui vine,' ma fai mai, 'Aua le fa'aumatiaina; aua o loo i ai i totonu se fa'amanuiaga.' Isaiah 65:8. . . .

“O le uaina le fa'amafuina lea sa Ia foa'iina atu mo le au vala'aulia o le fa'aipoipoga, o se vai inu atoatoa ona lelei ma toe fa'amalosia ai. O lona a'afiaga o le aumaia lea o le tofo ia loto gatasi ma se naunauta'iga maloloina o le fia inu.”—*Ibid.*, p. 149.

c. O le a le fa'amatalaga a le Tusi Paia e fa'atatau i le uaina fa'amafu? Fa'ataoto 20:1; 23:29–35.

“O Keriso na Ia tu'uina atu le lapata'iga ia Isaraelu i le Feagaiga Tuai, ‘O le uaina, o le faatauemu lea; o le ‘ava malosi o le fa'apisapisao lea; o i latou uma o e faaseseina ai, e le popoto i latou.’ Proverbs 20:1. Ma Na te le'i foa'iina mai se vai inu fa'apea. O Satani na te fa'aosoosoina tagata ina ia tu'inanau sa'oloto i mea e fa'apogisaina ai le mafaufau ma fa'agase ai le va'ai fa'aleagaga, peita'i ua a'oa'o mai Keriso ia i tatou ina ia tatou pulea ma fa'ato'ilalo le natura maulalo. O Lona soifuaga atoa lava o se fa'ata'ita'iga lea o le fa'afitia e le tagata o ia lava. O le auala e motusia ai le malosi o le tu'inanau o le 'ai ma le inu, na Ia puapuagatia mo i tatou i le tofotofoga sili ona tiga na mafai ona onosa'ia e le aiga tagata. O Keriso na fa'atonu mai ina ia aua ne'i inu Ioane le Papatiso i se uaina poo se vai inu malosi. O Ia fo'i na fa'atonuina mai le le fa'aaogaina o mea ia i le ava a Manoa. Ma na Ia fetalai mai se mala i luga o le tagata o le a tu'uina atu le fagu i laugutu o lona uso a tuaoi. E le'i fa'afete'ena'iina e Keriso Ana lava a'oa'oga.”—*Ibid.*

4. O LE FA'ATA'ITA'IGA A KERISO I FA'ATASIGA MA ISI

a. O a sini na fa'ataunu'uina e ala i le fa'atasi ai o Keriso ma Lana vavega i le tausamiga o le fa'aipoipoga, ae e mo i tatou fo'i i le taimi lenei? Ioane 2:11.

“Na silafia e Keriso mea uma; na Ia silasila aga'i mai i augatupulaga i o tatou lava taimi, ma sa Ia silafia le tulaga o le aiga tagata o le a i ai i le tapunia o le tala'aga o le lalolagi. Na Ia silafia le afe ma afe o tagata o loo fano i le fa'aaogaina o le uaina ma le ava malosi. O le a aga'i lemu lava le lalolagi i le tulaga lava lea e tasi e fa'apei ona i ai i aso a'o le'i o'o mai le lolo. Peita'i ua si'itia e le lagi se lapata'iga mata'utia, ina ia talia e tagata le lapata'iga, ma galulue fa'atasi ai ma le Atua mo le puipuiga o i latou e i latou lava. Ua Ia tu'uina mai ia i tatou fa'ata'ita'iga o le fa'afitia atoatoa e le tagata o ia lava, ma ua Ia tu'uina mai fa'atonuga ia, afai e mulimulita'ia, o le a i'u i le foafoaga ma le fa'atumauina o le malosi, tomai, ma le atoaga o a tatou fanau.”—*The Signs of the Times*, April 16, 1896.

b. Fa'amatala le ituaiga uiga e toe fa'afouina ai, lea sa fa'ata'ita'iina mai e Keriso i Lana auunaga atoa. Mataio 11:29.

“Na amata e Iesu le galuega o le toe fuata'iga e ala i Lona fa'alatalata mai ma le agaalofoa i le aiga tagata. A'o Ia fa'ailoaina mai le ava silisili mo le tulafono a le Atua, na Ia a'oa'iina le amio atua fa'afoliga a le au Faresaio, ma taumafai ina ia fa'asa'oloto mai tagata mai i tulafono leai ni uiga na saisaitia ai i latou. Na Ia sa'ili e talepe i lalo pa puipui na vaevaeina i ai vasega eseese o tagata, ina ia mafai ai ona Ia aumaia fa'atasi tagata o i latou o fanau o le aiga e tasi. O Lona auai i le tausama'aga o le fa'aipoipoga na fuafuaina e avea ma la'asaga aga'i i le fa'ataunu'uina o leni sini.”—*The Desire of Ages*, p. 150.

“Na a'oa'iina e Iesu le fa'amalieina e le tagata o ona lava tu'inanauga i ona foliga uma lava, ae o Lona natura na Ia fiafia e mafuta ma talanoa ma isi. Na Ia taliaina le agalelei a vasega uma lava o tagata, i Lona asiasi atu i aiga o tagata mauoa ma tagata matitiva, o e na a'oa'oina ma i latou e le'i a'oa'oina, ma Ia saili ai e si'itia a'e o latou mafaufau mai i fesili e fa'atatau i mea masani o le olaga aga'i a'e i mea fa'aleagaga ma e tumau e fa'avavau. Na te le'i fa'atagaina le uiga fa'atautala, ma e le'i i ai fo'i se ata pogisa o le uiga manatu mama fa'aulaula na fa'aleagaina ai Lana amio; ae na Ia maua le fiafia i va'aiga o fiafiaga mama, ma o Lona fa'atasi mai na fa'atagaina ai le fa'atasiga o tagata. O se fa'aipoipoga fa'a-Iutaia o se sauniga lea e taua tele lona a'afiaga, ma o lona olioliga e le o se mea leaga lea i le Atalii o le tagata. O le fa'atasi atu o Iesu i leni tausama'aga, na fa'amamaluina ai e Iesu le fa'aipoipoga o se sauniga na fa'atuina e le Atua.”—*Ibid.*, pp. 150, 151.

5. O FEFA'ASOAA'IGA MALOLOINA I FA'ATASIGA MA ISI

a. O le a se mea e tatau ona tatou a'oa'oina mai i le fa'ata'ita'iga a Keriso lea sa ese mai ai o Ia mai i ta'ita'i fa'aletapua'iga o Ona taimi? Fa'ataoto 18:24.

“O le auaunaga a Keriso na matua iloga lava lona eseese mai i le auaunaga a toea'i'ina Iutaia. O lo latou fa'atauaina o aganu'u ma tu ma aga na fa'aumatiaina ai le sa'olotoga moni uma o manatu poo gaioiga. Sa latou ola i le mata'u ma le popole i taimi uma ne'i fa'aeleleaina i latou. O lo latou 'alo ese mai i lo latou fetaia'i ma i latou e 'elelea', o lea na latou nonofo ese ai, e le'i gata ina latou vavae ese mai i tagata o nu'u ese, ae na fa'apena ai fo'i mai i le to'atele o o latou lava tagata, ma latou le sa'ili ai ina ia faamanuiaina i latou poo le manumaloina mai fo'i o lo latou agaga fa'auo. O lo latou manatunatu i taimi uma e fa'atatau i nei mataupu, na latou fa'aaviluina ai o latou mafaufau ma fa'apumo'omo'oina ai le ta'amilosaga o o latou olaga. O le latou fa'ata'ita'iga na lagolagoina ai le so'ona manatunatu ifo o le tagata ia te ia lava ma le musu e taliaina pe fa'aaloalo fo'i i manatu po'o talitonuga e ese mai i o latou talitonuga, i le lotolotoi a vasega uma o tagata.”—*The Desire of Ages*, 150.

b. O le a le tatou sini e tatau ona i ai i talanoaga uma ma isi? Fa'ataoto 11:30.

“E mafai ona tatou fa'aalia le afe o tama'i gaioiga iti i upu agalelei ma foliga fiafia, lea o le a toe lafoia mai i luga ia i tatou. O kerisiano e le manatunatu lelei, latou te fa'aalia e ala i lo latou fa'atalale i isi, latou te le o fa'atasi ma Keriso. E le mafai ona fa'atasi ma Keriso, ma le agalelei ai i isi ma fa'agalo ai a latou aia tatau.

“E tatau ona avea uma lava i tatou ma molimau mo Iesu. O le malosi ta'ito'atasi lea e mafai ona a'afia ai isi, a fa'apaiaina e le alofa tunoa o Keriso, e tatau ona fa'aleleia atili i le manumaloina mai o tagata i le Fa'aola. Ia va'ai le lalolagi tatou te le o manatunatu fa'apito i o tatou lava fa'anaunaga, peita'i tatou te naunau i isi ina ia latou tofusua i o tatou fa'amanuiaga ma avanoa sili ona taua. Ia latou va'ai o la tatou tapua'iga e le faia ai i tatou ia tatou le amanaia lagona o isi pe faia fo'i ni mana'oga fai fa'amalosi. Ia auauna i latou uma lava ua ta'utino mai ua latou maua Keriso, e fa'apei ona Ia auauna mo le lelei o tagata. E le tatau lava ona tatou tu'uina atu i le lalolagi le manatu sese e fa'apea, o Kerisiano o ni tagata atuatuva'e, fa'anoanoa.”—*The Adventist Home*, p. 428.

FESILI TOE FAAMANATU

1. Fa'amatala fua fa'aleagaga na fua mai e le vavega a Keriso i Kana.
2. Fa'amatala le so'otaga i le va o Keriso ma Lona tina.
3. Aisea na fa'aailoa mai ai e le pule o le tausama'aga le ofo tele?
4. O le a le ituaiga uaina e fetau lona fa'atusaliaina ai o le toto o Keriso?
5. I fa'atasiga ma isi tagata, o le a se mea e tatau ona tatou manatua mai i le fa'ata'ita'iga a Iesu?

Iesu i totonu o le Malumalu

MAU TAULOTO: “A’o Ieova o loo i totonu o Lona malumalu paia; ina fifilemu ia le lalolagi uma i ona luma” (Sapakuka 2:20).

Faitauga Fautuaina : *Testimonies for the Church, vol. 5, pp. 491–500.*

“O eleele uma o le ekalesia e tatau ona fa’ailoaina i ai le ava paia.”—*Testimonies for the Church, vol. 5, p. 494.*

1. O LE MALUMALU UA FA’ALEAGAINA

Ulua’i Aso

Ianuari 19

a. Fa’amatala le tulaga na ta’atele i totonu o le malumalu o Ierusalema i le amataga o le auaunaga fa’alaua’itele a Keriso. Ioane 2:13, 14.

“O tagata Iutaia ta’itasi uma lava na mana’omia ina ia totogiina se ’afa sekeli i tausaga ta’itasi e fai ma ‘totogi mo lona ola.’ . . . E ese mai i lenei, e tetele tupe na aumaia e fai ma taulaga ofo fua, ina ia tu’uina atu i totonu o le fale teu oa o le malumalu. Ma sa mana’omia fo’i ina ia suia tupe mai i isi atunu’u mo se tupe (coin) sa fa’aigoaina o le sekeli o le malumalu, lea sa taliaina mo le auaunaga o le malumalu. O fesuia’iga o tupe na maua ai le avanoa mo faiga le fa’amaoni ma le avefa’amalosi i auala leaga, ma sa fa’atuputeleina i le avefa’amaoni ma le avefa’amalosi i auala leaga, ma sa fa’atuputeleina i le avefa’amaoni ma le avefa’amalosi i auala leaga, ma sa fa’atuputeleina i le avefa’amaoni ma le avefa’amalosi i auala leaga. lea sa avefa’amaoni ma le avefa’amalosi i auala leaga. lea sa avefa’amaoni ma le avefa’amalosi i auala leaga.”

“O i latou na auai i fefa’ataua’iga na latou mana’omia fa’amalosi tau matua tetele lava mo manu sa fa’atauina, ma sa latou fa’asoaina a latou tupe maua fa’atasi ma le au faitaulaga ma ta’ita’i, o e sa fa’apena ona fa’amau’oaina i latou i tupe a le nu’u.”—*The Desire of Ages, 155.*

b. Na fa’aapefa ona a’afia auaunaga o le malumalu i lenei tulaga? Esekielu 22:26 (vaega mulimuli).

“Na matua tele lava manu sa fasia i le taimi o le Paseka, ma o manu na fa’atauina atu i le malumalu na matua tele lava. O le nunumi na i’u i ai, na fa’ailoa mai ai se maketi pisapisao o manu ae ua le o le malumalu paia o le Atua. Na mafai ona fa’alogoina tauofoga taufa’asese na faia ma le poto leaga, o leo o povi, o le tagi mai o mamoe, o leo malu o lupe, tu’u fa’atasia ma le tatagi mai o tupe ma fefinaua’iga ita. Na matua tele lava le nunumi o lea sa fa’alavelaveina ai i latou sa tapua’i, ma o upu na tautalagia atu i Le e Silisiliese, e le’i lagona ona o le pisapisao o finauga na osofa’ia ai le malumalu.”—*Ibid.*

2. AVA I TOTONU O LE FALE O LE ATUA

a. O le a le finagalo o le Atua e fa'atatau i le nofoaga o loo fa'aalia ai Lona fa'atasi mai—ma o le a Lana ulua'i fa'atonuga i le Mauga o Sinai? Esoto 3:1–5; 19:12, 13.

“Ina ua afio ifo Ieova i luga o le Mauga o Sinai, sa fa'apa'iaina ai le nofoaga i Lona fa'atasi mai . . . Na fa'apena ona a'oa'oina le lesona e fa'apea, so'o se mea lava e fa'aalia ai e le Atua Lona fa'atasi mai, e paia fo'i lena nofoaga.”—*The Desire of Ages*, pp. 155, 156.

b. O le a le finagalo o Keriso i le fa'aleagaina o le malumalu? Ioane 2:15, 16.

“A'o afio atu Iesu i totonu o le malumalu, na Ia maitauina ma malamalama i lea va'aiga atoa lava. Na Ia silasila i fefa'ataua'iga le faamaoni pule faamalosi. Na Ia silasila i le faanoanoa tiga o tagata matitiva, o e sa manatu, a aunoa ma le fa'amaligiina o le toto o le a leai fo'i se fa'amagaloga o a latou agasala. Na Ia silasila atu i le lotoa i fafo o Lona malumalu ua fa'aliliuina i le avea ma nofoaga o fefa'ataua'iga le paia. O le lotoa paia ua avea ma nofoaga tele lava e tasi o fefa'ataua'iga.”—*Ibid.*, p. 157.

“O le savali lemu ifo o Iesu i le sitepu, ma si'itia a'e le sasa faia i maea na ia aveina a'e i Lona ulufale atu i le lotoa, ua Ia fa'atonu atu ai i le vaega o tagata fefa'ataua'i ina ia o ese atu mai i fanua o le malumalu. O le vilivilita'i ma le to'asa tele Na te le'i fa'aalia lava muamua, na Ia fuli atu ai laulau a i latou o loo fesuia'i a latou tupe. Ua pa'u ifo le tupe, ma matua tatagi ai i luga o le foloa ma'a i'ila. E le'i i ai se tasi na loto tele e fesiligia Lana pule. E le'i i ai se tasi na loto tele e fa'atali ina ia fa'aputuputu a'e a latou oa na maua i auala leaga le fa'amaoni. E le sasaina i latou e Iesu i le sasa maea, peita'i, i Lona aao, o lena sasa faigofie e foliga mai e mata'utia e pei o se pelu afi. O le au faigaluega o le malumalu, o faitaulaga fai tala taumatemate e aunoa ma ni fa'amaoniga, o tagata o loo fa'atalanoaina fefa'ataua'iga i le va o i latou e fa'atau atu ma i latou e fa'atau mai, ma i latou e fefa'ataua'i i povi, fa'atasi ai ma a latou mamoe ma povi po'a, ua latou fa'ata'alise ese mai i le nofoaga, ma le manatu e tasi o le sola ese lea mai i le fa'asalaga o Lona fa'atasi ma i latou.”—*Ibid.*, p. 158.

c. O le a le mea na fa'ailoa mai e le gaoiga a Keriso i le fa'amamaina o le malumalu? Malaki 3:1–3.

“O lotoa o le malumalu i Ierusalem, na fa'atumulia i le ta'alili o fefa'ataua'iga le paia, na matua fa'atusalia moni atoa mai ai lava le malumalu o le loto, lea ua fa'aleagaina e ala i le i ai o tu'inanauga o lagona o le tino ma manatu le paia. I le fa'amamaina o le malumalu mai i tagata fa'atau mai ma tagata fa'atau atu, na fa'ailoa atu ai e Iesu le sini o Lana galuega ina ia fa'amamaina le loto mai i le fa'aleagaina i le agasala—mai i fa'anaunauga fa'ale'elele, o tu'inanauga fa'apito, o masaniga leaga, e fa'aleagaina ai le tagata.”—*Ibid.*, p. 161.

3. O LE FA'ATASI MAI O LE ATUA

a. O le a le ulua'i sini a le Atua i le fa'atuina o Lona afio'aga i le lotolotoi o Ona tagata? Esoto 25:8.

“O le malumalu, lea na fa'atuina e afio ai le Atua, na fuafuaina ina ia avea o se lesona autu mo Isaraelu ma le lalolagi. Na amata mai lava i tausaga o le vavau o le sini lava a le Atua le avea o meaola uma lava na foafoaina, amata mai lava i serafi pupula ma le paia e o'o lava i le tagata, ina ia avea ma malumalu mo le afio ai i totonu o le Atua-foafoa.”—*The Desire of Ages*, 161.

b. Aisea e fa'aigoaina ai tagata talitonu, o malumalu o le Atua—ma e fa'apefea ona tatau ona tatou fa'atumauiina ma le loto atoa le paia o lenei malumalu? 1 Korinito 3:16, 17; Isaia 57:15.

“Talu ai ona o le agasala, o lea na muta ai le avea o le aiga tagata ma malumalu mo le Atua. O le fa'apogisaina ma le fa'aleagaina e le ti'apolo, o le loto o le tagata ua le toe fa'aalia ai le mamalu o le Atua. Peita'i e ala i le fanau mai o le Alo o le Atua i le tino, o le sini a le lagi ua fa'ataunu'uina. Ua afio le Atua i totonu o le aiga tagata, ma e ala i le alofa tunoa e lavea'iina ai, o le loto o le tagata ua toe avea ma Ona malumalu.”—*Ibid.*

“Afai tatou te talitonu ua lata mai le i'uga o mea uma, 'O a ituaiga tagata e tatau ona i ai outou i talanoaga paia uma ma le amio atua?’

“O tagata ta'itasi uma lava e talitonu moni i le upu moni o le a ia te ia fo'i galuega o lona talitonu moni i le upu moni. O i latou uma o le a finafinau ma ava, ma le le vaivai i a latou taumafaiga ina ia manumaloina tagata ia Keriso. Afai e ulua'i totoina loloto le upu moni i totonu o o latou lava loto, o le a latou sa'ili fo'i e totoina le upu moni i totonu o loto o isi tagata. O le upu moni o loo tele lava ina teuina i totonu o le lotoa aupito i fafo. Aumai le upu moni i totonu o le malumalu aupito i totonu o le loto, ia teu le upu moni i le ogatotonu o lou loto, ma ia puleaina ai le olaga. O le upu a le Atua e tatau ona su'esu'eina ma usita'ia, ona maua loa lea e le loto le malologa ma le filemu ma le olioli, ma o fa'anaunauga o le a taula'i aga'i i le lagi; peita'i a tu'ueseia loa le upu moni mai i le olaga, i totonu o le lotoa aupito i fafo, e le o fa'amafanafanaina fo'i le loto i le afi susulu o le agalelei o le Atua.

“O le tapua'iga a Iesu, e tu'ueseina e le to'atele mo ni aso fa'apitoa, poo ni mea tutupu fa'apitoa fo'i, a'o isi taimi e tu'ueseina ma fa'atalale i ai. O le tapula'a tumau o le upu moni e le mo ni nai itula itiiti i le Sapati, poo ni nai gaioiga laiti fo'i o le alofa, peita'i e tatau ona aumaia i totonu o le loto, ma fa'alelei atili ai ma fa'apaiaina ai le amio.”—*Testimonies for the Church*, vol. 5, p. 547.

4. O LE FA'AMAMAINA O LE MALUMALU OLA

a. O le a se mea e tatau ona tatou iloa e fa'atatau i lo tatou tulaga leai se fesoasoani i lo tatou sa'ili ina ia fa'amamaina le malumalu? Ieremia 2:22; Iopu 14:4.

“E leai se tagata e mafai ona tulia i fafo i lona lava malosi, le vaega tele lava o agaga leaga ua nonofo i totonu o le loto.”—*The Desire of Ages*, p. 161.

b. O le a le mea lilo e mafai ai ona tula'i i luma o se Atua paia ma se loto ua fa'amamaina? Esekielu 36:25–27; Sakaria 3:3–5.

“O Iakopo na agasala i se agasala tele lava i lana amio ia Esau; peita'i na ia salamo. O lana solitulafono na fa'amagaloina, ma o lana agasala na fa'amama'eseina; o lea na mafai ai ona ia onosa'ia le fa'aaliga o le fa'atasi mai o le Atua. Peita'i so'o se nofoaga lava na o mai ai tagata i luma o le Atua a'o latou fa'apelepeleina ma le loto, le agasala, na fa'aumatiaina lava. I le afio fa'alua mai o Keriso o le a fa'aumatiaina ai tagata amio leaga 'i le Manava o Lona fofoga,' ma fa'aumatia 'i le pupula o Lona afio mai.' 2 Tesalonia 2:8. O le malamalama o le mamalu o le Atua, lea e foa'iina mai le ola i e amiotonu, o le a fa'aumatiaina ai tagata amioleaga.

“I aso o Ioane le Papatiso, na sauni ai Keriso e fa'aali mai o Ia o Le na te fa'aalia le amio a le Atua. O Lona lava fa'atasi mai o le a fa'aalia ai i tagata a latou agasala. Ana latou le naunau lava ina ia fa'amamaina i latou mai i le agasala, o lea na mafai ai ona latou ulufale atu i le mafutaga ma Ia. E na o i latou lava e mama o latou loto na mafai ona tumau i Ona luma.”—*Ibid.*, p. 108.

“E na o Keriso lava na mafai ona fa'amamaina le malumalu o le loto. Peita'i o le a Ia le fa'amalosia Lona ulufale mai. Na te le afio mai i totonu o le loto e fa'apei ona Ia ulufale atu i le malumalu anamua; peita'i Na te fetalai mai, 'Fa'auta, Ou te tu i le faitoto'a ma tu'itu'i atu: ai se fa'alogu mai i Lo'u leo, ma tatala mai le faitoto'a, o le a ou ulufale atu ia te ia.' Fa'aaliga 3:20. O le a Ia afio mai, e le mo na o se aso e tasi; aua ua Ia fetalai mai, 'O le a Ou nofo i totonu ia i latou, ma Ou savali i totonu ia i latou; . . . o le a fai fo'i i latou Mo'u tagata.' 'O le a Ia fa'ato'ilaloina a tatou amioleaga; o le a E lafoa'iina fo'i a latou agasala uma i mea loloto o le sami.' 2 Korinito 6:16; Mika 7:19. O Lona fa'atasi mai o le a fa'amamaina ma fa'apaia ai le tagata, ina ia avea ma malumalu paia mo le Alii, ma 'se afio'aga o le Atua e ala i le Agaga.' Efeso 2:21, 22.”—*Ibid.*, pp. 161, 162.

“A'o auauna Iesu i totonu o le malumalu i luga, o Ia lava, e ala i Lona Agaga, o le auauna a le ekalesia i luga o le fogaeleele.”—*Ibid.*, p. 166.

5. FA'AMAMAINA O LE MALUMALU I LE TAIMI LENEI

a. E fa'aapefea ona mana'omia e le Atua ta'ita'i o Ona tagata ina ia latou fa'atumauiina ma le vilivilita'i le paia o Lona fale? Sapakuka 2:20; Esekielu 44:23.

“O vaega eleele uma o le malumalu o le Atua sa tatau ona manatu e paia. Peita'i i fete'ena'iga mo oa e maua mai, o nei malamalama'aga uma na fa'agaloina uma.

“O faitaulaga ma ta'ita'i na vala'uina ina ia avea ma sui o le Atua i le malo; sa tatau ona latou fa'asa'oina mea sese sa faia i totonu o le lotoa o le malumalu. Sa tatau ona latou tu'uina atu i tagata se fa'ata'ita'iga o le fa'amaoni ma le uiga mutimutivale.”—*The Desire of Ages*, p. 156.

“E matua moni lava, o le ava mo le fale o le Atua ua toeitiiti lava a mou atoatoa ese atu. O mea paia ma nofoaga paia ua le iloa; o mea paia ma mea fa'asilisiliina fa'alelagi ua le fa'atauaina. . . . Na tu'uina mai e le Atua tulafono o fa'atulagaga, e atoatoa ona lelei ma ma'oti, i Ona tagata anamua. Ua suia ea Lana amio? E le o Ia ea o le Atua Silisiliese ma le malosi e pule i le lagi o lagi? O le a le lelei ea mo i tatou lo tatou faitauina so'o o fa'atonuga ua tu'uina atu e le Atua lava Ia, i tagata Eperu, ina ia mafai ai e i tatou, o e ua mauaina le malamalama o le upu moni mamalu o loo susulu mai i luga ia i tatou, ona tatou fa'ata'ita'iina lo latou ava mo le fale o le Atua?”—*Testimonies for the Church*, vol. 5, pp. 495, 496.

b. Fa'amatala le manumalo taua e tatau ona maua i le malosi o Keriso. Mataio 5:8; 1 Ioane 3:1–3.

“Ou te vala'au atu i tagata ta'itasi uma o loo fai mai o ia o se atalii o le Atua ina ia aua lava ne'i fa'agaloina lenei upu moni tele, le upu moni lea, tatou te mana'omia le Agaga o le Atua i totonu ia i tatou ina ia mafai ai ona tatou ausia atu le lagi, ma le galuega a Keriso i fafo atu o i tatou ina ia maua ai e i tatou se aia i le tofi o le olaga e fa'avavau.”—*Testimonies to Ministers*, p 442.

FESILI TOE FAAMANATU

1. O ai ta'ita'i o fefa'ataua'iga agasala i totonu o le malumalu?
2. O le a le uiga e tatau ona i ai i so'o se tasi e alu atu i luma o le Atua?
3. Fa'amatala le taua fa'aleagaga sa tatau ona i ai i le malumalu i Ierusalema.
4. O le a se mea na fa'ailoa mai e Keriso i le fa'amamaina o le malumalu?
5. O le a le auala e tasi e mafai ona fa'amamaina ai o tatou loto?

Fesoasoani i Fa'alavelave Tutupu i le Lalolagi

E le mafa'afesiligia, o taua, tala e fa'atatau i taua, o fa'alavelave tutupu mata'utia, mala la, lologa, afa, mafui'e, afi, ma fa'ama'i o loo matua fa'atuputeleina fa'ata'alise i se tulaga mata'utia i le lalolagi atoa—i le fa'ataunu'uina uma o valoaga o le Tusi Paia o loo tatou su'esu'eina. E mautinoa lelei, i nei fa'alavelave leaga, tatou te iloa manino ai lava la'asaga o le Atua ua latalata mai. E tele le afe ma afe o loo matua puapugatia lava mai i nei faigata mata'utia, ma valaau mai mo ituaiga fesoasoani eseese mai i sui o Iesu Keriso ina ia latou fa'aaogaina le fa'amalologa o le pulu pasama o Kiliata.

I nei lu'i tiga, ua fa'asoaina ai e le Matagaluega o le Ola Maloloina a le Koneferenisi Aoao fa'amanuiaga na aumaia mai i la tatou teugatupe e ala mai i taulaga foa'i na auina mai e outou, lo tatou au uso i le lalolagi atoa. O nei taulaga o loo auina mai e tagata ta'itasi i se auala fa'apitoa e fa'amalieina ai mana'oga, ae e ala mai fo'i i Taulaga Sapati Muamua o kuata ta'itasi. Le au uso e, o a outou taulaga ofo ua avea ma fale mo i latou ua fa'aumatia o latou fale i fa'alavelave tutupu fa'alenua; ua foa'i ai meaai mo le selau ma selau o aiga o loo tausia fanau e leai ni o latou matua ma fafine ua oti a latou tane, ma fa'alateleina atu ai le auala o le fa'atumauiina o le ola ma le fesoasoani ia i latou. O nei taulaga ofo ua fesoasoani fo'i i matua i le fa'atauina mai o fatu e toto ma fafaga ai o latou aiga pe amata ai fo'i se tama'i pisinisi ina ia mafai ai ona maua e le to'atele o tagata le mafaitaulia o lo tatou fa'atuatua, se alaga tupe maua mai ma galuega, lea semanu e le mafai ona maua mo i latou.

Fa'afetai i le Atua, o nei taimi o tofotofoga, e to'atele ua musuia ina ia tu'u a latou tupe ofo fua i luga o le fata a le Alii. Mo i latou o loo mauaina fesoasoani mai i nei taulaga ofo, matou te fa'afetai tele atu mai i le ta'ele o o matou loto!

Ae ui i lea, o mana'oga e le muta—e matua le muta lava, o loo fa'atuputeleina i aso ta'itasi, o lau foa'i la e matua tele lava le fesoasoani e maua ai.

“O le satauro o Keriso e ole mai i le loto foa'i o so'o ta'itasi o le Fa'aola paia. O le tapula'a o loo fa'aata mai ai iina o le foa'i, foa'i. O lenei tapula'a, a fa'atinoina i le agalelei loto foa'i moni lava ma galuega lelei, o le fua moni lea o le olaga kerisiano.”—*Counsels on Stewardship*, p. 14.

O le aso lenei, a'o e tu'uina atu lau taulaga ofo fa'apitoa mo le Sapati muamua, fa'amolemole ia e faia le mea e sili ina ia vi'ia ai le Atua. Pe itiiti pe tele, o tagata uma e mafai ona latou faia le mea sili latou te mafaia. Mai i le atoaga atoa o lenei alofa fa'asoaina, o le a fa'aaau ai ona tatou tufatufa atu fa'amanuiaga i o tatou au uso i le lalolagi atoa. “O le e foa'i atu i e matitiva na te fa'amanuiaina isi, ma o ia lava e fa'amanuiaina i se tulaga e sili atu” (Ibid., p. 13). Tau ina ia fa'amanuia tele le Atua ia te outou!

Matagaluega a le Koneferenisi Aoao mo le Manuia o Tagata

Iesu ma Nikotemo

MAU TAULOTO: “Na tali atu Iesu ma fa'apea atu ia te ia, E moni, e moni, Ou te fai atu ia te oe, se'ivagana ua toe fanau le tagata, e le mafai ona va'ai o ia i le malo o le Atua” (Ioane 3:3).

Faitauga Fautuaina : *Steps to Christ, pp. 67–75*

“O le vaipuna o le loto e tatau ona fa'amamaina a'o le'i mafai ona mama ona vaitafe. O le tagata o loo taumafai na te ausia le lagi e ala i ana lava galuega i le tausiana o le tulafono, o loo ia taumafai e faia se mea e le mafai ona faia.”—*The Desire of Ages*, p. 172.

1. O SE TANE ILOGA UA IA SA'ILIA IESU

Ulua'i Aso

Ianuari 26

a. O ai Nikotemo, ma o le a le manatu o le nu'u e fa'atatau ia te ia? Ioane 3:1, 10.

“O Nikotemo sa ia te ia se tofiga maualuga fa'amoemoeina i totonu o le malo o Iutaia. O ia o se tagata sa maualuga lava lana a'oa'oga, ma sa ia te ia taleni e le o ni taleni masani, ma o ia fo'i o se tasi o tagata fa'aaloogia o le fono fa'alemalo. . . . E ui lava ina ia mau'oa, a'oa'oina, ma fa'aaloogia, ae na tosinaina o ia i se uiga ese, e le Nasareta agamalu.”—*The Desire of Ages*, p. 167.

“O ia o se Faresaio mausali, ma sa ia fa'amaualuga i ana galuega lelei. Na fa'aaloogia o ia i se tulaga fa'alau'itele lava mo lona agalelei ma lona lima foa'i i le lagolagoina o le auaunaga o le malumalu, ma sa ia manatu ai ua fa'amausaliina o ia i le finagalo fiafia mai o le Atua.”—*Ibid.*, p. 171.

b. O le a le itula na alu ai Nikotemo e feiloa'i ma Iesu? Ioane 3:2 (vaega muamua).

“O le iloaina e Nikotemo o le nofoaga e malolo ai le Fa'aola i le Mauga o Olive e ala i lona tu'ufesili fa'apitoa, o lea na ia fa'atali ai se'i momoe uma le a'ai, ona ia sa'ilia loa lea o Ia.”—*Ibid.*, p. 168.

2. O LE TALANOAGA A IESU MA NIKOTEMO NA O I LA'UA

a. O le a se mea na fa'ailoaina ai le malamalama agalelei o Iesu i Lona taliaina o Nikotemo i se itula matua tuai fa'apea o le po? Salamo 31:20, 21.

“[O Nikotemo] na ia matua mana'omia lava se talanoaga ma Iesu, peita'i na ia mata'u na te sa'ili fa'aaliali ia te Ia. O le a matua fa'alumaina lava mo se ta'ita'i o tagata Iutaia lona ioeina o lona loto gatasi ma se faia'oga e le ta'uta'ua. Ma afai e iloa e le fono a Iutaia lana asiasiga, o le a taula'i mai ai i luga ia te ia lo latou fa'atauemu ma faitioga fa'aaliali. Na ia filifili i se talanoaga fa'alilolilo, ma ia faia ai se alofaga e fa'apea, afai na te alu fa'aaliali, o le a mulimuli isi i lana fa'ata'ita'iga.”—*The Desire of Ages*, p. 168.

b. Fa'amatala pe na fa'apefea ona amata e Nikotemo le la talanoaga ma Iesu. Ioane 3:2.

“I luma o Keriso, na lagona ai e Nikotemo se lagona pala'ai uiga ese, lea sa ia taumafai e natia i lalo o se ufiufi o se uiga to'a lelei ma le mamalu. ‘Rapi,’ o lana fa'amatalaga lea, ‘ua matou iloa o Oe o se Faia'oga ua afio mai i le Atua: aua e leai se tagata e mafai ona faia nei vavega o loo E faia, se'ivagana ua ia te ia le Atua.’ O lona tautala e fa'atatau i meaalofo uiga ese a Keriso i le aveva o Ia ma Faia'oga, ma Lona mana ofoofogia e faia ai vavega, na ia fa'amoemoe e folasia ai le folasaga mo fesili o lana talanoaga. O ana upu na filifilia e fa'ailoa ma vala'aulia ai le lagona o le mautinoaga ma le talitonuga; peita'i sa latou fa'ailoaina moni ai lava le le talitonu. Na te le'i ioeina Iesu e fa'apea o Ia o le Mesia, ae ua na o Ia o se faia'oga na auina mai e le Atua.”—*Ibid.*

c. O le a le manatu na fa'aofoina fa'afuase'i ai Nikotemo e Keriso? Ioane 3:3.

“E aunoa ma le ioeina e Iesu o lenei fa'afeiloa'iga, na silasila ifo Ona fofoga ia Nikotemo, e peisea'i o loo Ia faitauina lona loto tonu lava. I Lona poto le mafuatia na Ia silafiaina ai i Ona luma se o loo sa'ili mo le upu moni. Na Ia silafia le sini o lenei asiasiga, ma o se naunauta'iga ina ia fa'alolotoina atili le talitonuga lea ua i le mafaufau o le o loo fa'alologologo atu ia te Ia, na Ia aga'i tonu ai lava i le autu, ma fetalai atu ma le naunauta'i fa'amaoni, ma le agalelei, ‘E moni, e moni, Ou te fai atu ia te oe, Se'ivagana ua toe fanau le tagata mai i luga, e le mafai ona ia va'ai i le malo o le Atua.’ Ioane 3:3.

“Na sau Nikotemo i le Alii ma le manatu ina ia ulufale atu i se talanoaga ma Ia, peita'i na fofola manino atu e Iesu tapula'a fa'avae o le upu moni.”—*Ibid.*, pp. 168–171.

3. O LE FANAUFUINA

a. Na fa'apefea ona tali atu Nikotemo i le fetalaiga a Keriso e fa'atatau i le mea na ia mana'omia—ma, e fa'apei o ia, aisea tatou te mana'omia uma ai se olaga toe fanaufouina? Ioane 3:4–8.

“O le faa'tusa o le fanaufouina, lea na fa'aaoga e Iesu, e le'i fa'apea na le iloa atoa e Nikotemo. O tagata liua mai i talitonuga fa'apaupau aga'i mai i le fa'atuatuaga o Isaraelu na masani lava ona fa'atusaina i fanau fa'ato'a fananau mai. O lea, atonu na ia manatu o upu a Keriso e le'i tatau ona fa'auigaina i se uiga moni tu'usa'o. Peita'i, o lona fanau mai o ia o se tagata Isaraelu, na ia manatu ai ua mautinoa lona nofoaga i totonu o le malo o le Atua. Na ia manatu na te le'i mana'omia se suiga. O le mafuaaga lea o lona ofo tele i upu a le Fa'aola. Na ia le fiafia i le fa'atatau tonu o upu ia te ia lava. O le fa'amauualuga o le Faresaio na tauivi tete'e i le fa'anaunauga fa'amaoni o se o loo sa'ili mo le upu moni. Na ia ofo i le fetalai atu o Keriso ia te ia e fa'apei ona Ia faia, i Lona le amanaiaina o lona tofiga i le aveva o ia ma ta'ita'i i totonu o Isaraelu.

“O lona ofo tele na ia le to'a lelei ai, o lea na ia tali atu ai ia Keriso i upu na fa'ailoa atu ai se uiga na fa'afeagai ma lo latou fa'auigaina moni, ‘E fa'aapefea ona mafai ona toe fanau se tagata ina ua matua o ia?’ E fa'apei o le to'atele o isi pe a aumaia upu moni ma'ama'ai i le malamalama'aga o le mafaufau, na ia fa'aalia ai le mea moni lea, o le tagata fa'alenua na te le talia mea a le Agaga o le Atua. E leai se mea oi totonu ia te ia e tali mai i mea fa'aleagaga; aua o mea fa'aleagaga e iloa fa'aleagaga.

“Peita'i e le'i fa'afetaia'ia e le Fa'aola finauga i le finauga. O le si'itiaina ma le le lea o Lona lima i se uiga migao mamalu, na Ia fa'amanino atu ai le upu moni i se mautinoaga sili atu, ‘E moni, e moni, Ou te fai atu ia te oe, Se'ivagana ua fanau se tasi i le vai ma le Agaga, e le mafai ona ulufale atu o ia i totonu o le malo o le Atua.’ ”—*The Desire of Ages*, p. 171.

b. O afea ma e fa'aapefea ona mafai e se tagata ona toe fanaufouina? Ioane 1:12, 13.

“ ‘Ua fa'apea lava ona alofa mai o le Atua i le lalolagi, o lea na Ia foa'i mai ai Lona Alo e to'atasi,' ina ia mafai ai ona toe lelei le tagata ma le Atua. E ala i le amiotonu a Keriso e mafai ai ona toe fa'afo'i le tagata i le loto gatasi ma Lona Atua-foafoa. O lona loto e tatau ona toe fa'afouina e ala i le alofa tunoa o le Atua; e tatau ona ia maua se ola fou mai i luga. O leni suiga o le toe fanaufouina lea, a aunoa ma leni suiga, fai mai Iesu, 'e le mafai ona ia va'ai i le malo o le Atua.’ ”—*The Great Controversy*, p. 467.

“E ala [i le] gaoigaga faigofie o le talitonu i le Atua, ua toe fanaufouina ai loa e le Agaga Paia se ola fou i totonu o lou loto. Ua fa'apei oe o se tamaitiiti ua fanau i totonu o le aiga o le Atua, ma Na te alofa ia te oe e fa'apei ona Ia alofa i Lona Alo.”—*Steps to Christ*, p. 52.

4. FA'AMAMAINA MA LE TOE FANAUFUINA

a. O le a le mea o loo fa'atusalia mai ai le fa'amamaina ma le toe fa'afouina lea e aumaia fa'atasi ma le toe fanaufouina? Mareko 16:16 (vaega muamua).

“O le mana o le Atua e liua ai e mafai ona ia suia uiga na tu'ufa'asolo mai i o tatou tupu'aga, ma uiga na fausia a'e e i tatou lava; aua o le tapua'iga a Iesu e si'itiaina ai. O le 'toe fanau' o lona uiga o se liuaga, o se fanaufouina i totonu ia Keriso Iesu.”—*The Adventist Home*, p. 206.

“Ua faia e Keriso le papatisoga o se fa'aailoga o le ulufale atu i Lona malo fa'aleagaga. Ua Ia faia lenei fa'aailoga o se aiaiga lelei e tatau ona usitai i ai i latou uma lava e manana'o e ioeina o loo i lalo o le pule a le Tama, le Alo, ma le Agaga Paia. A'o le'i mafai ona maua e se tagata se aiga i totonu o le ekalesia, a'o ia le'i ulufale atu i faitoto'a o le malo fa'aleagaga o le Atua, e tatau ona ia mauaina le fa'aailoga o le suafa o le Atua, 'O Ieova la tatou Amiotonu.' Ieremia 23:6.

“O le Papatisoga o se ta'utinoga sili lea ona taua o le lafoa'iina o le lalolagi. O i latou ua papatisoina i suafa e tolu o le Tama, le Alo, ma le Agaga Paia, i le amataga lava o lo latou olaga kerisiano, ua latou fa'ailoa fa'alau'itele ua latou lafoa'ia le auaunaga ia Satani ma ua avea i latou ma tagata o le aiga tupu, o fanau a le Tupu o le lagi. Ua latou usita'i i le fa'atonuga: 'Ia outou o ese mai nai ia te i latou, ma ia outou vavae ese mai, . . . aua fo'i tou te papa'i atu i se mea leaga.' Ma ua fa'ataunu'uina ia i latou le folafolaga: 'O le a Ou talia fo'i outou, o le a fai fo'i A'u ma o outou Tama, o le a fai fo'i outou ma O'u atalii ma O'u afafine, ua fetalai mai ai Ieova o Le e Ona le malosi uma.' 2 Korinito 6:17, 18.” —*Testimonies for the Church*, vol. 6, p. 91.

b. O le a se mea ua fa'ailoa mai e fa'atatau i le leaga o lo tatou natura fa'aletagata ma le fuafuaga a le Atua ina ia suia i tatou? Ioane 3:6; Ieremia 17:9; Efeso 5:26, 27.

“E matua le mafai lava mo i tatou, i lo tatou lava malosi, ona tatou sosola ese mai i le lua o le agasala ua tatou gogoto ifo i ai. O o tatou loto e leaga, ma e le mafai ona tatou suia. . . . O a'oga, aganu'u, o le fa'atinoina o le malosi fai filifiliga, o taumafaiga fa'aletagata, o mea uma lava nei e i ai lo latou aoga, peita'i o iinei e leai ai so latou malosi. Atonu e mafai ona latou aumaia se amio sa'o i le va'aiga i fafo, peita'i e le mafai ona latou suia le loto; e le mafai ona latou fa'amamaina vaipuna o le ola. E tatau ona i ai se mana e galue mai i totonu, o se ola fou mai i luga, a'o le'i mafai ona suia tagata mai i le agasala aga'i atu i le fa'apaiaina. O lona mana o Keriso lea. E na o Lona alofa tunoa lava e mafai ona fa'aolaina tomami mate o le tagata, ma tosina atu i le Atua, i le fa'apaiaina.”—*Steps to Christ*, p. 18.

5. OLA FOU MA GAIOIGA FOU

a. O le a le feau na mana'omia e tusia mulimuli ane e aposetolo e fa'atatau i le suiga i le sini lea e aumai fa'atasi ma le fanaufouina? Kalatia 2:20; 1 Ioane 2:15–17.

“O le mana o le Atua e liua ai e mafai ona suia ai uiga leaga na tu'ufa'asolo mai i o tatou tupu'aga ma uiga leaga fo'i na fausiaina e i tatou lava; aua o le tapua'iga a Iesu e si'itiaina ai. O le 'toe fanaufouina' o lona uiga o se suiga, o se fanaufouina lea i totonu ia Keriso Iesu.”—*The Adventist Home*, p. 206.

“O [Paulo] na fa'atalitonuina e fa'apea, a mafai ona aumaia mafaufau o tagata ina ia malamalama i le taulaga ofoofogia na faia e le Tupu o le lagi, o le uiga fa'apito atoa uma o le a tafiese mai i o latou loto. Na te taula'iina muamua le mafaufau i le tulaga sa tula'i ai Keriso i le lagi, i le fatafata o le Tama; ua ia fa'aalia o Ia mulimuli ane i Lona tu'ueseina o Lona mamalu, ma tu'uina o Ia i Lona lava finagalo malie, i tulaga maua lava o le natura o le tagata, ma Ia tauaveina ai matafaioi o se auauna, ma Ia usita'i ai e o'o i le oti, ma o se oti na sili ona fa'alumaina ma leaga, na sili lona mataga, na sili le leaga o ona tiga—o le maliu lea i le satauro. E mafai ea e kerisiano ona manatunatu i lenei fa'aaliga matagofie o le alofa o le Atua i le tagata, e aunoa ma lagona o le alofa ma le iloaina, e le pule i tatou ia i tatou lava? O se Matai fa'apea e le tatau ona auauna i ai mai i se loto e le o mana'o e auauna, se loto mana'o matape'a, ma le fa'apito.”—*Testimonies for the Church*, vol. 4, p. 458.

“Ou te mana'o ou te tautala atu ia te oe e fa'apei ona fetalai atu Keriso ia Nikotemo: 'E tatau ona e toe fanau.' O i latou o loo fa'atagaina Keriso e pule i totonu o le a latou le lagonaina se fa'anaunauga ina ia latou fa'ata'ita'i i le fa'alialia vale o le lalolagi. O le a latou tauaveina i so'o se mea lava le tapula'a a Keriso, ma latou tauaveina i taimi uma le molimau a sini e sili atu ona maua, ma autu e sili atu ona mamalu, nai lo autu o loo taula'i atoatoa i ai tagata fa'alelalolagi. O o tatou ofu, o o tatou fale, o a tatou talanoaga, e tatau ona molimau uma e fa'atatau i le tu'uina atu atoatoa o i tatou i le Atua. Oka se mana o le a fa'atasi ma i latou na fa'apena ona latou fa'ailoa manino atu e fa'apea, ua latou lafoa'ia mea uma lava mo Keriso.”—*Ibid.*, vol. 5, p. 189.

FESILI TOE FAAMANATU

1. Talu ai ona o galuega lelei a Nikotemo, o le a lona manatu e fa'atatau ia te ia lava?
2. O a uiga na faia e Nikotemo i luma o Keriso?
3. O le a le uiga o le "toe fanau"?
4. E fa'apefea ona fa'ataunu'uina le fanaufouina?
5. O le a le suiga i uiga, e o'o mai ona o se i'uga lea o le fanaufouina, ma aisea?

O Musumusuga a le Agaga Paia

MAU TAULOTO: “E pei ona siitia i luga e Mose le gata i le vao, e ao fo'i ina faapea ona siitia i luga le Atalii o le tagata: Ina ia le fano se tasi e talitonu ia te ia, a ia maua e ia le ola e faavavau.” (Ioane 3:14, 15).

Faitauga Fautuaina : *Christ's Object Lessons*, p. 95–102.

“Va'ai, va'ai ia Iesu ma ola ai!”—*Christian Education*, p. 76.

1. FESILI FA'AMANATU

Ulua'i Aso

Fepuari 2

a. O le a le fesili a Nikotemo o loo fa'ailoa mai ai na fa'amaulalo lona loto? Ioane 3:9.

“Na toeitiiti lava a fetalai atu Iesu ia Nikotemo: E le o fefinaua'iga lea o le a fesoasoani ai ia te oe: e le o finauga o le a aumaia ai le malamalama i le tagata. E tatau ona e maua se loto fou, afai e leai, e le mafai ona e iloa le malo o le lagi. E le o fa'amaoniga e sili atu ona tele o le a aumaia ai oe i se tulaga tonu, peita'i o sini fou, ma vai puna fou o gaioiga. E tatau ona e toe fanaufouina. Se'ivagana ua tupu lenei suiga, ma fa'afouina ai mea uma, o fa'amaoniga e sili ona malolosi e mafai ona fa'ailoaina mai, o le a le aoga. O le fa'anaunauga o loo i totonu o lou lava loto; o mea uma lava e tatau ona suia, afai e leai, e le mafai ona e va'ai i le malo o le Atua.

“O se faamatalaga matua fa'alumaina lava lenei ia Nikotemo. . . . E le'i lava lona iloa fa'alemafau fa'aleagaga na te iloa ai le uiga o upu a Keriso. Peita'i e le'i fa'afetaia'ia e le Fa'aola le finauga i se finauga. . . .

“O ni ave o le upu moni na ati atu i totonu o le mafaufau o le ta'ita'i. O upu a Keriso na fa'atumulia ai o ia i le ofo tele, ma ta'ita'ia atu ai i le fesili, 'E fa'apefea ona mafai ona fai o ia mea?' O le vilivilita'i tele na tali atu ai Iesu, 'O oe ea o se a'oa'o o Isaraelu, ae e te le iloa ea nei mea?' O Ana upu na faailoa atu ai ia Nikotemo le lesona lea, e aunoa ma lona le fiafia i upu manino o le upu moni, ma lona fa'amalieina tu'inaanau o uiga fa'atauemu i upu fa'auiga lua, e tatau ona ia maua se manatu e matua sili atu ona agamalu e fa'atatau ia te ia lava, ona o lona le malamalama fa'aleagaga. Ae o upu a Keriso na fetalaiina atu i se uiga mamalu moni, ma o Ona fofoga ma Lona si'ufofoga na fa'ailoa mai ai se uiga vilivilita'i lava mo ia, o lea na te le'i ita ai a'o ia iloaina lona tulaga fa'alumaina.”—*Testimonies to Ministers*, pp. 368, 369.

2. SUIA O LE UIGA MASANI

a. O le a se mea na masani ona fa'amaualuluga ai Faresaio? Luka 18:9–12.

“O tagata Iutaia na vala'auina muamua i totonu o le tovine a Ieova, ma talu ai la ona o lenei tulaga o lea sa latou fa'amaualuluga ai ma ta'uamionuina e i latou i latou lava. O o latou tausaga uumi o auunaga na latou manatu ua latou maua ai le aia latou te maua ai se tau e sili atu ona tele nai lo isi. E le'i i ai se mea na sili atu ona leaga ia i latou nai lo se manatu faapea, o tagata o nu'u ese, o le a fa'atagaina i avanoa tutusa e sili ona taua fa'atasi ma i latou i mea a le Atua.”—*Christ's Object Lessons*, p. 400.

b. Na fa'apefea ona fa'aata mai e Iesu le galuega a le Agaga Paia i le loto? Ioane 3:8.

“O le matagi ua fa'alogoina i le lotolotoi o lala o la'au, o loo fa'amigoina ai lau ma fugala'au; ae e le o va'aia, ma e leai fo'i se tagata na te iloa poo fea e sau ai poo fea fo'i e alu atu i ai. E fa'apena fo'i le galuega a le Agaga Paia i le loto. E le mafai ona sili atu ona fa'amatalaina nai lo gaioiga a le matagi. O se tagata atonu na te le mafai ona ta'u mai le taimi tonu poo le nofoaga tonu, pe fa'amatalaina fo'i mea uma lava na tutupu i le fa'asologa o le liuaga; peita'i o lenei tulaga e le fa'amaonia ai e fa'apea e le'i liua o ia. E ala i se meafaigaluega e le va'aia e fa'apei o le matagi, o loo galue ai Keriso i taimi uma lava i le loto.”—*The Desire of Ages*, p. 172.

c. E fa'apefea ona fa'amausaliina musumusuga a le Agaga i totonu o le loto? Isaia 30:21; Ieremia 42:3; Mataio 16:17.

“O la'asaga iti ta'itasi, atonu e faia ma le le iloa i le na te taliaina, e faia ai a'afiaga e tosina atu ai le tagata ia Keriso. O nei musumusuga e mafai ona maua e ala i le manatunatu e fa'ataua ia te Ia, e ala i le faitauina o le Tusi Paia, pe e ala mai fo'i i le fa'alogo i le upu mai i le failauga ola. E fa'afuase'i lava, a'o afio mai le Agaga ma olega e sili atu ona tu'usa'o, e gaua'i atu ai le loto ma le fiafia ia Iesu. O lenei liuaga e fa'aigoaina e le to'atele o le liuaga fa'afuase'i; peita'i o le i'uga lea o fa'atosinaga umi e le Agaga o le Atua—o se galuega onosa'i, umi lava.”—*Ibid.*

“Ia fa'ataga o outou loto ina ia fa'aagamaluina ma fa'ato'ilaloina e le Agaga o le Atua. Ia fa'aliusuavaiina loto ma'a'a i lalo o le galuega a le Agaga.”—*Letters and Manuscripts*, vol. 12, Letter 53, 1897.

3. FA'AMAONIGA O LE FANAUFUINA

a. O fa'apefea ona fa'aalia i fafo galuega i totonu a le Agaga Paia? Kalatia 5:22–25.

“E fa'apei ona le va'aia le matagi, ae na te faia a'afiaga e va'aia ma lagonaina. E fa'apena fo'i le galuega a le Agaga i le loto o le a Ia fa'aalia Ia lava i gaioiga ta'itasi uma a le ua lagonaina lona mana e lavea'iina ai. A afio loa le Agaga o le Atua i le loto, na te fa'aliliuina ai le olaga. O manatu agasala ua tu'ueseina, o galuega leaga uma ua lafoa'ia; o le alofa, agamalu, ma le filemu ua suitulaga i le ita, fua loto leaga, ma fefinaua'iga. O le olioli ua suitulaga i le fa'anoanoa, ma o foliga ua lafoia mai ai le malamalama o le lagi.”—*The Desire of Ages*, p. 173.

b. O afea e maua ai e se tagata le fa'amanuiaga o le liuaga? Roma 10:9, 10; 1 Ioane 1:9.

“E leai se tasi na te va'aia le lima o loo si'itia le avega, pe va'ai fo'i i le malamalama e alu ifo mai i lotoa i luga. O le fa'amanuiaga e sau pe a gaua'i atu le loto i le Atua e ala i le fa'atuatua. Ona foafoaina loa lea e lena mana e le mafai ona va'aia e mata fa'aletagata, se tagata fou i le fa'atusa o le Atua.”—*Ibid.*

“Afai e te fa'atagaina le Agaga Paia na te fausia lou loto i aso ta'itasi, o le a e maua loa le iloa fa'alelagi e iloa ai le amio a le malo o le Atua. O Nikotemo na ia talia le lesona a Keriso ma avea ai loa o ia ma tagata talitonu moni.”—*Testimonies to Ministers*, pp. 369, 370.

c. E fa'apefea ona fa'aata mai e Keriso lenei liuaga? Mataio 13:33.

“O le mea fa'afefete e natia i totonu o le falaoamata na te galuea'iina ma le le va'aia e mata, ina ia aumaia ai le paluga atoa i lalo o lana galuega o le fa'afefeteina; e fa'apena fo'i, o le mea fa'afefete o le upu moni, e galue fa'alilolilo, le leoa, mausali, ina ia liua ai le tagata. O lagona fa'alenua ua fa'amaulaloina ma fa'ato'ilaloina. O manatu fou, o lagona fou, o mafua'aga, fa'anaunauga ma sini fou, ua totoina i totonu o le loto. O se tapula'a fou o le amio ua fa'atuina—o le soifuaga lea o Keriso. O le mafaufau ua suia; o tomai ua fafaguina i gaioiga i matata fou. O le tagata, e le foa'iina mai i ai tomai fou, peita'i o tomai ua ia te ia ua fa'apaiaina. O le malosai fai filifiliga e iloa ai le lelei ma le leaga, ua fafaguina. Ua foa'iina mai ia i tatou uiga o le amio e mafai ai e i tatou ona faia auunaga mo le Atua.”—*Christ's Object Lessons*, pp. 98, 99.

4. O SE ATA MASANI UA LAUILOA

a. Na fa'apefea ona fa'aatina mai e Iesu Lona fa'asatauroga? Ioane 3:14, 15.

“[Ioane 3:14, 15] O se autu lenei na masani ai Nikotemo. O le fa'atusa o le gata si'itiaina i luga na fa'amanino atu ai ia te ia le sini o le galuega a le Fa'aola. Ina ua feoti tagata o Isaraelu i le utia e gata uogo, na fa'atonu atu le Atua ia Mose ina ia faia se gata apa memea, ma tu'u a'e i luga i se la'au i le ogatotonu o le fa'apotopotoga. Ona fa'asilasila atu lea o le upu i le to'agalauapi atoa uma e fa'apea, o i latou uma o le a va'ai a'e i le gata o le a ola. Na iloa lelei e le nu'u e le'i i ai se mana o le gata lava ia e fesoasoani ai ia i latou. O se fa'atusa lea o Keriso. A'o si'itia a'e i luga mo lo latou fa'amalologa, le fa'atusa na faia fa'afoliga i gata uogo, o le a fa'apena fo'i Le na faia 'i le fa'atusa o le tino agasala' o le a avea ma o latou Fa'aola. Roma 8:3. E to'atele tagata Isaraelu na manatu o le auaunaga i manu fasia sa i ai lana amiotonu e fa'asa'olotoina ai i latou mai i le agasala. Na fa'anaunau le Atua ina ia a'oa'o atu ia i latou, e le'i i ai se aoga sili atu o le auaunaga i manu fasia nai lo lona gata apa memea. Na fuafuaina ina ia ta'ita'ia atu o latou mafaufau i le Fa'aola. Pe mo le fa'amalologa o o latou manu'a pe o le fa'amagaloina fo'i o a latou agasala, e le'i mafai ona latou faia se mea e tasi mo i latou lava, ae ua na o le fa'aailoaina o lo latou fa'atuatua i le Meaalofa a le Atua. Na mana'omia i latou ina ia latou va'ai ma ola ai.”—*The Desire of Ages*, pp. 174, 175.

b. E ui lava i le lavea'iga na tu'uina mai, aisea na oti ai nisi? 1 Korinito 10:9; Eperu 3:12.

“O le to'atele o tagata Isaraelu latou te le'i va'aia se fesoasoani i le fofu na fa'atonuina mai e le Atua. O tagata feoti ma i latou o le a feoti sa i o latou itu uma, ma sa latou iloa, a aunoa ma le fesoasoani fa'alelagi, o lo latou lava i'uga na mautinoa; peita'i na latou fa'aauau ona latou aue i o latou manu'a, o o latou tiga, o lo latou oti mautinoa, se'ia o'o ina leai so latou malosi, ma ua vaivai la latou pupula, i le taimi sa latou ono maua ai le fa'amalologa i le taimi tonu lava lona.”—*Patriarchs and Prophets*, p. 432.

c. Afai tatou te manana'o e fa'aolaina i tatou, o fea e tatau ona tatou va'ai i ai? Eperu 6:19, 20.

“O a'afiaga matautia le leaga o le agasala e fa'ato'a mafai lava ona aveesea e ala i le lavea'iga ua faia e le Atua. O tagata Isaraelu na latou lavea'iina o latou ola e ala i lo latou va'avaai i le gata si'itiaina i luga. O lona va'ai o loo fa'aailoa mai ai le fa'atuatua. Na latou ola aua na latou talitonu i le upu a le Atua, ma talitonu fa'atuatua i le auala ua Ia saunia mo lo latou fa'amalologa. E fa'apena fo'i ona mafai ona va'ai le tagata agasala ia Keriso, ma ola ai. Na te maua le fa'amagaloga e ala i le fa'atuatua i le taulaga e togilaina ai. . . . O Keriso e i ai Lona mana ma Lana amiotonu i totonu ia te Ia lava e fa'amaloloina ai le tagata agasala ua salamo.”—*Ibid.*, p. 431.

5. FA'AMAUSALIINA O LA TATOU VA'AI

a. O le a se lesona na malamalama mulimuli i ai Nikotemo tatou te mana'omia ia tatou fa'ata'ita'iina—ma teuina i o tatou mafaufau? Efeso 2:8; Luka 13:20, 21.

“E masani lava ona tula'i mai le fesili, Aisea la e matua to'atele ai i latou, o loo fai mai e talitonu i le upu a le Atua, ae e le o va'aia ai se toe fuata'iga i upu, i le agaga, ma le amio? Aisea o loo matua to'atele ai i latou e le gafatia tagata tete'e mai i a latou sini ma fuafuaga, o loo fa'aalia se uiga le paia, ma o a latou upu e saua, e fia pule, ma ita tele? O loo va'aia i o latou olaga le alofa lava lea o le tagata ia te ia lava, le tu'inauga fa'apito lava lea e tasi, le ita lava lea e tasi ma le tautala fa'ata'alise, lea o loo va'aia i le olaga o le tagata fa'alelalolagi. O le fa'amauauga fa'alialiavale ita gofie lava lea e tasi, o le gaua'i lava lea e tasi i lagona fa'alenua, o le amio loto ma'a'a lava lea e tasi, e peisea'i latou te le iloa atoa lava le upu moni. O le mafuaaga ona latou te le o liua. Latou te le'i natia le mea fa'afefete o le upu moni i totonu o le loto. E le'i i ai sona avanoa e faia ai lana galuega. O o latou uiga fa'alenua na fausia e i latou lava i le agasala, e le'i gaua'iina i lona mana e liua ai. O o latou olaga o loo fa'aalia ai e le o i ai le alofa tunoa o Keriso, ma le le talitonu i Lona mana e liua ai le amio.

“ ‘O le fa'atuatua e o'o mai i le fa'alogo, ma o le fa'alogo lea i le upu a le Atua.’ Roma 10:17. O upu o le Tusi Paia o le auala tele lava lea i le liuaina o le amio. Na tatalo Keriso, ‘Ia E fa'apaiaina i latou e ala i Lau upu moni; O Lau upu o le upu moni lea.’ Ioane 17:17. Afai e su'esu'eina ma usita'ia le upu a le Atua, e galue i totonu o le loto, ma fa'ato'ilaloina ai uiga le paia uma lava. O le Agaga Paia e sau e fa'ailoa i le tagata le agasala, ma o le fa'atuatua e puna a'e i totonu o le loto e galue e ala i le alofa ia Keriso, ma liua ai i tatou i o tatou tino, loto, ma le agaga i Lona lava fa'atusa. Ona mafai loa lea ona fa'aaoga e le Atua i tatou ina ia faia Lona finagalo. O le mana e foa'iina mai ia i tatou e galue mai i totonu aga'i i fafo, ma ta'ita'ia ai i tatou ina ia tatou fa'ailoa atu i isi le upu moni ua fa'ailoaina mai ia i tatou.”—*Christ's Object Lessons*, p. 99, 100.

FESILI TOE FAAMANATU

- 1. O le a le uiga autu o Faresaio i aso o Keriso?**
- 2. Fa'amatala pe fa'apefea ona toe fanaufouina i tatou i le fa'atusa o Keriso.**
- 3. E fa'apefea ona fa'aalia se suiga o le loto?**
- 4. Fa'amatala le fa'atusa o le gata si'itiaina i luga.**
- 5. E fa'apefea ona fa'aalia e le fa'ataoto e faatatau i le mea faafefete, le tuputupu a'e i le alofa tunoa?**

Iesu ma Ioane lē Papatiso

MAU TAULOTO: “E ao ona tupu pea o Ia, peita'i a'u nei, e tatau ona fa'aitiitia o a'u” (Ioane 3:30).

Faitauga Fautuaina : *Testimonies for the Church, vol. 5, pp. 721–729.*

“O Ioane le Papatiso na fa'ailoa mai e lo tatou Fa'aola o ia e sili i perofeta uma. Ae e matua tele lava se eseese i le va o le gagana a lenei tagata o le Atua ma le gagana a le to'atele o loo ta'utino mai o i latou o auauna a lo tatou Fa'aola. Ina ua fesiligia Ioane po o ia o le Keriso, na ia fa'ailoa mai e le aoga o ia ona ia tatalaina nonoa o se'evae o lona Matai.”—*Testimonies for the Church, vol. 5, p. 224.*

1. O SE FA'AFITAU LI I LE LOTOLOTOI O LE AU SO'O

Ulua'i Aso

Fepuari 9

a. O le a le fesili na tulai mai i le lotolotoi o so'o o Ioane ma tagata Iutaia? Ioane 3:25.

“O so'o o Ioane na va'ava'ai ma le loto leaga i le fa'atupula'ia o le ta'uta'ua o Iesu. Na latou tulai sauni e faitio i Lana galuega, ma e le'i umi ae latou maua loa le avanoa. O se fesili na tula'i mai i le va o i latou ma tagata Iutaia pe na aoga le papatisoga e fa'amamaina ai le tagata mai i le agasala; na latou fa'atumauina lo latou talitonuga fa'apea, o le papatisoga a Iesu na ese mai i le papatisoga a Ioane. E le'i umi ae latou finau loa ma so'o o Keriso e fa'atatau i ituaiga upu e fetau i le fa'aaogaina i le papatisoga, ma le aia a Iesu na te papatisoina ai tagata.”—*The Desire of Ages, p. 178.*

b. Na fa'apefea ona fa'ailoa e so'o o Ioane lo latou ita loto leaga i le galuega a Keriso—ma o le a le tali lelei na ia tu'uina mai? Ioane 3:26, 27.

“Sa ia Ioane i lona natura, sese ma vaivaiga na masani ai le aiga tagata, peitai o le pa'i mai o le alofa fa'alelagi na liua ai o ia. Na ia nofo i se si'omaga e le'i fa'aleagaina i le loto fa'apito ma fa'anaunauga malolosi mo oa e maua mai, ma matua sili a'e ona maua nai lo le manogi leaga o le uiga fua loto leaga. Na te le'i fa'aalia se alofa i uiga le fiafia o ona so'o, ae na ia fa'ailoa mai na ia malamalama manino lava i lana so'otaga i le Mesia, ma lona taliaina fiafia o Le na ia saunia mo Ia le ala.”—*Ibid., p. 179.*

2. O LE GALUEGA A IOANE

a. Na fa'apefea ona fa'ailoa e Ioane na ia malamalama i le sini o Lana galuega? Ioane 3:28, 29.

“Na fa'ailoa atu e Ioane ia lava o le uo lea sa gaiou i le avea ma ave feau i le va o le taupou ma le ali'i lea ua uma ona fa'amaui, ma saunia ai le ala mo le fa'aipoipoga. A talia loa e le fa'ato'a fai ava lana fa'ato'a nofo tane, ua fa'ataunu'uina ai loa iina le galuega a le uo. Na ia olioli i le fiafia o i la'ua na ia lagolagoina le la fa'atasiga. Na fa'apena ona valaauina Ioane e fa'asino tagata ia Iesu, ma o lona olioliga lona molimauina o le fa'amanuiaga o le galuega a le Fa'aola.”—*The Desire of Ages*, p. 179.

b. Fa'amatala le galuega a Ioane—ma le tatou galuega. Ioane 1:23, 29.

“O le va'ava'ai atu i le fa'atuatua i le Fa'aola, na si'itia a'e ai Ioane i le maualuga o le fa'afitia o ia e ia lava ma le fa'asatauroina o ona mana'o. Na te le'i sa'ili e tosina mai tagata ia te ia lava, ae ia si'itia a'e o latou manatunatuga ia sili atu ma atili sili atu ona maualuga, se'ia o'o ina latou malolo i le Tama'i Mamoe a le Atua. O ia ua na o se leo, o se e alaga i le vao. A'o lenei o le olioli tele na ia taliaina ai le gugu ma le le iloa o ia e tagata, ina ia mafai ai ona liliu atu mata o tagata uma i le Malamalama o le ola.

“O i latou e fa'amaoni i lo latou valaauina e avea ma avefeau mo le Atua o le a latou le sa'ilia le mamalu mo i latou lava. O le alofa o le tagata mo ia lava o le a fa'aumatia i le alofa mo Keriso. E leai se fa'atautava o le a fa'aleagaina ai le galuega pele o le tala lelei. O le a latou iloa o le latou galuega le folafolaina atu, e fa'apei ona faia e Ioane le Papatiso, 'Fa'auta i le Tama'i Mamoe a le Atua, Na te aveesea le agasala a le lalolagi.' Ioane 1:29. O le a latou si'itia a'e Iesu, ma o le a si'itia a'e ai fo'i le aiga tagata fa'atasi ma Ia. 'Ua faapea ona fetalai mai o Le ua Maualuga ma ua Silisili o Le afio e fa'avavau, o Lona suafa e Paia; Ou te nofo i le mea maualuga ma le paia, ma te nonofo foi ma le ua momomo ma ua maulalo lona loto, e faamafanafana i e ua loto maulalo, ma faamafanafana i loto o e ua loto momomo.' Isaia 57:15.”—*Ibid.*, pp. 179, 180.

“Aua le sailia lou lava fiafia ma lou fa'afifilemu, ae ia e saili ina ia e iloa ma faia le finagalo o le Atua. Ia fesili ifo tagata uma ta'itasi, E le mafai ea ona ou fa'asinoina atu se tagata i le Tama'i Mamoe a le Atua, o Le na te aveesea le agasala a le lalolagi? E le mafai ea ona ou fa'amafanafana i se o loo fa'anoanoa ma leai se fa'amoemoe? E le mafai ea ona avea a'u ma auala o le lavea'iga o se tagata i totonu o le malo o le Atua? Tatou te manaomia musumusuga loloto a le Agaga o le Atua i totonu o o tatou loto, ina ia le gata ina mafai ona tatou fa'amausaliina mo i tatou le ofu pa'epa'e, ae ia mafai fo'i ona o'o atu lo tatou a'afiaga i isi ina ia tusia ai o latou igoa i totonu o le tusi o le ola, ma le toe soloieseai lava.”—*Historical Sketches*, p. 140.

3. O LE MEAALOFA A LE AGAGA

a. O le a le manatu o le to'atele o tagata i le feau a Keriso? Ioane 3:32.

“O so'o o Ioane na fai mai o tagata uma na o mai ia Keriso; peitai o le malamalama sili atu ona manino, na fai atu ai Ioane, 'E leai se tasi na te talia Lana molimau; na matua to'aitiiti lava na sauni e talia o Ia o lo latou Fa'aola e lavea'ia i latou mai i le agasala. Peitai 'o le ua talia Lana molimau ua na faailoa lana taofi, e faamaoni lava le Atua.' Ioane 3:33, R.V.”—*The Desire of Ages*, p. 181.

b. O ai e foa'i mai i ai le meaalofa o le Agaga Paia? Ioane 3:34.

“E fa'ato'a tatou maua lava le malamalama o le lagi a'o tatou naunau e lafoa'i ese mai ia i tatou o tatou lava ala ma fa'anaunauga. E le mafai ona tatou iloa le amio a le Atua, pe talia fo'i Keriso e ala i le fa'atuatua, se'ivagana ua tatou ioe i le pulea, taofia, ma le fa'atoilaloina o manatu ta'itasi ia usita'i atu ia Keriso. Ia i latou uma lava e faia lenei tulaga e foa'iina mai i ai le Agaga Paia e aunoa ma le fuaina. O totonu ia Keriso o loo 'nofo ai le tumu atoatoa o le Atua i le tino, ua fa'aatoatoaina fo'i outou i totonu ia te Ia.' Kolose 2:9, 10, R.V.”—*Ibid.*

c. O fa'apefea ona fa'aalia atili mai i totonu o le Tusi Paia le ki i le mauaina o se vaega sili atu ona tele o le Agaga Paia? Ioane 14:15–17; Galuega 5:32.

“E le gata ina tatau ona tatou fa'apea ane, 'Ou te talitonu,' ae e tatau fo'i ona tatou fa'atinoina le upu moni. O le liua atu i le finagalo o le Atua i a tatou upu, o uiga o o tatou foliga, o a tatou amio, lea tatou te fa'amaonia ai le tatou so'otaga ma Ia. So'o se taimi lava e lafoa'ia ai e se tasi le agasala, o le soliga lea o le tulafono, o lona olaga o le a aumaia i le gauai atu i le tulafono, i le usitai atoatoa ona lelei. O le galuega lenei a le Agaga Paia. A su'esu'eina ma le fa'aeteete le malamalama o le upu, o le leo o le malamalamaaga fai filifiliga, o musumusuga a le Agaga, e foafoaina ai i totonu o le loto le alofa fa'amaoni ia Keriso, o Le na foa'iina atoa mai o Ia e Ia lava ina ia toe fa'atau atu ai le tagata atoa, o le tino, loto, ma le agaga. Ma o le alofa e fa'aalia i le usita'i. O le laina o le eseese o le a manino ma maoti i le va o i latou e alolofa i le Atua ma taus i Ana poloaiga, ma i latou e le alolofa ia te Ia ma latou le amanaiaina Ana fa'atonuga.”—*Testimonies for the Church*, vol. 6, p. 92.

4. O LE TAUA O LE PAPATISOGA

a. Aisea e taua ai le malamalama i le la'asaga o loo tatou faia mo Keriso pe a tatou filifili ina ia papatisoina i tatou? Ioane 3:36.

“A aunoa ma Keriso, o le papatisoga, e fa'apei o soo se isi lava sauniga, o se gaoiga fa'afoliga le aoga lea.” - *The Desire of Ages*, p. 181.

“E le manaomia se finauga pe o le papatisoga a Keriso poo le papatisoga a Ioane e fa'amamaina ai mai i le agasala. O le alofa tunoa o Keriso lea e foa'iina le ola i le tagata.”—*Ibid.*

“E na o totonu lava ia Keriso e mafai ona maua ai le ola e fa'avavau. Na fetalai mai Iesu: ‘O le e talitonu i le Alo ua ia te ia le ola e fa'avavau: a'o le e le talitonu i le Alo o le a le va'ai o ia i le ola.’ Ioane 3:36. O tagata ta'itasi uma lava o le a ia maua lenei fa'amanuiaga le mafuatia lona tau pe afai o le a ia gauai i aiaiga. O i latou uma lava 'e saili e ala i le onosa'i tumau i galuega lelei mo le matagofie silisiliese ma le mamalu ma le ola e fa'avavau,' o le a latou maua le 'ola e fa'avavau.’ Roma 2:7.”—*The Great Controversy*, p. 533.

“O le papatisoga o se lafoa'ia sili lenei ona vilivilita'i o le lalolagi. O i latou e papatisoina i le suafa o le Tama, le Alo, ma le Agaga Paia, i le amataga lava o lo latou olaga fa'akerisiano, ua latou fa'asilasila fa'alaua'itele mai ua latou lafoa'ia le auunaga a Satani ma ua avea i latou ma tagata o le aiga tupu, o fanau a le Tupu i le lagi.”—*Testimonies for the Church*, vol. 6, p. 91.

b. Fa'amatala upu e ofo ai, a Ioane le Papatiso lea sa fa'aalia ai le loloto o olaga-moni ua tu'uina atu atoatoa i le Atua, lea ua fa'atusalia mai e le papatisoga? Luka 3:7, 8.

“Na tu'u e Ioane le to'i i le a'a o le la'au. Na ia a'oa'iina le agasala, ma le le fefe i ona i'uga, ma saunia le ala mo le Tama'i Mamoe a le Atua.

“Na a'afia Herota a'o ia fa'alogo atu i molimau malolosi tu'usa'o a Ioane, ma o le naunau loloto o lea na ia fesili ai poo le a le mea e tatau ona ia faia ina ia avea ai o ia mona so'o. Na iloa e Ioane o lea o le a ia fa'aipoipo atu i le ava a lona uso, a'o ola pea lana tane, ma na ia fa'atonu fa'amaoni atu ia Herota o lenei tulaga e le'i tusa ai ma le tulafono.”—*Early Writings*, p. 154.

“O Ioane le Papatiso na ia fa'afetaia'ia le agasala i le a'oa'iga fa'aaliali i tane o galuega maualalo ma tane e maualuluga o latou tikeri. Na ia fa'a'iloa atu le upu moni i tupu ma ali'i, pe o le a latou fa'alogo pe te'ena fo'i le upu moni. Na ia tautala manino tu'usa'o atu ia i latou ta'ito'atasi.”—*Selected Messages*, bk. 2, p. 149.

5. O SE AUALA POTO

a. Ina ua silafia e Iesu sa taumafai Faresaio e foafoa se fa'afitauli i le va o Ia ma Ioane, o le a le mea na Ia faia? Ioane 4:1–3.

“Na silafia e Iesu o le a le tu'ua [e Faresaio] ni taumafaiga ina ia foafoaina ai se vaeluaga i le va o Ona lava so'o ma so'o o Ioane. Na Ia silafia na amata ona afuafua mai le afa lea o le a tafieseai ai le tasi o perofeta silisili ua fa'apea ona tu'uina mai i le lalolagi. O Lona mana'o e 'alo ese mai i avanoa uma mo le le malamalama po o le le loto gatasi fo'i, o lea na Ia fa'amutalia gugugu ai Ana galuega, ma alu ese atu loa i Kalilaia. O i tatou fo'i, a'o tatou fa'amaoni i le upu moni, e tatau ona tatou taumafai e alo ese mai i mea uma lava o le a ta'ita'ia atu ai i le le loto gatasi ma le le femalamalama'i. Aua o taimi uma lava e tula'i mai ai nei fe'eseesea'iga, e i'u lava i le leiloa ese atu o agaga. Soo se taimi lava e tutupu ai fa'afitauli e ono tulai mai ai vaeluaga, e tatau lava ona tatou mulimuli i le fa'ata'ita'iga a Iesu ma Ioane le Papatiso.”—*The Desire of Ages*, p.181.

b. O le a se mea e tatau ona tatou a'oa'oina mai i le uiga o Ioane ina ia fa'aitiitia fete'enaiga? Ioane 3:30.

“E fa'apei o so'o o Ioane, e to'atele e manatu o le manuia o le galuega e fa'alagolago lea i le ulua'i tagata faigaluega. O mafaufau ua taula'i atu i le tagata ae ua le o le Atua, o le fua loto leaga ua sau i totonu, ma o le galuega a le Atua ua fa'aleagaina. O le ua fa'apena ona so'ona fa'amamaluina i se tulaga le tatau ua fa'aosoosoina o ia ina ia teufatuina le lagona fa'alagolago ifo ia te ia lava. Na te le iloa lona fa'alagolago i le Atua. O tagata ua a'oa'oina ina ia fa'alagolago i le tagata mo le ta'ita'iga, ma fa'apena ona latou pa'u'u atu ai i le sese, ma ta'ita'ieseina ai mai i le Atua.

“O le galuega a le Atua e le tatau ona tauaveina ai le fa'atusa ma le igoa o le tagata. Mai i lea taimi i lea taimi o le a aumaia ai e le Atua i totonu meafaigaluega eseese, lea e mafai ona sili atu ona fa'ataunu'uina ai Ana fuafuaga. O ni tagata fiafia lava i latou e naunau ina ia fa'amaulaloina i latou lava, ma fa'apea ifo fa'atasi ma Ioane le Papatiso, 'E tatau ona tupu pea o Ia: peitai a'u nei, e tatau ona fa'aitiitia.' ”—*Ibid.*, p. 182.

FESILI TOE FAAMANATU

1. Aisea na loto leaga ai so'o o Ioane i le galuega a Keriso?
2. O le a se mea na fa'asilasila atu e Ioane i ona so'o?
3. O le a le sini e foa'iina mai ai le meaalofa o le Agaga Paia?
4. E fa'apefea ona fa'ataunu'uina e le papatisoga lona sini moni?
5. O le a le mea na faia e Iesu ma Ioane ina ua la iloa le lamatiaga o se fa'afitauli i le va o o la so'o?

Iesu ma le Fafine Samaria

MAU TAULOTO: “A o sē inu i le vai o le a Ou avatu ia te ia, o le a le toe fia inu lava ia; a'o le vai o le a Ou avatu ia te ia, o le a avea i totonu ia te ia o se vaipuna, e puna i luga i le ola e faavavau.” (Ioane 4:14).

Faitauga Fautuaina : *Testimonies for the Church, vol. 4, pp. 384–387.*

“O le na te saili e fa'amalie lona fia inu i vaipuna o lenei lalolagi o le a na ona ia inu ina ia toe fia inu ai. Soo se mea lava, o loo i ai tagata e le o fa'amalieina. Latou te fa'ananau mo se mea e fa'amalie ai le manaoga o le loto. E na o le Tasi lava Le e mafai ona fa'amalieina lena manaoga. O le manaoga o le lalolagi, ‘O le Fa'anaunauga o malo uma,’ o Keriso lea.”—*The Desire of Ages*, p. 187.

1. O IESU I SUKARA

Ulua'i Aso

Fepuari 16

a. I Lana malaga i Kalilaia, o fea na malolo ai Iesu ma Ona so'o? Ioane 4:5, 6.

“A'o nofo Iesu i tafatafa o le vaieli, na Ia vaivai ona o le fia 'ai ma le fia inu. O le malaga talu mai le taeao sa umi, ma o lenei, o le la o le aoauli na vevela mai i luga ia te Ia. O Lona fia inu na fa'atupulaia e le manatu e fa'atatau i le vai malu e fa'afouina ai, lea na matua lata ane, ae e le'i mafai ona ia ava'e ai se vai; aua e le'i i ai sana maea poo sana fagu fo'i e utu ai vai, ma sa loloto le vaieli. O le fia inu fa'aletagata na o'o mai ia te Ia, ma na Ia fa'atali mo se tasi e sau e asu a'e le vai.”—*The Desire of Ages*, p.183.

b. O ai na sau i le vaieli, ma o le a se mea na ole atu ai Iesu ia te ia—ma o le a se mea e tatau ona tatou a'oa'oina mai iinei? Ioane 4:7.

“O le feitaga'i i le va o tagata Iutaia ma tagata Samaria na taofia ai le fafine mai i lona ofoina atu o se agalelei ia Iesu; peitai na saili le Fa'aola na te maua le ki i lenei loto, ma o le tomai na fanau mai i le alofa o le Atua, na Ia fesili ai, ae Na te le'i ofoina atu, se gaoiga agalelei. O le ofo atu o se gaoiga agalelei atonu na teena; peitai o le talitonu na fafaguina ai le talitonu. O le Tupu o le lagi na afio mai i lenei fafine tuliese, ma ole atu mo se auaunaga mai ia te ia. O Le na faia le sami, ma puleaina vai o le sami loloto, ma tatalaina vaipuna ma vaitafe o le eleele, na malolo mai i lona vaivai i le vaieli o Iakopo, ma sa ia fa'alagolago atu i le agalelei o se tagata ese mo le meaalofa o se vai taumafa.”—*Ibid.*, p. 184.

2. O SE ITUAIGA VAI ESE

a. Na fa'apefea ona taulai e Iesu le mafaufau o le fafine i le meaalofa o le fa'aolataga? Ioane 4:10.

“O le vai sa fetalai agai i ai Keriso o le fa'aaliga lea o Lona alofa tunoa i totonu o Lana upu; o Lona Agaga, ma Lana a'oa'oga, e fa'apei o se vaipuna e fa'amalieina ai, i tagata ta'itasi uma. O isi vaipuna uma lava o le a latou sa'ili atu i ai, o le a fa'amaonia lo latou le malilie ai. Peita'i o le upu o le upu moni e fa'apei o vaitafe malu, o loo fa'atusalia mai e fa'apei o vai o Lapanona, lea e fa'amalieina ai i taimi uma lava. O loo i totonu ia Keriso le tumu atoatoa o le olioli e fa'avavau.”—*Testimonies to Ministers and Gospel Workers*, p. 390.

b. O le a le lagona o le fafine i le ofo a Keriso? Ioane 4:11, 12.

“O le malamalamaaga o le fafine na te le'i iloa ai le uiga o le fetalaiga a Keriso; na ia manatu sa Ia fetalai e fa'atatau i le vaieli sa i o la luma.”—*The Spirit of Prophecy*, vol. 2, pp. 140, 141.

c. Na fa'apefea ona fa'ailoa mai e Iesu le eseesea i le va o le tasi ituaiga vai ma le isi—ma e fa'apefea ona tatau ona fa'amanuiaina foi i tatou i lenei feau? Ioane 4:13, 14; Fa'aaliga 22:17.

“E tatau ona tatou teufatuina le alofa ma le agaga fa'afetai, e tatau ona tatou va'ava'ai ia Iesu ma liua ai i Lona fa'atusa. O le iuga o lenei liuga o le a fa'atuputeleina ai lo tatou mautinoa, faamoemoe, onosai, ma le loto tele. O le a tatou inu ai i le vai o le ola lea sa fetalai atu ai Keriso i le fafine Samaria. Na ia fetalai atu: ‘Ana e iloa le meaalofa a le Atua, ma Le o loo fai atu ia te oe, Aumai se'i O'u inu; semanu o le a e ole mai ia te Ia, ma o le a Ia foa'i atu ia te oe le vai ola. . . . A o sē inu i le vai o le a Ou avatu ia te ia, o le a le toe fia inu ia e faavavau; a'o le vai o le a Ou avatu ia te ia, o le a avea i totonu ia te ia o se vaipuna, e puna i luga i le ola e faavavau.’ O lenei vai o loo fa'atusa mai ai le ola o Keriso, ma o tagata ta'itasi uma e tatau ona ia maua e ala i lona sau i totonu o se sootaga ola ma Ie Atua. O le mautinoaga filemu, agamalu, tumu i le agaga fa'afetai o le a avea o se tapulaa tumau i totonu o le loto. O le mata'u le talitonu o le a tafieseina i luma o le fa'atuatua ola. O le a tatou manatunatu loloto i le amio a Le na uluai alofa mai ia i tatou.”—*Testimonies to Ministers and Gospel Workers*, p. 226.

3. VAI OLA

a. Na fa'apefea ona fa'ailoa e le fafine Samaria na te le'i malamalama pea i upu a Keriso? Ioane 4:15.

“O le alofa tunoa lea e na o Ia lava e mafai ona foa'iina mai, e fa'apei o le vai ola, e faamamaina, faafouina, ma faamalosia ai le tagata.

“E le'i fa'ailoa maia e Iesu le manatu e faapea e na o le tasi lava le inu i le vai o le ola ma o le a lava lena mo le tagata o loo inuina. O le e tofo i le alofa o Keriso o le a fa'aaauu lona faananau atu mo le alofa lava lea; ae na te le saili mo se isi lava vai. O oa, mamalu, ma fiafiaga o le lalolagi e le tosina i ai o ia. O le alaga i taimi uma a lona loto o lenei, Toe aumai lena vai e sili atu mai ia te Oe. Ma o Le na te fa'aalia i le tagata lona manaoga, o loo Ia fa'atali e fa'amalie lona fia ai ma lona fia inu. O taumafaiga uma lava fa'aletagata ma mea o loo ia faalagolago i ai, o le a toilalo. O fausaga uma e tali ai vai o le a matutu, o faaputuga o vai ua mamago; a'o lo tatou Faaola o Ia o se vai puna e le muta. E mafai ona tatou feinu, ma toe feinu, ma maua pea e fa'avavau se vai fou. O le o loo afio ai i totonu Keriso o loo i totonu ia te ia le vaipuna o le faamanuiaga— ‘o se vaieli lea e puna a'e i le ola e faavavau.’ E mafai ona ia maua mai ai le malosi ma le alofa tunoa e lava lelei mo ona manaoga uma lava.”—*The Desire of Ages*, 187.

b. E faapei o le fafine Samaria ma i latou na nonofo fa'aletumau i le vao i le o ese mai i Aikupito, e fa'apefea ona masani lava ona tatou le iloina le alofa tunoa matagofie o loo tafe mai ia Keriso? Salamo 78:15, 16, 19, 20 (vaega muamua); 114:7, 8.

“Na taia e Mose le papa, peitai o le Alo o le Atua lea sa ufitia i le ao fa'aniutu, sa tulai i tafatafa o Mose, ma fa'atafe mai le vai e maua ai le ola. E le gata ia Mose ma toeaiina, peitai o le fa'apotopotoga atoa lava sa tutu mamao mai, na latou va'aia le mamalu o Ieova; peitai ana fa'apea e aveesea le ao, semanu ua fa'aumatiaina i latou e le pupula matautia o Le sa afio ai iina.”—*The Patriarchs and Prophets*, p. 298.

“O le fa'atasi mai o Keriso tumu i le alofa tunoa i totonu o Lana upu, o loo fetalai atu lava i le tagata i taimi uma, o loo fa'atusalia ai o Ia o le vaieli o le vai ola e fa'afouina ai le tagata fia inu. O lo tatou avanoa sili ona taua lo tatou mauaina o se Faaola soifua, tumau. O Ia o le puna o le mana fa'aleagaga ua totonu i totonu ia i tatou, ma o Lona aafiaga o le a tafe mai i upu ma gaioiga, fa'afouina ai tagata uma lava o loo i totonu o le si'omaga o lo tatou a'afiaga, ma fanauina ai i totonu ia i latou faanaunauga ma finafinauga mo le malosi ma le olaga mama, mo le fa'apaiaina ma le filemu, mo lena foi olioli e le aumaia ai se faanoanoa. O le iuga lenei o se Faaola o loo afio i totonu.”—*Testimonies to Ministers and Gospel Workers*, p. 390.

4. UA AMATA ONA FA'AALIA E IESU IA LAVA

a. O le a le mataupu fou na fa'ailoa atu e Iesu i Lana talanoaga ma le fafine Samaria—ma o le a lana tali? Ioane 4:16, 17 (vaega muamua).

“O lenei ua liliu fa'afuasei e Iesu le talanoaga. A'o lei mafai ona maua e lenei tagata le meaalofa na Ia naunau e foa'i atu, e tatau ona aumaia o ia ina ia ia iloaina lana agasala ma lona Faaola. Ua Ia 'fetalai atu ia te ia, Alu, valaau i lau tane, ma e sau iinei.' Na ia tali mai, 'E leai sa'u tane.' Na fa'apena ona ia faamoemoe e taofia fesili uma lava e tuuina atu e faatatau i lena mataupu.”—*The Desire of Ages*, p. 187.

b. Na faapefea ona fa'aopoopo Iesu i Lana tali—ma o le a se mea e fa'amanatu mai e lenei tulaga e fa'atatau i mea uma lava Na te silafia e faatatau ia i tatou uma ta'ito'atasi? Ioane 4:17 (vaega mulimuli), 18; Salamo 139:7, 8, 11, 12.

“O le silisiliese o le Atua, tatou te le malamalama i ai. ‘O le nofoalii o Ieova o loo i le lagi lea' (Salamo 11:4); peitai e ala i Lona Agaga o loo i ai o Ia i so'o se mea lava. Na te silafia lelei lava, ma Na te naunau foi, i galuega uma a Lona aao.”—*Education*, p. 132.

“O agelu o le lagi latou te auiliiliina le galuega ua tuuina mai i o tatou lima; ma o le gaioiga ua liliu ese ai mai i tapulaa o le upu moni, o le ‘mamasagia' ua tusia ai i totonu o fa'amaumauga.”—*Child Guidance*, p. 155.

“O le tulafono a le Atua e o'o atu i lagona ma mafua'aga o manatu uma, e faapena ai foi ma gaioiga i fafo. Na te faaalua mea lilo o le loto, ma faasusulu atu le malamalama i luga o mea sa tanumia muamua i le pogisa. E silafia e le Atua manatu ta'itasi, o sini ta'itasi, o fuafuaga taitasi, o mafuaaga uma e ala ai ona faia e se tagata se mea. O tusi a le lagi e fa'amaumauina agasala na semanu e fa'ataunuuina pe ana faapea e i ai se avanoa. O le a aumaia e le Atua galuega ta'itasi uma lava i le faamasinoga, faatasi ai ma mea lilo ta'itasi uma. O Lana tulafono Na te fuaina ai le amio a tagata ta'itasi uma. E faapei ona siitia atu e le tagata tusi ata vaega ma'oti o foliga o le tagata i le ie e tusi ai ata, e faapena foi vaega ta'itasi o amioga ta'itasi e siitia atu i tusi a le lagi. O loo i le Atua se ata atoatoa ona manino o amio a tagata ta'itasi uma, ma o lenei ata Na te fa'atusatusaina i Lana tulafono. Na te fa'aalia i le tagata uiga leaga o loo fa'aleagaina ai lona olaga, ma valaau atu ia te ia ina ia salamo ma liliu ese mai i le agasala.”—*The SDA Bible Commentary*, [E. G. White Comments], vol. 5, p. 1085.

5. UA FA'AALIA E IESU O IA O LE FAAOLA

a. O le a le mea na iloa mulimuli e le fafine i le vaieli e faatatau ia Iesu? Ioane 4:19. Na lava ea lenei iloa?

“Na tetemu le fafine sa fa'alogologo mai. O se lima lilo na su'eina itulau o le talaaga o lona olaga, ma fa'ailoa mai ai mea ia sa ia fa'amoemoe e natia e faavavau. O ai Le na mafai ona faitaulia mea lilo o lona olaga? Na o'o mai ia te ia manatunatuga o le olaga e faavavau, o le faamasinoga oi lumanai, o le a faaalua ai mea uma lava ia o loo natia i le taimi lenei. I lona malamalama, na fafaguina ai le malamalamaaga o le mafaufau.

“E le'i mafai ona ia teena se mea e tasi; peitai sa ia taumafai e alo mai i le talanoaina o se mataupu e matua le manaia i le faalogo. O le ava loloto tele, na ia fai mai ai, ‘Alii e, Ua ou iloa o Oe o se perofeta.’ O lona faamoemoe la ina ia faaguguina lona talitonuga, o lea na ia liliu atu ai i mataupu o finauga faale-tapuaiga. Ana faapea o se perofeta lenei, e mautinoa na mafai ona Ia tu'uina atu ia te ia faatonuga e faatatau i nei mataupu ua leva ona finauina.”—*The Desire of Ages*, pp. 187, 188.

b. Ina ua faaalua e le fafine le faamoemoe i le afio mai o le Mesia, o le a le fetalaiga a Iesu ia te ia? Ioane 4:25, 26.

“O le valaaulia o le tala lelei e le tatau ona fa'apumoomooina, ma e na o se vaega to'aititi filifilia e fa'ailoa atu i ai, o e, tatou te manatu, o le a faamamaluina ai i tatou pe a latou taliaina le valaaulia o le tala lelei. O le feau e tatau ona tu'uina atu i tagata uma. Poo fea lava e matala mai ai loto ina ia latou talia le upu moni, ua sauni foi Keriso e faatonu i latou. Na te faaalua atu ia i latou le Tama, ma le ituaiga tapuaiga e taliaina e Ia o Le e faitauina le loto. O tagata faapea, Na te le faaaogaina i ai ni faataoto. Ia i latou, e faapei ona Ia fetalai atu i le fafine i le vaieli, 'O A'u Le o loo tautala ma oe, o Ia lena.' ”—*The Desire of Ages*, p. 194.

FESILI TOE FAAMANATU

1. Aisea e le'i faia ai lava e Iesu se vavega mo Ia lava?
2. O le a le mea na faaoga e Iesu e taitaia atu ai le fafine Samaria i le tala lelei?
3. O le a le fetalaiga a le Matai e faatatau i le vai o le ola?
4. Aisea na ta'ua ai e Keriso le olaga o le fafine Samaria?
5. Ta'u mai se folafolaga e fesootai ma le afio mai o le Mesia.

Nofoaga Autu mo A'oga a "Fanau o Amioga Lelei" i Romania

“O le a'oa'oga o talavou a'o laiti e masani lava ona fausia ai a latou amio mo le olaga atoa.”—*Testimonies for the Church*, vol. 3, p. 135

O loo ta'u mai e le Agaga Paia e faatatau i se mea na tupu e fa'alototeleina ai, ina ua faia e le "fa'atasiga a le fanau, poo le A'oga Fa'ata'ita'i Fa'ale-Tusi Paia a le fanau iti, se galuega lelei. O lesona o loo tuuina atu o loo toe a'oa'oina e le fanau i totonu o o latou aiga, ma faailoa ai e tina lo latou naunau e ala i le saunia faamamaina o le fanau mo le aoga. O le toatele o i latou o fanau ia a matua e le talitonu faatasi ma i latou.”—*Evangelism*, p. 583.

O le Nofoaga Autu a le A'oga a "Fanau o Amioga Lelei" na ulua'i faatuina i le 2019 i Fagaras, o se aai i luga o le mauga i Romania. O fanau i le va o le 2 ma le 5 tausaga o loo a'oa'oina ai i se tulaga matagofie iinei. E ese mai i a'oa'oga e faapitoa mo tausaga o tamaiti, latou te a'oa'oina tala o le Tusi Paia, ia latou iloa tatalo, ma pepese ma ia latou faia le Atua ma a latou Uo. E o'o lava i le laiti o o latou tausaga, latou te malamalama o le Atua o loo pule, ma, latou te a'oa'o foi latou te aoi atu ia te Ia mo le fesoasoani mo o latou faafitauli. O a latou amio o loo fausiaina mai i lea aso i lea aso. E ala i le alofa tunoa o Keriso e mafai ai ona tatou vaaia liuaga iloga i olaga o nei fanau iti. Mo le lumanai, matou te mananao e a'oa'oina i latou e le o mafai ona a'oa'oina ona o le le lava o le tupe ma meatotino e mana'omia.

I le ulua'i tausaga na matou amata ai i tamaiti e 12; i le tausaga lona fa na o'o atu i le 32 tamaiti, o le 31 o i latou e o mai mai i ekalesia i fafo atu. O le taimi nei, o a'oga o loo faia i totonu o potu e 4 ua fa'aavanoa mai i le Nofoaga Autu a le Iuni a Romania, peitai o nei potu ua faamaonia mai ua matua to'atele tele tamaiti i le potu e tasi ona o manaoga mo tamaiti e fia fa'aa'o'oga ai iinei, ua le mafai ona ofi i potu. E ala i lenei tulaga, tatou te malamalama e finagalo le Atua ia i tatou ina ia fa'aauau ma fausia a'e lenei a'oga matagofie ma faapena ona fesootai atu i tamaiti e to'atele lava ma o latou aiga i le tulaga e mafai ona faia ai. O le 2021, na faatauina ai se fasi eleele i fafo atu o le aai ma na matou maua pemitā e manaomia ina ia amata ai le galuega o le fausiaina. O lenei la ua uma ona folasia le faavae. Ua matou matua faafetai lava i le Atua i Lona pa'i atu i o outou loto—ia te outou ua lagolagoina le galuega e o'o mai i lona tulaga ua i ai nei ma outou o le a matua foa'i i le taimi lenei. O la outou meaalofa, o le a outou foa'iina atu ai i fanau e le iloa le Atua se avanoa e fa'alatalata mai ai ia te Ia ma latou maua ai se a'oa'oga faakerisiano. Matou te ole atu i lo outou agalelei, ma, matou te mautinoa o le a outou tali mai, ma lagolago mai i matou ina ia aumaia ai lenei galuega i se taunuuga fa'amanuiaina ma tauaveina i matou i a outou tatalo.

O o outou tuagane ma uso mai i le Iuni a Romania.

O le Fanau Mai o se Misionare

MAU TAULOTO: “Tou te le o fai ane ea, E toe fa masina, ona o'o ai lea i le seleselegāsaito; faauta, Ou te fai atu ia te outou, ina tepa ae ia o outou mata, ma vaavaai i le fanua; aua ua pa'epa'e mai nei ina ia seleseleina” (Ioane 4:35).

Faitauga Fautuaina : *Testimonies for the Church, vol. 5, pp. 182–187*

“Na amata ona talepe i lalo e Iesu le pa puipui i le va o tagata Iutaia ma tagata o Nu'u ese, ma tala'i atu le faaolataga i le lalolagi. E ui lava ona o Ia o se tagata Iutaia, na Ia feoa'i saoloto ma tagata Samaria, ma faaleaogaina ai aganuu faafaresaio a Lona malo.”—*The Desire of Ages*, p. 193.

1. OLA FOU, O AUTU FOU E SILI ONA TAUA

Ulua'i Aso

Fepuari 23

a. O le iloaina e le fafine Samaria o Iesu o le Mesia lea, o le a le mea na ia faia i le taimi lava lea? Ioane 4:28, 29.

“Na faatumulia le fafine i le olioli tele a'o ia faalogo atu i upu a Keriso. O lea faaaliga ofoofogia na toetiiti lava a le mafai ona ia onosa'ia. O lona tuua o lana fagu e utu ai vai, o lea na toe fo'i atu ai i le aai, ina ia avatu le feau i isi. Na silafia e Iesu le mafuaaga na ia alu ai. O le tuua o lana fagu vai na tautala manino mai lava i le aafiaga o Ana upu. O le faanaunauga finafinau lava o lona loto, le mauaina mai o le vai ola; o lea na galo ai ia te ia le mafuaaga na alu ai i le vaieli, na galo ia te ia le fia taumafa o le Faaola, lea sa ia manao e faamalieina. O lona loto na faatumulia i le fiafia, o lea na ia faataalise atu ai i lona ala, ina ia fa'ailoa atu i isi le malamalama taua na ia maua.”—*The Desire of Ages*, p. 191.

b. O le a le mea na faia e tagata o Sukara ina ua latou faalogo i le molimau a se tasi o o latou tagata nu'u? Ioane 4:30.

“O upu [a le fafine] na pa'i atu i o latou loto. Sa i ai ni uiga fou i ona foliga, o se suiga i lona tagata va'aia atoatoa lava i fafo. Na latou naunau e vaai ia Iesu.”—*Ibid.*

2. O LE SELESELEGA MA I LATOU E SELESELEINA

a. A'o silasila atu Iesu i tagata o Sukara o o mai, o le a sana fetalaiga i Ona so'o? Ioane 4:35–38.

“‘O le e selesele,’ o Lana fetalaiga lea, ‘na te maua le totogi, ma faapotopoto mai fua e o'o atu ai i le ola e faavavau: ina ia olioli faatasi ai le e lulu ma le e selesele. Ma o iinei ua moni ai lenei faaupuga, o le Tasi e lulu, a'o le isi e selesele.’ O iinei ua faasino mai ai e Keriso le auaunaga paia o loo nofo aitalafu ai i le Atua i latou e taliaina le tala lelei. E tatau ona avea i latou ma Ana mea faigaluega ola. Na te manaomia le latou auaunaga ta'ito'atasi. Ma, pe tatou te lulu pe selesele foi, o loo tatou galulue mo le Atua. O le tasi na te faasalalauina le fatu; a'o le isi na te faaputuina mai i totonu le seleselega; ma o le e lulu ma le e selesele la te maua uma o la totogi. La te olioli faatasi i le tau i o a la galuega.”—*The Desire of Ages*, pp. 191, 192.

b. O le a le aafiaga o le molimau a le fafine e faatatau ia Keriso—ma o le a se mea e mafai ona tatou a'oa'oina mai i le aafiaga na faia ai? Ioane 4:39.

“A faatasia atu i tatou ia Keriso, ua ia i tatou le mafaufau o Keriso. O le olaga mama ma le alofa e susulu mai i le amio, o le agamalu ma le upu moni e puleaina le olaga. O uiga tonu lava o foliga ua suia. O Keriso o loo afio i totonu o le loto Na te aumaia se mana e liua ai, ma o foliga i fafo na te molimau atu i le filemu ma le olioli o loo pule aoao i totonu. Tatou te inuina le alofa o Keriso, e faapei ona aumaia e le lala le meaai mai i le vine. Afai ua faapipi'i atu i tatou i totonu ia Keriso, afai o le filo i lea filo ua fa'atasia atu ai i tatou i le Vine Ola, o le a tatou tu'uina atu le faamaoniga o lena tulaga e ala i le fuaina o taufuifui taumasuasua o fua ola. Afai o loo tatou feso'ota'i atu i le Malamalama, o le a avea i tatou ma auala o le malamalama, ma o a tatou upu ma galuega o le a tatou lafoia atu ai le malamalama i le lalolagi. . . .

“O loo tatou vaavaai tatou te liua ai; ma a'o tatou manatunatu i le atoatoaga o le Tapula'a fa'alelagi, o le a tatou fa'anaunau ina ia tatou liua atoatoa, ma faafouina i le faatusa o Lona olaga mama. O le faatuatua i le Alo o le Atua lea e faia ai le liuaga i le amio, ma o le tamaitiiti o le toasa ua avea ma atalii o le Atua. Ua ia pasi mai i le oti agai atu i le ola; ua avea o ia ma tagata fa'aleagaga ma ua iloaina mea faaleagaga. O le poto o le Atua e faamalamalamaina ai lona mafaufau, ma na te silafia mea matagofie i totonu o Lana tulafono. A'o liua se tagata ona o le upu moni, o le galuega o le liuaga o le amio e aga'i pea i luma.”—*Selected Messages*, bk. 1, pp. 337, 338.

3. O LE I AI O IESU I SAMARIA

a. O le a le olega na tuuina atu e tagata Samaria ia Iesu—ma aisea? Ioane 4:40.

b. Fa'amatala le iuga o le taimi sa i ai Keriso i Samaria. Ioane 4:41.

“I upu na fetalaia atu i le fafine i le vaieli, sa luluina ai fatu lelei, ma na matua vave lava ona maua le seleselega. O tagata Samaria na o mai ma faalogo ia Iesu, ma talitonu ia te Ia. O lo latou lolofi faataamilo atu ia te Ia i le vaieli, na latou tu'ufesili atu ia te Ia, ma na latou talia ma le naunau Lona fa'amatalaina o mea e tele sa lilo ia i latou. A'o latou faalogo, na amata ona matafi ese lo latou nunumi le malamalama. O i latou sa faapei o ni tagata sa i totonu o le pogisa tele lava na latou mulimuli a'e i se ave faafuase'i o le malamalama se'ia o'o ina latou o'o i le ao. Peita'i e le'i faamalieina i latou i lenei talanoaga. Na latou mananao ina ia fa'alogu atu pea i Ana fetalaiga, ma ia faalogo foi a latou uo i lenei faia'oga ofoofogia. Na latou valaauliaina o Ia ia maliu atu i lo latou aai, ma aoi atu ia te Ia ia nonofo pea ma i latou. E lua aso sa nofo ai o Ia i Samaria, ma e matua to'atele atu isi tagata na talitonu ia te Ia.”—*The Desire of Ages*, p. 192.

“Na faaalua atu e Keriso le Atua i Ona so'o i se auala na faataunuuina ai i totonu o o latou loto se galuega faapitoo, e faapei o le galuega lea ua leva ona Ia augani mai ia i tatou ia tatou faatagaina o Ia Na te faia i totonu o o tatou loto. O loo toatele ua leiloa ese mai ia i latou le iloa e faatatau i le mana ola o le faataitaiga a le Faaola. Ua latou le iloa o Ia, o se tagata faigaluega agamalu, ma le faafitia o ia e ia lava. O le mea latou te manaomia o lo latou vaavaai lea ia Iesu. Tatou te manaomia i aso taitasi le faaaliga o Lona faatasi mai.”—*Reflecting Christ*, p. 302.

c. O le a se mea na faailoa mai e le toatele o tagata Samaria ina ua uma ona latou talia Iesu o Ia o le Mesia? Ioane 4:42.

“Na inoino Faresaio i le olaga faigofie o Iesu. Na latou le amanaia Ana vavega, ma na latou manana'o mai mo se faailoga e iloa ai o Ia o le Alo o le Atua. Peitai o tagata Samaria latou te le'i manana'o i se faailoga, e le'i faia foi e Iesu ni vavega i le lotolotoi o i latou, se'ivagana ai le fa'aalia atu o mea lilo o le olaga o le fafine ia te ia i le vaieli. Ae e toatele na talia o Ia. I lo latou olioliga fou na latou fai atu ai i le fafine, ‘O lenei ua matou talitonu, e le ona o lau upu: aua ua matou faalogo lava i matou ia te Ia, ma ua matou iloa o le Keriso lava lenei, le Faaola o le lalolagi.’ ”—*The Desire of Ages*, pp. 192, 193.

4. O LE MANA O VALOAGA

a. O le a le valoaga na faavae i ai e tagata Samaria lo latou faatuatua i le Mesia na folafolaina mai? Kenese 49:10.

“Sa talitonu tagata Samaria o le a afio mai le Mesia o Ia o le Faaola, e le gata o Ia o le Faaola o tagata Iutaia, ae o Ia fo'i o le Faaola o le lalolagi. Na valoia mai o ia e le Agaga Paia e ala mai ia Mose e faapea o Ia o le perofeta na auina mai i le Atua. Na faailoa mai e ala mai ia Iakopo e faapea, o le a faapotopoto atu tagata ia te Ia; ma sa faailoa mai foi e ala mai ia Aperamo, oi totonu ia te Ia o le a manuia ai malo uma o le lalolagi. O mau nei sa faavae ai le faatuatua o tagata o Samaria i le Mesia. Talu ai ona o tagata Iutaia na latou faauigaseseina perofeta na mulimuli atu, ma latou fa'atatauina ai le mamalu o le toe afio fa'alua mai o Keriso i Lona ulua'i afio mai, o lea na ta'ita'ia ai tagata Samaria ina ia latou faaleaogaina tusitusiga paia uma lava seivagana ai tusitusiga na tuuina mai e ala mai ia Mose. Peitai a'o tafiese e le Faaola nei fa'auigaga sese, e toatele na taliaina valoaga mulimuli ane ma upu a Keriso lava Ia e faatatau i le malo o le Atua.”—*The Desire of Ages*, p. 193.

b. O le a se mea e mafai ona tatou a'oa'oina i le taimi lenei mai i le uiga loto matala o tagata Samaria i le upu moni? Failaūga 11:4, 5.

“O itu uma o le lalolagi o tane ma fafine o loo va'avaai a'e ma le faanaunau i le lagi. O tatalo ma loimata ma fesili o loo alu a'e i luga mai i tagata o loo saili mo le malamalama, mo le alofa tunoa, ma le Agaga Paia. E toatele ua latalata ina ulufale atu i le malo, o loo na ona fa'atalitali lava ina ia fa'apotopotoina mai i totonu.”—*The Acts of the Apostles*, p. 109.

c. O le a se tulaga e o'o i ai tagata ta'ito'atasi pe a latou talia moni lava Keriso? Aumai faataitaiga. Mareko 5:18–20; 7:31–37.

“O le Agaga o [Keriso] o le a fausiaina ai i totonu o le tagata malosi uma lava o le a faaleleia ai le amio ma faamamaluina ai le natura. O le a fausiaina a'e ai i luga le tagata mo le viiga o le Atua i le tino ma le loto ma le agaga. . . . Ma o tagata ua faaleagaina i le avea ma meafaigaluega a Satani, o loo faaliliuina pea e ala i le mana o Keriso ia avea ma avefeau a le amiotonu, ma auina atu e le Alo o le Atua e ta'u atu 'mea tetele ua faia e Ieova mo oe, ma ua Ia alofa atu ia te oe.’ ”—*The Desire of Ages*, p. 341.

5. MISIONARE KERISIANO

a. O a lesona tatou te a'oa'oina mai i le fafine Samaria? 1 Ioane 1:1–3; 2 Korinito 5:14 (vaega muamua).

“O le taimi lava na maua ai e le fafine Samaria le Faaola, na ia aumaia loa isi tagata ia te Ia. Na ia faamaonia o ia o se misionare sili atu ona aoga nai lo Ona lava so'o. E le'i i ai ma se mea na vaaia e le au so'o i Samaria e faailoa mai ai o se laueleele lea e faalototeleina ai. O o latou manatu sa taulai atu i se galuega tele e tatau ona faia i le lumanai. Latou te le'i iloa, o o latou itu uma o se seleselega lea e tatau ona faapotopotoina mai. Peitai, e ala atu i le fafine lea sa latou inosia, na aumaia ai se aai atoa lava e faalogo atu i le Faaola. Na ia avatua le malamalama i le taimi lava lena i tagata o lona malo.

“O lenei fafine o loo faatusalia mai le galuea'iina o se faatuatua faatinoina i totonu ia Keriso. O so'o moni ta'itasi uma lava, ua fanau atu i totonu o le malo o le Atua e avea ma misionare. O le e inu i le vai ola ua avea fo'i o ia ma vaipuna o le ola. O le ua taliaina le vai ola ua avea fo'i o ia o se tasi na te foa'iina atu le vai ola. O le alofa tunoa o Keriso i totonu o le loto e faapei o se vaipuna i totonu o le eleele toafa, o loo puna a'e e toe faafouina ai tagata uma, ma vilivilitai ai i latou ua sauni e fano, ina ia latou inu i le vai o le ola.”—*The Desire of Ages*, p. 195.

b. E faapefea ona tatau ona faamalosi i tatou i le aso lenei i lenei tulaga? Failaūga 11:6.

“Tatou te le manaomia tatou te o i atunuu ese ina ia avea ai i tatou ma misionare mo le Atua. O i latou uma lava o loo i o tatou itu uma o laufanua ia ua 'papa'e uma ina ia seleseleina,' ma, so'o se tasi lava e mana'o ai, e mafai ona ia faapotopoto mai 'fua e o'o atu ai i le ola e faavavau.' Ua valaau le Atua i le toatele i Battle Creek o e o loo aga'i ina feoti i le paie faaleagaga ina ia latou o i nofoaga o loo mana'omia ai la latou galuega i totonu o Lana galuega. Ia outou o ese ma siitia ese mai i Battle Creek, tusa lava pe afai e te manaomia ai lou faasatauroina o oe lava i mea tau tupe. Alu i se isi nofoaga ina ia faia ai oe o se faamanuiaga i isi. Alu i se nofoaga e mafai ona e faamalosi ai i se ekalesia vaivai. Ia fa'aaoga malosi ua foa'i atu e le Atua ia te oe.”—*Testimonies for the Church*, vol. 5, p. 187.

FESILI TOE FAAMANATU

1. O le a le mea na faia e le fafine ina ua ia iloa o Iesu e na o Ia lava le Faaola?
2. Faamatala poo le a le uiga o fanua ua pa'epa'e mai mo le seleselega.
3. E fia aso na nofo ai Iesu faatasi ma tagata Samaria?
4. O le a le molimau na faia e tagata Samaria e faatatau ia Iesu?
5. O le a le mea e tupu i tagata i le taimi lava latou te talia ai Iesu i o latou olaga?

Iesu ma le Atalii o le Tasi Ali'i

MAU TAULOTO: “Ia ia te Ia o Le na te mafaia ona faia o mea uma e faasilisili lava i mea tatou te ole atu ai ma mafaufau i ai, e tusa ma le mana o loo matuā galue i totonu ia te i tatou, Ia ia te Ia le viiga i totonu o le ekalesia e ala ia Keriso Iesu i augatupulaga uma, e faavavau faavavau lava. Amene.” (Efeso 3:20, 21).

Faitauga Fautuaina : *Testimonies for the Church, vol. 9, pp. 107, 108, 164–166.*

“Tatou te le talitonu ona tatou te vaai pe lagona fo'i o loo faafofoga mai le Atua ia i tatou. E tatau ona tatou talitonu i Ana folafolaga. A tatou o mai ia te Ia i le faatuatua, o olega taitasi e ulufale atu i le finagalo o le Atua. Afai ua uma ona tatou ole atu mo Lana faamanuiaga, e tatau ona tatou talitonu ua tatou mauaina, ma tatou faafetai atu ia te Ia ina ua tatou *maua* le faamanuiaga. E tatau loa ona tatou feoa'i solo i o tatou tiute, ua faamautinoaina o le a maua le faamanuiaga i le taimi e sili ona tatou mana'omia ai.”—*The Desire of Ages*, p. 200. [Author's emphasis.]

1. TAULA'IINA O LE MAFAUFAU

Ulua'i Aso

Mati 2

a. Ina ua uma ona nonofo Iesu ma tagata Samaria i aso e lua, o fea na afio atu i ai Iesu—ma o ai na tosina i lenei tala? Ioane 4:43–46.

“O le tala e faatatau i le toe maliu atu o Keriso i Kana na vave ona salalau solo i Kalilaia, ma aumaia ai le faamoemoe i e sa puapuagatia ma mafatia. I Kapanauami o tala na tosina i ai le mafaufau o se alii Iutaia o se tagata faigaluega i le auunaga a le tupu.”—*The Desire of Ages*, p. 196.

b. Aisea na alu ai le ali'i lea e talanoa ia Iesu? Ioane 4:47.

“O se atalii o le alii lenei sa mafatia i se mafatiaga na foliga mai o se ma'i na le mafai ona togafitia. O foma'i na latou tu'ua o ia ia oti; peitai ina ua faalogo le tama e faatatau ia Iesu, na ia naunau e saili fofo mai ia te Ia.”—*Ibid.*, p. 197.

2. O SE FAAILOGA O LE MASALOSALO

a. Faamatala pe na faapefea ona faaalua e Keriso le tiga i totonu o le loto o lea alii na sailia o Ia ina ia faaamalolo i lona atalii i Kapanaumi. Ioane 4:48.

“O le tamaitiiti na matua vaivai lava, ma, na popole, ne'i ia fo'i mai ua maliu; peitai na manatu le alii lea e tatau ona alu pea ia e faailoa le ma'i o lona atalii ia Iesu. Na ia faamoemoe o tatalo ma aioiga a se tama atonu o le a fafaguina ai le agalelei o le Foma'i Silisili.

“O lona taunuu atu i Kana na ia maua ai le motu o tagata o si'omia mai Iesu. O se loto popole na ia fa'aofiofi atu ai agai atu i luma o le Faaola. O lona faatuatua na faavaivaia ina ua ia va'aia na o se tane ofu faigofie, e palapala ma le vaivai i faigamalaga. Na ia faalotolotua pe mafai e lenei Tagata ona faia le mea lea sa ia sau e ole atu ai ia te Ia; ae sa mafai ona ia faamausaliina se talanoaga ma Iesu, ma ta'u atu le mafuaaga na sau ai, ma aioi atu i le Faaola ia la o atu i lona aiga. Peitai o lona faanoanoa ua uma ona silafia e Iesu. A'o ia le'i tu'ua lona fale, na silafia e le Faaola lona mafatiaga.

“Peitai na Ia silafia foi, sa faia e le tama i totonu o lona lava mafaufau, ni aiaiga e faatatau i lona talitonuga ia Iesu. E se'ivagana ua taliina mai lona manaoga, o le a ia le talia o Ia o le Mesia. . . .

“E ui lava i faamaoniga uma lava e iloa ai o Iesu o Ia o le Keriso, o lenei tama aioi na ia finafinau ina ia faia lona talitonuga ia te Ia o se aiaiga mo le taliina mai o lona manaoga.”—*The Desire of Ages*, pp.197, 198.

b. A faaososoina i tatou ina ia tatou saili mo faailoga, o le a se mea e tatau ona tatou manatua? Mataio 12:38, 39.

“Na tiga Keriso aua o Ona lava tagata, o e na tuuina atu i ai Poloaga Paia, ua latou le faalogo i le si'ufofoga o le Atua o fetalai mai ia i latou i totonu i Lona Alo.”—*Ibid.*, p. 198.

“O le nu'u sa mananao i se faailoga, e faapei o aso o Keriso. O le taimi lena na fetalai atu le Alii ia i latou e leai se faailoga e tu'uina atu ia i latou. O le faailoga lea e tatau ona faaalua i le taimi lenei ma taimi uma lava, o le galuega lea a le Agaga Paia i le mafaufau o le faia'oga, ina ia faamamafa atu ai le taua o le Upu. O le Upu a le Atua e le o se manatu mate, ma mago, ae o le agaga ia ma le ola. E leai se mea e sili atu ona mana'o i ai Satani nai lo le taula'i ese o mafaufau mai i le Upu, ina ia vaavaai atu ma faatalitali atu ai mo se mea i fafo atu o le Upu ina ia latou lagonaina.”—*Selected Messages*, bk. 2, p. 95.

3. UIGA FETE'ENA'I

a. Faamatala le eseesea i le va o tagata Iutaia ma tagata Samaria e faatatau i lo latou talitonuga ia Iesu. Mareko 6:2–6; Ioane 4:40–42.

“Na matua sa'ili ma le vilivilitai le au Faresaio ina ia faamaonia o Keriso o Ia o se tagata taufaasese! Na latou mata'itu i Ana upu ta'itasi, ma latou saili ai e faasese ma fa'auigasese Ana fetalaiga uma lava! O le faamaualuga ma le faailoga tagata ma le ita tele na tapunia ai ala uma lava o le loto i le molimau a le Alo o le Atua. Ina ua Ia a'oa'iina manino a latou amioga leaga ma faailoa atu o a latou galuega na faamaonia ai o i latou o fanau a Satani, na latou lafo mai ma le ita tele le tu'ua'iga, fai mai, ‘E le ua tonu ea la matou upu, o Oe o le Samaria, o loo ia te Oe fo'i le temoni?’ ”—*Selected Messages*, bk. 1, p. 70.

“Na faatusatusa e le Faaola lenei uiga le talitonu tu'ufesili ma le faatuatua faigofie o tagata Samaria, o e e le'i fesili mai mo se vavega poo se faailoga foi. O Lana Upu, le faamaoniga lea i taimi uma lava e iloa ai o Ia o le Atua, sa i ai lona mana e fa'atalitonuina ai lea na o'o atu i o latou loto.”—*The Desire of Ages*, p. 198.

“E ui lava ona o [Iesu] o Ia o se tagata Iutaia, ae na Ia feoa'i sa'oloto ma tagata Samaria, ma fa'aleaogaina ai aganu'u fa'a-Faresaio a tagata Iutaia e faatatau i lenei nu'u o tagata inosia. Na Ia moe i totonu o o latou fale, sa Ia tausami i a latou laulau 'ai, ma a'oa'o i o latou auala.”—*The Acts of the Apostles*, p. 19.

b. Faamatala le iloa o le toatele ua tautalagia le upu moni mo le taimi lenei ia i latou o loo ta'utino mai o i latou o tagata o le Atua, i augatupulaga uma. Ieremia 20:8–11.

“O finauga uma lava na una'iina mai ia Keriso, na fafauina uma i faamatalaga sese. Na faapena foi i le mea na tupu ia Setefano, ma Paulo. Peitai o faamatalaga sili ona vaivai ma sili ona le faamaonia na faia i le itu sese sa i ai lona a'afiaga, aua sa matua toatele lava tagata e le'i fa'apaiaina o latou loto, sa manana'o i na faaupuga ina ia moni. O tagata faapena e naunau lava i taimi uma ina ia fa'apipi'i mau atu so'o se sese oi totonu ia i latou e tautalagia atu ia i latou le upu moni lea latou te le fiafia i ai.

“E le tatau ona tatou ofo pe a pu'eina ma le matape'ape'a faamatalaga leaga taumatemate e avea ma mea moni, e i latou e fiafia i le fa'atupuina o faamatalaga taufa'asese. O i latou sa tete'e ia Keriso na fa'anunumiina ma fa'aguguina so'o e le poto o Ana upu; peitai na latou fa'alogo pea ma le vilivilitai i tala fe'avea'i le fa'amaonia, ma latou maua ai se mafua'aga leaga e toe tu'ufesili atu ai ia te Ia i fesili tete'e.”—*Selected Messages*, bk. 1, pp. 70, 71.

4. O SE OLEGA I LE AGAMALU

a. Ina ua taofi mau atu le faatuatua o le auauna alii ia Keriso, na faapefea ona ia toe fa'amamafaina mai lana olega? Ioane 4:49.

“E faapei o le emo a se malamalama, o upu a le Faaola i le tagata na folasia manino mai ai lona loto. Na Ia silafia o ana faufauga i lona sailia o Iesu, o ni faufauga faapito. O lona faatuatua fa'alotolotolua na fa'aalia ia te ia i lona uiga moni. I lona mafatia loloto na ia iloa ai o lona faalotolotolua atonu o le a aveesea ai le ola o lona atalii. Na ia iloa sa i ai o ia i luma o le na mafai ona faitauina manatunatuga, ma o Ia fo'i na mafai ai mea uma. . . . O lona faatuatua na taofimau atu ia Keriso e faapei ona faia e Iakopo, ina ua ia alaga a'o la tauivi ma le agelu, ‘O le a ou le tu'ua lava Oe, seivagana ua E faamanuia mai ia te a'u.’ Kenese 32:26.”—*The Desire of Ages*, p. 198.

b. O le a se mea e tatau ona tatou a'oa'oina mai i le mea na faia e Iesu e aunoa ma lona afio atu i le fale o le tagata? Ioane 4:50.

“Sa ia Iesu se meaalofo sili atu e foa'i atu. Na Ia finagalo, ina ia le gata ia faamalolo le tamaitiiti, ae ia tofusua ai fo'i le alii lenei ma lona aiga i faamanuiaga o le faaolataga, ma ia tutuina se malamalama i totonu o Kapanauami, lea o le a vave ona avea ma laufanua o Ana lava galuega. Peitai e tatau ona iloa e le tagata lona manaoga a'o le'i mafai ona ia mana'omia le alofa tunoa o Keriso. O lenei tagata faigaluega a le tupu na faatusalia mai ai le to'atele o tagata o lona malo. Sa latou naunau ia Iesu ona o mafuaaga faapito. Na latou faamoemoe e maua mai ni faamanuiaga faapitoa e ala i Lona mana, ma na latou tuuina atu lo latou faatuatua i le maua mai o lenei faamanuiaga fa'aletumau; peitai latou te le'i iloa lo latou ma'i fa'aleagaga, ma latou te le'i malamalama i lo latou manaomia o le alofa tunoa. . . .

“O le Faaola e le mafai ona Ia vavae ese mai i le tagata e pipi'i atu ia te Ia, ma aioi mai mo lona manaoga tele. ‘Alu ia oe,’ o Lana fetalaiga lea; ‘ua ola lou atalii.’ Na tu'ua e le tagata le Fa'aola ma se filemu ma se olioli na te le'i iloa lava muamua. E le'i gata sa ia talitonu o le a fa'amaloloina lona atalii, peita'i o le mautinoaga malosi lava na ia talitonu ai ia Keriso o Ia o le Fa'aola.”—*Ibid.*, pp. 198, 199.

“Tatou te manaomia uma lava tali vave tu'usa'o i a tatou tatalo, ma e faaososoina i tatou ina ia tatou faavaivai pe a fa'atuai mai le tali pe o'o mai fo'i i se tulaga tatou te le'i manatunatu i ai. Peitai e matua poto lava le Atua ma matua lelei lava o lea Na te le taliina mai ai a tatou tatalo i taimi uma lava i le taimi tonu lava tatou te manana'o ai ma le uiga moni tatou te manana'o ai. O le a Ia faia mea e tele atu ma sili atu ona lelei mo i tatou nai lo le na o le faataunuaina o o tatou manaoga uma lava. . . . O nei mea uma e tofotofoina ai lo tatou faatuatua e mo lo tatou lelei.”—*The Ministry of Healing*, pp. 230, 231.

5. FOFO MA LE FAAOLATAGA

- a. Na faapefea ona faamalolo e Iesu le atalii o le tagata? Ioane 4:51–53. O le a le mea moni e faamanatu mai e lenei faamalologa? Efeso 3:20, 21.**

“O le sekone tonu lava na taofimau atu ai e le faatuatua o le tama le mautinoaga lea, ‘Ua ola lou atalii,’ na pa'i atu ai foi le alofa fa'alelagi i le tamaitiiti o le a oti.”—*The Desire of Ages*, p. 199.

“O le itula lava lena o i latou sa leoleo i tafatafa o le tamaitiiti o le a oti i totonu o le fale i Kapanami, na latou vaaia ai se suiga faafuase'i uiga ese. O le pogisa o le oti na si'itia ese mai i foliga o le tamaitiiti puapuagatia. O le vevela o le fiva na suitulaga ai le pupula matagofie o le ola maloloina ua toe faafo'isia. O mata vaivai ua toe pupula mai i le potu, ma o le malosi ua toe fo'i mai i le tino vaivai, pae'e. E le'i i ai ni fa'ailoga o le ma'i na toe tumau i le tamaitiiti. O lona tino vevela ua toe malu ma susu, ma na ia moe ai loa i se moe filemu. Na tu'ua e le fiva o ia i le taimi tonu lava o le vevela o le aso. Sa matua ofo le aiga, ma sa matua tele le olioliga.”—*Ibid.*

- b. E faapefea ona tali Iesu i so'o se tasi e aioi mo le fesoasoani? Mataio 11:28–30.**

“E le mafai ona vavae ese le Faaola mai i le tagata e pipi'i atu ia te Ia, ma aioi atu mo lona manaoga tele.”—*Ibid.*, p. 198.

“E te manatu ea e faapea, talu ai ona o oe o le tagata agasala e le mafai ona e faamoemoe e te mauaina le faamanuiaga mai i le Atua? Manatua na afio mai Keriso i le lalolagi ina ia lavea'i i tagata agasala. E leai so tatou lelei e ta'u'leleia atu ai i tatou i le Atua; o le aioiga e mafai ona tatou aioiina atu i le taimi lenei ma taimi uma, o lo tatou tulaga matua leai lava so tatou fesoasoani, lea e tatau ai ona tatou maua Lona mana e toe fa'atauina mai ai. O le lafoa'ia o le faalagolago atoa ifo o le tagata ia te ia lava, e mafai ai ona tatou va'avaai atu ia Iesu ma fa'apea ifo:

“ ‘E leai se tau o o'u aumaia; Ua na ona ou pipi'i mau atu ia te Oe.’ ”—*The Ministry of Healing*, p. 65.

FESILI TOE FAAMANATU

1. Aisea e masani ai lava ona le taliaina lelei perofeta i o latou lava nuu?
2. O a upu a le tagata na fa'aalia ai lona le talitonu?
3. O le a le finagalo o Keriso i le le talitonu o tagata?
4. O ai na fa'aalia atu le faatuatua e sili atu i totonu ia Iesu—o tagata Iutaia poo tagata o Nu'u ese?
5. O le a se mea ua folafola mai e Iesu i tagata uma e taliaina Lana valaaulia?

Iesu ma le Tagata o Petesa e Faigata ona Gaioi le Tino

MAU TAULOTO: “Ae ua tali atu Iesu iā i latou, O loo galue pea lo’u Tamā e oo mai i le aso nei, ma o loo galue fo’i A’u” (Ioane 5:17).

Faitauga Fautuaina : *Testimonies for the Church, vol. 1, pp. 560–567.*

“O le galuega a Keriso i le faamaloloina o e mama'i sa loto gatasi lelei lava ma le tulafono. Sa faamamaluina ai le Sapati.”—*The Desire of Ages*, p. 207.

1. O VAI E FA'AMALOLOINA AI

Ulua'i Aso

Mati 9

a. O le a le mafua'aga na o atu ai le tele o tagata tino vaivai i Ierusalema? Ioane 5:2, 3.

b. O le a le talitonuga sa i ai i tagata e faatatau i le vai ta'ele o Petesa? Ioane 5:4.

“I tau faapitoa o le tausaga, o vai o lenei vai ta'ele sa gaepuina, ma sa masani lava ona talitonuina e faapea, o le i'uga lea o malosi fa'ale-atua, ma so'o se tasi lava e muamua o'o i totonu o le vai ina ua mae'a ona gaepuina, o le a faamaloloina mai i soo se fa'ama'i lava sa ia te ia. E selau ma selau tagata mama'i na asiasi atu i lea nofoaga; peitai na matua toatele lava le motu o tagata ina ua gaepu le vai, o lea na latou fa'ataalise atu ai agai i luma, ma soli atu ai i o latou vae tane, fafine, ma tamaiti e sili atu ona vaivai nai lo i latou. E to'atele e le'i mafai ona o'o atu i tafatafa o le vai. O le toatele o i latou na mafai ona o'o atu i ai, na feoti i ona auvai. O fale sa fa'atuina solo i lea nofoaga, ina ia mafai ona puipuia tagata mama'i mai i le vevela i le ao ma le malulu o le po. Sa i ai nisi na momoe ai i le po i nei fa'apaologa, ma tolotolo atu i auvai o le vai mai i lea aso i lea aso, i le faamoemoe le aoga o le fia faamaloloina.”—*The Desire of Ages*, p. 201.

c. Na faapefea ona amata le talanoaga i le va o Iesu ma le tasi tagata i le vaitaele? Ioane 5:5–7.

2. O ITUAIGA ESEESE O TINO MAMA'I UA LE MAFAI ONA FA'AGAI OI

a. O le a le galuega e le mafai ona faia e le tagata na faatonu atu Iesu i le tagata ma'i e le mafai ona gaioid, na te faia—ma o a iuga? Ioane 5:8, 9 (vaega muamua).

“E le o aiod atu Iesu i lenei tagata ma'i ina ia faatino lona faatuatua ia te Ia. E na ona Ia fetalai atu lava, ‘Ina tula'i ia, ave lou moega, ma ia e savali.’ Peita'i o le faatuatua o le tagata sa taofi mau atu i lona upu. O neura ta'itasi ma maso ta'itasi uma na faatumulia i le ola fou, ma o gaioidga maloloina na o'o mai i ona vae ma ona lima pepe. E aunoa ma se fesili na filifili ai lona loto ina ia usita'i i le poloaiga a Keriso, ma o maso uma o lona tino na tali mai i le filifiliga a lona loto. O lona tula'i a'e i ona vae, na ia iloa ai o ia o se tagata malosi.

“E le'i tuuina atu e Iesu ia te ia se mautinoaga o le fesoasoani a le Atua. Sa ono mafai ona faatali le tagata ina ia masalosalo, ma leiloa ese ai lona avanoa e tasi lava o le faamalologa. Peitai sa ia talitonu i le upu a Keriso, ma o lona gaioid i le upu na ia maua ai le malosi.”—*The Desire of Ages*, 202, 203.

b. O le a le tulaga faaleagaga e o'o i ai tagata ua vavae ese mai ia Keriso? Isaia 1:5, 6; Roma 7:24.

“O le agasala ua vavaeeseina ai i tatou mai i le ola o le Atua. O o tatou ola ua mama'i. O lo tatou lava malosi e le sili atu ai ona mafai ona tatou ola i se olaga faapaiaina, nai lo le tulaga e mafai ai e le tagata tino vaivai ona savali. O loo toatele o loo iloaina le leai o so latou fesoasoani, ma o loo latou fa'anaunau mo lona olaga faaleagaga o le a aumaia ai i latou i le loto gatasi ma le Atua; o loo latou taumafai ma le le aoga ina ia latou maua.”—*Ibid.*, p. 203.

c. O le a le fofo e tasi lava mo se tulaga faapea? Galuega 9:34.

“O le Faaola o loo silasila mai ia i latou na faatauina i Lona toto, ma fetalai mai ma le alofa ma le agalelei le mafaamatalaina, ‘E te fia malolo ea?’ Na te fetalai atu ia te oe ina ia e tulai a'e i le ola maloloina ma le filemu. Aua e te faatali se'i e lagona ua faamaloloina oe. Talitonu i Lana upu, ma o le a faataunuina. Tu'u atu le malosi fai filifiliga o lou loto i le itu a Keriso. Filifili e auauna ia te Ia, ma o lou gaioid e faataunuina Lana upu o le a e maua ai le malosi. Tusa lava poo le a le faatinoga leaga, le tu'inanauga sili ona leaga o loo fusifusia ai le agaga ma le tino e ala i le umi ona faamalieina, e mafai e Keriso ma o loo Ia naunau mai e lavea'i. O le a ia foa'i mai le ola i le tagata ua 'oti i soligatulafono.’ Efeso 2:1. O le a Ia fa'asaolotoina le tagata pologa o loo taofia e le vaivai ma faigata ma filifili o le agasala.”—*Ibid.*

3. SAVALI I LE OLAGA FOU

a. E faapefea ona fesoasoani Keriso ia i tatou ina ia tatou manumalo? Efeso 2:1–6.

“O le tagata e naunau faalenatura lava o ia ina ia mulimuli i musumusuga a Satani, ma e le mafai ona ia te'ena fa'amanuiaina le fili mata'utia tele seivagana ua afio Keriso le toa silisili manumalo, i totonu ia te ia, ma ta'ita'ia ai ona mana'oga, ma foa'i atu ia te ia le malosi. . . . E sili atu le iloa o Satani nai lo tagata o le Atua, e faatatau i le mana e mafai ona latou maua e faatoilalo ai ia te ia pe a i ai lo latou malosi i totonu ia Keriso. A latou aioi atu ma le loto maulalo i le Toa malosi mo le fesoasoani, o le tagata e sili ona vaivai i le upu moni, a faalagolago mausali atu ia Keriso, e mafai ona ia tulia manumalo Satani ma ana 'au uma lava.”—*Testimonies for the Church*, vol. 1, p. 341.

“E tatau ona tatou a'oa'o mai ia Keriso. E tatau ona tatou iloa poo ai o Ia ia i latou ua Ia toe faatauina mai. E tatau ona tatou iloa, e ala i le talitonuga ia te Ia, o lo tatou avanoa sili ona taua lo tatou tofusia i le natura o le Atua, ma faapena ona tatou sosola ese ai mai i le amio leaga o loo i le lalolagi e ala i le tuinanau. Ona fufuluina ai lea o i tatou mai i agasala uma, o mea leaga uma o le amio. E le tatau ona tatou faatumauina se uiga agasala e tasi. . . .

“A'o tatou tofusia i le natura o le Atua, ua vavaeeseina loa mai i le amio, uiga o le amio sese na tatou fananau mai ma i tatou ma uiga leaga na fausia a'e e i tatou lava, ma ua faia i tatou o se mana ola mo le lelei. O lo tatou a'oa'o e le aunoa mai i le Faia'oga faaleatua, ma tofusia ai i aso ta'itasi i Lona natura, tatou te galulue faatasi ai ma le Atua i le faatoilaloina o faaososoga a Satani. E galue le Atua, ae galue foi le tagata, ina ia tasi le tagata ma Keriso e faapei ona tasi Keriso ma le Atua. Ona tatou nonofo faatasi ai lea ma Keriso i nofoaga faalelagi. O le mafaufau ua malolo i le filemu ma le mautinoaga i totonu ia Iesu.”—*The Review and Herald*, April 24, 1900.

b. Faamatala le filemu e o'o mai e ala i le malosi mai ia Keriso. . Roma 8:3–6.

“O tamaiti ta'itasi uma e ola i le ola o lona tama. Afai o outou o fanau a le Atua, ua fanau mai e Lona Agaga, ua outou ola i le ola o le Atua. . . . [Ma] o le ola o Iesu ua faaalua 'i o tatou tino augavale' (2 Korinito 4:11). O lona ola i totonu ia te oe o le a fanau mai ai le amio lava lea e tasi ma faaalua ai galuega lava ia e faapei ona faia i totonu ia te Ia. O le a faapena ona e loto gatasi ma poloaiga ta'itasi uma lava o Lana tulafono; aua 'o le tulafono a Ieova e atoatoa ona lelei, e toe faafo'isia ai le agaga.' Salamo 19:7. E ala i le alofa, 'o le amiotonu a le tulafono' o le a 'faataunu'uina i totonu ia i tatou, o e e le o savavali i la le tino, ae i la le Agaga.' Roma 8:4.”—*Thoughts from the Mount of Blessing*, p. 78.

4. O LE ITA O FARESAIO

a. O le le amanaiaina o le faamanuiaga na foa'iina atu i le tagata ma'i, aisea na feita ai le au Faresaio? Ioane 5:9 (vaega mulimuli), 10.

“A'o faataalise atu [le tagata pipili ua toe faamaloloina] i lona ala i laasaga mausali sa'oloto, ma vivii i le Atua ma olioli i lona malosi fou ua maua, na ia fetaia'i ma nisi o le au Faresaio, ma na ia ta'u atu loa ia i latou lona faamalologa. Na ia matua ofo i le uiga faaleano na latou faalogo mai ai i lana tala.

“O muaulu faanunumi na latou fa'alavelave mai ai ia te ia, ma fesili pe aisea ua ia aveina ai lona moega i le Aso Sapati. Na latou faamanatu atu ma le sau ia te ia e faapea, e le'i tusa ma le tulafono le tauaveina o avega i le aso o Ieova. I lona olioli na galo ai i le tagata o le Sapati le aso lea; ae na te le'i lagonaina se lagona o le fa'asalaga mo lona usitai i le faatonuga a Le sa i ai lea ituaiga mana mai i le Atua. Na ia tali atu ma le loto tele, ‘O Le na faamalolo mai ia te a'u, o Ia lava na fetalai mai ia te a'u, Ave lou moega, ma ia e savali.’ Na latou fesili poo ai na faia lenei mea, peita'i na te le'i mafai ona ta'u atu. O nei ta'ita'i na latou iloa lelei lava e na o le To'atasi lava na fa'ailoaina mai na mafai ona Ia faia lenei vavega; peitai na latou mananao i faamaoniga tu'usa'o e iloa ai o Iesu, ina ia mafai ai ona latou fa'asala ia te Ia e faapei o se tagata soli Sapati. I la latou faamasinoga e le'i gata ina Ia talepeina le tulafono i Lona faamaloloina o le tagata ma'i i le Sapati, ae ua Ia faia fo'i le solitulafono o le le migao i Lona faatonu atu ia te ia ina ia ave lona moega.”—*The Desire of Ages*, p. 203, 204.

b. O le a se mea ua fa'aliliuina i ai e tagata Iutaia le Sapati? Mataio 23:4.

“O tagata Iutaia na latou matua fa'aleagaina lava le tulafono o lea ua latou faia ai le tulafono o se amo o le pologa. O o latou manaoga e leai ni uiga na avea ma faatusa i le lotolotoi o isi malo. Na faapitoa lava ona si'omia le Sapati e ituaiga tulafono eseese e leai ni uiga na fa'asaina ai. E le'i avea le Sapati o se fiafiaga ia i latou, o le aso paia o Ieova, ma mamalu. O tusi upu ma faresaio sa latou faia le tausaiaina o le Sapati o se avega mamafatu e le mafai ona tauaveina. O se tagata Iutaia e le'i faatagaina e tutuina se afi po'o se moliga'o foi i le Sapati. O lona iuga, na faalagolago ai le nuu i tagata o nu'u ese mo le tele o sauniga ia sa fa'asa e a latou tulafono ona latou faia mo i latou lava. Latou te le'i manatunatu loloto ma le faautauta faapea, afai na agasala nei gaioiga, o i latou sa fa'afaigaluegaina isi e faatino nei gaioiga, sa tutusa lava lo latou agasala e peiseai na latou faia e i latou lava le galuega. Sa latou manatu o le faaolataga e mo na o tagata Iutaia, ma o olaga o isi tagata uma, lea ua leai se faamoemoe, e le'i mafai ona loloto ifo le fa'aleagaina nai lo le leaga ua i ai. Peitai e le'i tu'uina mai e le Atua se poloaiga e le mafai ona usita'ia e tagata uma. O Ana tulafono e le faatagaina ai se tulafono e leai sona mafuaaga pe faapito fo'i.”—*Ibid.*, p. 204.

5. O LE SAPATI MA LONA SINI

a. Na faapefea ona fesoota'i atu Iesu i le tulafono a le Atua ma le Sapati fo'i? Isaia 42:21.

“Na afio mai Iesu e 'si'itia le tulafono, ma ia faamamaluina.’ E le'i afio mai e faaitiitia lona mamalu, ae ia siitia fa'asilisiliina. . . . Na Ia afio mai e faasa'oloto le Sapati mai i na manaoga mamafatu lea ua faia ai le Sapati ma malaia ae ua le o se faamanuiaga.”—*The Desire of Ages*, p. 206.

b. O a mea e tatau ona fai, ma mea e le tatau ona faia i le Sapati? Esoto 20:8–11.

“I le lotolotoi o tagata puapuagatia i le vaitaele, na filifilia ai e [Keriso] le ma'i sili ona leaga e faatino i ai Lona mana fa'amalolo, ma faatonu atu i le tagata ina ia ave atu lona moega i totonu o le aai ina ia fa'asilasila aloaia atu ai le galuega tele ua galuea'iina ia te ia. O lenei tulaga o le a fa'atuina mai ai le fesili e faatatau i mea na fa'ataga ona faia i le Sapati, ma o le a tatalaina ai le ala mo Ia Na te fa'aleaogaina ai tulafono a tagata Iutaia e faatatau i le aso o le Alii, ma fa'ailoa atu ai le le aoga o a latou aganuu.

“Na fa'ailoa atu e Iesu ia i latou o le galuega o le fa'amaloloina o tagata mama'i sa loto gatasi ma tulafono o le Sapati. Sa loto gatasi ma le galuega a agelu a le Atua, o e o loo o ifo ma a'ea'e i le va o le lagi ma le lalolagi e auuuna i le aiga tagata puapuagatia. . . .

“Ma e i ai foi le galuega a le tagata e faatino i lenei aso. O mea e aoga mo le ola e tatau ona faia, o tagata mama'i e tatau ona tausia, o manaoga o e mafatia e tatau ona foa'iina i ai. O le a le fa'asaoina lava le tagata e faatalale i le fesoasoani i mafatiaga i le Sapati. O le aso paia malolo o le Atua na faia mo le tagata, ma o gaioiga o le alofa e matua loto gatasi lava ma le mafuaaga na faia ai. E le finagalo le Atua i Ana meaola uma na faia ina ia puapuagatia i le tiga i se itula e tasi lea e mafai ona fesoasoani i ai i le Sapati poo so'o se isi fo'i aso.”—*Ibid.*, pp. 206, 207.

FESILI TOE FAAMANATU

- 1. O le a le talitonuga sa ta'atele e faatatau i le vaita'ele o Petesa?**
- 2. O le a le ma'i faapitoa na tosina i ai le finagalo o Keriso?**
- 3. E faapefea ona mafai ona faamaloloina lo tatou vaivai faaleagaga?**
- 4. O le a se mea na matua feita tele ai tagata Iutaia e faatatau i le faamalologa faavavega?**
- 5. O a galuega e loto gatasi ma le poloaiga o le Sapati?**

O Le Pule a le Alo

MAU TAULOTO: “Aua e faapei o le Tamā e i totonu ia te ia lava le ola; ua faapea foi ona Ia foai atu i le Atalii ina ia i totonu ia te ia lava le ola; Ua Ia foai mai foi ia te ia le pule, ina ia faia e ia le faamasinoga, auā o ia o le Atalii o le tagata” (Ioane 5:26, 27).

Faitauga Fautuaina : *Thoughts from the Mount of Blessing*, pp. 123–129.

Na fetalai mai [Iesu], “O la'u pule, mo le faia o le galuega ua outou tu'ua'iina ai A'u, ona o A'u o le Alo o le Atua, e tasi ma Ia i le natura, i le loto, ma le sini. I Ana galuega uma lava o le foafoaga ma Lana tausiga, Ou te galue faatasi ai lava ma le Atua.”—*The Desire of Ages*, p. 208.

1. E TUTUSA MA LE ATUA

Ulua'i Aso

Mati 16

a. E ese mai i le faamalologa o le tagata ua pe le tino, i le Sapati, o le a le isi mafuaaga na feita ai tagata Iutaia ia Iesu? Ioane 5:17, 18.

“Na fai mai Iesu e tutusa a La aia ma le Atua. . . .

“O le malo atoa lava o tagata Iutaia na latou fa'aigoaina le Atua o lo latou Tama, o lea na semanu latou te le feita tele ai faapea, pe ana faapea e faatusalia mai e Keriso Ia lava, o loo tulai i le so'otaga lava lea e tasi ma le Atua. Peitai na latou tu'ua'iina o Ia i le upu leaga, ma faailoa mai ai sa latou malamalama ia te Ia i Lona faia o lenei faaupuga i lona uiga silisili lava.”—*The Desire of Ages*, pp. 207, 208.

b. Na faapefea ona ta'uamionuina e Keriso le pule a poloaiga a le Atua e sili a'e nai lo aganu'u faaletagata? Mataio 15:1–9, 13.

“O nei fili o Keriso e le'i i ai ni a latou finauga e fa'amalieina ai upu moni na Ia tu'uina mai i o latou mafaufau. Sa na ona mafai lava ona latou aumaia a latou aganuu ma tu ma aga masani, ma o nei aganuu na foliga mai na vaivai ma le aoga pe a faatusatusa atu i finauga na aumaia e Iesu mai i le upu a le Atua ma le taamilosaga le mafaamutalia a le natura.”—*Ibid.*, p. 208.

2. TASI MA LE TAMA

- a. **Na faapefea ona faamatalaina e Iesu Lana so'otaga ma le Tama? Ioane 5:19, 20.**
- b. **O le a le pule ma le mana e patino i le Tama na faailoa mai e Keriso sa ia te Ia fo'i? Ioane 5:21–23.**

“O faitaulaga ma ta'ita'i na latou siitia a'e i latou o ni faamasino e faitioina le galuega a Keriso, peitai na Ia faailoa atu o Ia o lo latou faamasino, ma o le faamasino fo'i o le lalolagi atoa. O le lalolagi ua tu'uina atu ia Keriso, ma ua o'o mai faamanuiaga ta'itasi uma lava mai i le Atua e ala mai ia te Ia i le aiga tagata pa'u. O Ia o le Fa'aola a'o le'i fanau mai i le tino e faapei lava ona avea o Ia ma Faaola ina ua mavae Lona fanau mai i le tino. O le taimi lava na i ai le agasala, sa i ai foi ma le Faaola. Ua Ia foai mai le malamalama ma le ola i tagata uma, ma e tusa ai ma le tele o le malamalama ua foa'iina mai, e faapena fo'i ona faamasinoina ai tagata ta'itasi uma. Ma o Le ua foa'iina mai le malamalama, o Le ua mulimuli i le tagata ma olega sili ona agalelei, ma saili ina ia manumaloina mai i le agasala aga'i atu i le faapaiaina, o Ia lava lea e to'atasi o le fautua ma le faamasino o le tagata.”—*The Desire of Ages*, p. 210.

- c. **Fa'amatala le suiga i uiga e tutupu mai a'o tatou iloina o Keriso o Ia o lo tatou faamasino. Roma 2:1–3; Mataio 7:1.**

“O le na te tu'inanau i le faamalieina o se uiga faitio, faamasino, ma sa'ili'ili masei i isi, o loo agasala o ia i le agasala e sili atu ona tele nai lo le tagata lea o loo ia tu'ua'iina, aua e le gata ina ia faia lea lava agasala e tasi, peita'i na te faaopoopo fo'i i ai le fa'amauualuga tele lava ma le so'ona faitio, faamasino ma su'esu'e masei.

“O Keriso e na o Ia lava le tapula'a moni o le amio, ma o le tagata na te faatuina a'e o ia e fai ma tapula'a mo isi, o loo ia tu'uina o ia i le tulaga o Keriso. Ma, talu ai ona ua 'uma ona tu'uina atu e le Tama le faamasinoga uma i le Alo' (Ioane 5:22), so'o se tasi lava e le fefe e faamasino mafuaaga o gaoiga a isi, o loo ia ave faamalosia le aia a le Alo o le Atua. O nei tagata-fia-fa'amasino, faitio, o loo latou tu'uina i latou i le itu a le anetikeriso, 'o le e tete'e atu ma faamauualugaina o ia e ia e sili nai lo mea uma e ta'u-atuaina, poo mea uma fo'i e ifo i ai; o lea ua nofo ai o ia e faapei o le Atua i totonu o le malumalu o le Atua, ma fa'aailoa mai o ia lava o le Atua.’ 2 Tesalonia 2:4.”—*Thoughts from the Mount of Blessing*, pp. 125, 126.

“E le mafai ona tatou faituina le loto. O i tatou lava e sese, tatou te le agavaa i lo tatou faamasino i isi. O tagata e muta lo latou ola, e na o le va'aiga i fafo e mafai ona latou faamasinoina. E na o Ia lava Na te silafia vaipuna lilo o gaoiga, ma Na te a'oa'i ma le alofa ma le mutimutivale, ua tuuina atu i ai Na te filifilia le iuga o tagata ta'itasi uma.”—*Ibid.*, p. 124.

3. O LE MAUTINOAGA SILI ONA TAU

a. O le a le mautinoaga ua tuuina atu i tagata talitonu naunau ta'itasi uma i totonu ia Keriso? Ioane 5:24.

“I faatonuga ta'itasi uma ma folafolaga ta'itasi uma a le upu a le Atua, o loo i ai le mana, o le ola tonu lava o le Atua, lea e mafai ona faataunuaina ai le faatonuga ma le folafolaga. O le na te talia le upu e ala i le faatuatua o loo ia taliaina le ola tonu lava ma le amio a le Atua.”—*Christ's Object Lessons*, p. 38.

“O le galuega tele ua faia mo le tagata agasala ua pona ma faaleagaina e le agasala, o le galuega lea o le ta'uamiotonuina. Ua ta'uamiotonuina o ia e Le na te fetalaia maia le upu moni. E foa'i mai e le Alii i le tagata talitonu le amiotonu a Keriso ma ta'uamiotonuina o ia i luma o le iunivesa. Na te tauaveina atu ana agasala ia Iesu, le sui o le tagata agasala, puluvaga ma lona mautinoaga. Na te tu'uina i luga o Keriso le amio leaga a tagata ta'itasi uma lava e talitonu. ‘Ua Ia faia o Ia ma agasala mo i tatou, o Le na le'i iloa le agasala; ina ia faia i tatou ma amiotonu a le Atua i totonu ia te Ia’ (2 Korinito 5:21). . . .

“E ui lava ina tatou i lalo o le faasalaga a le tulafono i le aveva o i tatou ma tagata agasala, peitai o Keriso i Lona usitai i le tulafono, ua Ia maua ai le amio faapaiaina o Lana lava amiotonu. O le auala e maua ai le amiotonu a Keriso, e tatau i le tagata ona ia iloa poo le a lena salamo lea e galuea'iina ai se suiga loloto o le mafaufau ma le agaga ma gaiioiga. O le galuega o le liuaga e tatau ona amata i le loto, ma faaalua ai lona mana e ala i tomai ta'itasi o le tagata ola; peitai e le mafai e le tagata ona ia amatalia e ia lava se salamo fa'apenei, ma e faato'a mafai lava ona ia iloaina e ala atu ia Keriso, o Le na afio a'e i luga, ma ta'ita'i faatagata o taua, ma foa'i meaalofa i tagata.”—*Selected Messages*, bk. 1, pp. 392, 393.

b. O a aia fa'apitoa ia sa fa'aalia e Keriso sa ia te Ia? Ioane 5:25–29.

“Talu ai ona sa Ia tofo i toega o le ipu o puapuaga ma faaosoosoga faaletagata, ma malamalama ai i vaivaiga ma agasala a tagata; talu ai ona sa Ia te'ena ma le manumalo mo i tatou, fa'aosoosoga a Satani, ma o le a Ia a'oa'i ma le amiotonu ma le alofa i tagata na faamaligiina Lona lava toto ina ia lavea'i—talu ai ona o lenei, o lea ua filifilia ai le Atalii o le tagata Na te faia le faamasinoga.”—*The Desire of Ages*, p. 210.

“O Keriso ua tu'uina atu i ai le mana e foa'i mai ai le ola i mea ola uma na foafoaina.”—*Selected Messages*, bk. 1, p. 249.

4. IESU, LE AUTU O LE TUSI PAIA

a. Na faapefea ona faamatala e Iesu le mafuaaga o le le talitonu o tagata Iutaia? Ioane 5:37, 38.

“E aunoa ma Lona faatoese mo le gaioiga na latou faitio i ai, poo le faamatalaina foi o Lana sini i Lona faia faapea, na liliu atu Iesu i ta'ita'i, ona avea ai lea o Le na faitioina, ua avea ma Le ua faitio atu. Na Ia a'oa'iina i latou ona o le ma'a'a o o latou loto, ma lo latou le iloaina o upu o le Tusi Paia. Na Ia faailoa atu sa latou te'ena le upu a le Atua, ona o lo latou te'ena o Le na auina mai e le Atua.”—*The Desire of Ages*, p. 211.

b. Aisea na le malamalama ai tagata Iutaia i le Tusi Paia? Ioane 5:39, 40.

“I laupepa ta'itasi uma lava, pe o le talaaga, poo poloaiga, poo le valoaga fo'i, o Tusi o le Feagaiga Tuai ua faamalamalamaina i le pupula o le Alo o le Atua. Talu ai ona o le Tusi o le Tusi Paia na fa'amausaliina e le Atua, o le faatulagaga atoa lava o le tapuaiga faa-Iutaia o se valoaga tu'ufa'atasia lea o le tala lelei. O Keriso 'o loo molimau i ai perofeta uma lava.' Galuega 10:43. Amata mai lava i le folafolaga na tu'uina atu ia Atamu, e aga'i mai i lalo i le fa'asologa o le au pateriaka ma le tamaoaiga faaletulafono, na faamanino mai e le malamalama o le lagi la'asaga o le Fa'aola. O tagata va'ai na latou va'aia le Fetu o Peteleema, o Sailo o le a maliu mai, a'o pasi faataalise ane mea tutupu o le lumana'i i o latou luma i fa'asologa uiga lilo. O manu ta'itasi uma lava na fasia sa faailoa mai ai lava le maliu o Keriso. I asu ta'itasi uma lava o mea manogi na alu a'e ai fo'i i luga Lana amiotonu. O leo o pu o iupeli ta'itasi uma lava na fa'ailoa mai ai Lona suafa. O le mea lilo mata'utia o le nofoaga sili ona paia na afio ai iina Lona pupula.

“O tagata Iutaia sa i ai ia i latou le Tusi Paia, ma sa latou manatu e faapea, o lo latou iloa i le vaaiga i fafo e faatatau i le upu na latou maua ai le ola e faavavau. Peitai na fetalai atu Iesu, ‘E le o nofo Lana upu i totonu ia te outou.’ O lo latou te'ena o Keriso i Lana upu, na latou te'ena moni ai fo'i o Ia. Na Ia fetalai mai, ‘Tou te le fia o mai ia te A'u ina ia outou maua ai le ola.’

“O ta'ita'i Iutaia na latou su'esu'eina a'oa'oga a perofeta e faatatau i le malo o le Mesia; peita'i latou te le'i faia lenei tulaga ma se faanaunauga moni ina ia latou iloa le upu moni, ae na latou faia ma le sini o le mauaina o faamaoniga ina ia lagolago ai o latou faamoemoega fa'asausili. Ina ua afio mai Keriso i se uiga na matua fete'ena'i lava ma o latou mana'oga, latou te le'i manana'o e talia o Ia; ma o le auala e ta'uamiotonuina ai i latou, na latou taumafai ina ia faamaonia o Ia o se tagata taufa'asese. Ina ua latou faamausaliina o latou vae i lenei ala, na faigofie mo Satani lona fa'amalosia o lo latou tete'e ia Keriso. O upu tonu lava ia sa tatau ona talia o ni faamaoniga o Lona natura Atua, na faauigaina ina ia tete'e ai ia te Ia. Na faapena ona latou liliuina le Upu Moni a le Atua i se pepelo.”—*Ibid.*, pp. 211, 212.

5. O LE MAMALU O LE ATUA

a. O le a se mea na ta'ita'ia ai tagata Iutaia ina ia latou te'ena Iesu ma latou saili ai mo faia'oga sese? Ioane 5:41–44.

“Na fetalai atu Iesu, ‘Ou te le mana'o i le viiga mai i tagata.’ E le o le a'afiaga o le fono a Iutaia, e le o la latou fa'atagaga lea na Ia fa'anaunau i ai. Na le'i mafai ona Ia maua se mamalu mai i la latou viiga. Na tu'uina atu ia te Ia le mamalu ma le pule a le Lagi. Ana faapea Na te mana'o i ai, semanu e o mai agelu e ifo mai ia te Ia; semanu e toe molimau mai le Tama e fa'atatau i Lona natura Atua. Peitai, mo i latou lava, ma le malo o loo avea ai i latou ma ta'ita'i, na Ia finagalo i ta'ita'i Iutaia ina ia latou iloa Lana amio, ma ia latou maua fa'amanuiaga na Ia afio mai e foa'i ia i latou.

“ ‘Ua Ou sau i le igoa o Lo'u Tama, ma ua outou le talia A'u: afai o le a sau se isi i lona lava igoa, o le a outou talia o ia.’ O Iesu na Ia afio mai i le pule a le Atua, ma tauaveina Lona faatusa, fa'ataunu'uina ai Lana upu, ma saili mo Lona viiga; peita'i e le'i talia o ia e ta'ita'i i Isaraelu; ae a o mai isi tagata, ma faafoliga mai i le amio a Keriso, ae e faagaioia i latou e o latou lava loto ma saili mo lo latou lava mamalu, o le a latou taliaina. Ma aisea? Aua o le tagata o loo saili mo lona lava mamalu, e fa'atosina atu i le faanaunauga mo le uiga fa'afefeteina e le tagata o ia lava, i totonu o isi. O olega faapea na mafai ona tali mai i ai tagata Iutaia. Na latou manana'o e talia le faia'oga sese aua na ia fa'avi'ivi'iina lo latou fa'alialiavale faamaualuga e ala i lona fa'atagaina aloa'ia o o latou manatu ma aganu'u fa'apelepeleina. Peitai o a'oa'oga a Keriso e le'i fetau ma o latou manatu. O a'oa'oga a Keriso sa fa'aleagaga, ma na mana'omia ai le fa'asatauroina e le tagata o ia lava; o le mafuaaga lea na latou le manana'o ai e taliaina. Latou te le'i masani ma le Atua, ma, ia i latou, o Lona siufofoga e ala mai ia Keriso o le leo lea o le tagata ese.

“E le o le mea ea lea e tasi o loo toe faia i o tatou taimi? E le o to'atele ea, e o'o lava i ta'ita'i fa'aletapua'iga, o loo fa'ama'a'aina o latou loto i le Agaga Paia, ma le mafai ai e i latou ona iloa le siufofoga o le Atua? Latou te le o te'ena ea le upu a le Atua, ina ia mafai ai ona latou tausia a latou lava aganu'u?”—*The Desire of Ages*, pp. 212, 213.

FESILI TOE FAAMANATU

1. O le a le pule ma aia na fa'ailoa mai e Keriso?
2. O le a le sootaga sa i ai i taimi uma lava i le va o Iesu ma le Tama?
3. O le a le mana-e maua ai le ola, o loo ia Keriso?
4. Fa'amatala le Ioane 5:39.
5. Faamatala le i'uga o le te'ena o Iesu e le malo o Iutaia, e fa'apea o Ia o le Mesia.

Ua Fafaga e Iesu le Motu o Tagata

MAU TAULOTO: “Peitai na fetalai atu Iesu ia i latou, e le aoga ona latou o; ia outou avane ni a latou meaai” (Mataio 14:16).

Faitauga Fautuaina : *Testimonies for the Church, vol. 6, pp. 341–348.*

“O le tele lava o taimi tatou te le mautonu ai, ma tatou le naunau ai e foa'i atu mea uma lava o loo ia i tatou, ma tatou matata'u ai e fa'aalu a tatou oa ma foa'i atu i tatou mo isi. Peitai ua faatonu mai Iesu ia i tatou, ‘Foa'i atu ia i latou ni meaai.’ O Lana faatonuga o se folafolaga lea; ma o tua o le folafolaga lea o loo i ai le mana lava lea e tasi na fafagaina le motu o tagata i tafatafa o le sami.”—*The Desire of Ages*, p. 369. [Author’s emphasis.]

1. TAGATA FIA A'AI

Ulua'i Aso

Mati 23

a. E ese mai i le au so'o, o ai isi na fa'atasi ma Iesu ina ua Ia afio a'e i le sami o Kalilaia a'o le'i faia le Paseka? Ioane 6:1, 2.

“O Keriso sa Ia afio ese atu i se nofoaga tu'ufua faatasi ma Ona so'o, peitai o lenei taimi e seasea maua, o le filemu ta'aligoligoa, e le'i umi ae talepeina loa. Na manatu le au so'o na latou o ese atu i se nofoaga o le a le fa'alavelaveina ai i latou; peitai o le taimi lava na misia ai e le motu o tagata le Faia'oga fa'ale-atua, na latou fesili ai faapea, ‘O fea o i ai o ia?’ O nisi i le lotolotoi o i latou na latou iloa le itu na o atu aga'i i ai Keriso ma Ona so'o. E to'atele na savavali ina ia fetaia'i ma i latou, a'o isi na mulimuli i o latou va'a i luga o le vai. O le Paseka na lata mai, ma, mai i nofoaga mamao ma nofoaga lata mai, o fa'apotopotoga o tagata malaga na faimalaga atu i Ierusalem sa latou faapotopoto e va'ai ia Iesu. Sa fa'aopoopo atu tagata i lo latou fuainumera, se'ia o'o ina fa'apotopoto tane e lima afe e ese mai i fafine ma tamaiti. A'o le'i taunu'u atu Keriso i le matafaga, o se motu tele o tagata sa fa'atali mai mo Ia. Peita'i na ia taunu'u atu ma le le iloa e i latou, ma sa latou o ese mai ma mafuta faatasi ma le au so'o mo sina taimi itiiti.”—*The Desire of Ages*, p. 364.

b. Faamatala le tulaga faaleagaga o tagata sa faapotopoto. Mareko 6:34.

2. FA'AILOAINA O LO TATOU NAUNAU I O TATOU MANA'OGA

a. O le a se mea na silafia ma le alofa e Iesu sa manaomia e tagata—ma na faapefea ona Ia faaogaina lenei avanoa e tofotofo ai le faatuatua o Lona so'o o Filipino? Ioane 6:3–6.

“Na silasila atu [Iesu] mai i le itu o le mauga i luga o le motu o tagata o loo feoa'i, ma o Lona loto na mutimutivale i le alofa. O le fa'alavelaveina faapena o Ia, ma ua le maua ai Sana malologa, e le'i le onosa'i o Ia. Na Ia silafia se manaoga e sili atu e manaomia ai Lana fesoasoani a'o Ia vaavaai atu i tagata o o mai ma o mai pea. 'Na osofia o Ia i le alofa mutimutivale ia i latou, aua sa latou fa'apei o mamoe ua leai so latou leoleo mamoe.' O Lona tu'ua o le nofoaga o Lana malologa, na Ia maua ai se nofoaga fetui lelei na mafai ona Ia auaua ai ia i latou. Latou te le'i maua se fesoasoani mai i faitaulaga ma ta'ita'i; peita'i o vai o le ola e faamaloloina ai, na tafe mai ia Keriso a'o Ia a'oa'oina atu le ala o le faaolataga i le motu o tagata. . . .

“O lea aso na foliga mai ia i latou e faapei o le lagi i luga o le fogaeleele, ma sa latou matua le iloa lava le umi talu ona latou aina se meaai.

“A'o aga'i pea i luma le taimi, ua leva le aso. O le la na goto ifo i sisifo, a'o tagata sa nonofo pea. Na galue Iesu i le aso atoa lava e aunoa ma meaai poo se malolo foi. Na sesega o Ia i le vaivai ma le fia 'ai, ma sa fa'atauanau atu le au so'o ia te Ia ina ia malolo mai i Lana galuega mamafa. Peitai e le'i mafai ona maliu ese mai nai le motu o tagata na lolofi mai ia te Ia. . . .

“O Le na a'oa'oina tagata i le auala e faamausaliina ai le filemu ma le fiafia na Ia manatunatu foi i o latou manaoga fa'aletumau e faapei ona Ia manatunatu i o latou manaoga fa'aleagaga. Sa i ai tina ma pepe i o latou lima, ma tamaiti laiti sa pipi'i atu i o latou laulavalava. E toatele sa tutula'i mo le tele o itula. . . .

“E toatele sa o mai mai i nofoaga mamao, ma e le'i aai talu mai le taeao. I taulaga ma nu'u na si'omia mai sa ono mafai ona latou faatauina ai meaai. . . . Peitai na fetalai mai Iesu, ‘Avatu ia i latou ni meaai latou te aai ai,’ ona Ia liliu atu lea ia Filipino ma fesili atu, ‘O fea o le a tatou faatau ai areto, ina ia aai ai i latou nei?’ O lenei fetalaiga na fuafuaina ina ia tofotofo ai le faatuatua o le so'o.”—*The Desire of Ages*, p. 364, 365.

b. O le a le tali a Filipino? Ioane 6:7.

“Na vaavaai a'e Filipino i le tele o ulu o tagata, ma ia manatu ai e faapea, o le a matua le mafai lava ona maua meaai e faamalie ai manaoga o se motu toatele faapea o tagata. Na Ia tali mai, o falaoa e faatauina i tenari e lua selau, o le a matua le lava lava e vaevae mo i latou, ina ia tofua le tagata ma sina mea itiiti.”—*Ibid.*

3. O LE MEA LAVA NA MAUA

a. O le a le faamatalaga na tuuina atu e Anetere'a ia Iesu—o le a la le faatonuga a Iesu i Ona so'o ia latou faia? Ioane 6:8–10.

“Na fesili atu Iesu poo le a le tele o meaai na mafai ona maua i le lotolotoi o le faapotopotoga o tagata. Na fai mai Aneterea, ‘O loo iinei le tama o loo ia te ia areto karite e lima, ma nai i’a iti e lua; ae aumā ea ia mea ia i latou e toatele?’ Na faatonu atu Iesu ina ia aumaia ia te Ia. Ona Ia faatonu atu lea o le au so'o ina ia fa'anonofa tagata i luga o le mutia i vaega ta'i lima sefulu pe ta'i selau, ina ia fa'atumauiina ai le fa'atulaga lelei, ma ia molimauina ai e tagata uma le mea o le a Ia faia.”—*The Desire of Ages*, p. 365.

b. Fa'amatala la'asaga na faia e Keriso i le fa'ateleina o meaai—ma o a lesona e mafai ona tatou a'oa'oina mai i nei la'asaga. Mataio 14:19; Mareko 6:37–41; Ioane 6:11.

“E le'i sa'ili Iesu ina ia fa'atosina mai tagata ia te Ia e ala i le so'ona fa'amalieina o le faanaunauga mo mea taugata. I lena motu tele o tagata, vaivai ma fia aai ina ua mavae le aso umi, ma fiafia, o le meaai faigofie o se mautinoaga lea o Lona mana ma Lana tausiga alofa mo i latou i manaoga masani o le olaga. O le Faaola na te le'i folafolaina atu i Ona so'o le olaga taugata so'ona fai ma mea taugata o le lalolagi; o lo latou olaga atonu e si'omia e le mativa ma le le tagolima; peitai o Lana upu ua ta'utino mai o o latou manaoga o le a foa'iina mai, ma ua Ia folafolaina mai le oa e sili atu nai lo le lelei faalelalolagi—o le faamafanafanaga tumau lea a Lona lava Agaga Paia.”—*The Ministry of Healing*, pp. 47, 48.

“I lenei vavega, na maua e Keriso mai i le Tama; ona Ia avatu lea i le au so'o, ona avatu lea e le au so'o i tagata, ona avatu ai lea e tagata, e le tasi i le tasi. O le a faapena ona maua e i latou uma lava ua fa'atasi atu ia Keriso, le areto o le ola mai ia te Ia, ma fa'asoa atu i isi. O Ona so'o o auala filifilia ia o talanoaga i le va o Keriso ma tagata.”—*Ibid.*, p. 49.

c. O le a le lesona e faatatau i le auaunaga moni ua faamanatu mai ia i tatou iinei? Isaia 61:6.

“O le au so'o na latou aumaia ia Iesu mea uma lava sa ia i latou; peitai Na te le'i valaauliaina i latou e o mai e aai. Na Ia faatonu atu ia i latou ina ia auauna i tagata. O meaai ia sa fa'ateleina i Ona aao, ma lima o le au so'o, o le aioi atu ia Keriso, e le'i i ai lava se taimi na le fa'amalieina ai. O le meaai itiiti sa lava lelei mo tagata uma. Ina ua fafagaina le motu o tagata, ona aai ai lea o le au so'o faatasi ma Keriso i le meaai taua na foa'i mai e le lagi.”—*Ibid.*

4. O LE MATAGOFIE O LE FA'ASOA ATU

a. O le a se mea e tatau ona tatou a'oa'oina mai i le faatonuga taua na tuuina mai e Iesu ina ua mavae ona fafagaina le motu o tagata? Ioane 6:12, 13.

“Ina ua fa'aputuina ato o meaai na totoe, o tagata na latou manatunatu e faatatau i a latou uo i o latou aiga. Na latou manana'o ia i latou ina ia latou tofusua i le areto na faamanuiaina e Keriso. O meaai sa i totonu o ato sa tufatufaina i le lotolotoi o le motu o tagata naunau ma aveina atu i vaega fa'ata'amilo o lea atunuu.”—*The Desire of Ages*, 368.

“Na faatonu atu Iesu i Ona so'o, 'Ia faapotopoto mai toe'aiga o loo totoe, ina ia aua ne'i i ai se mea e ma'imau.' Ioane 6:12. O nei upu na sili atu le taua nai lo le na o le tu'uina o meaai i totonu o ato. O le lesona e lua ona vaega. Aua ne'i i ai se mea e ma'imau. Aua ne'i tatou fa'ama'imauina avanoa i le olaga lenei. E le tatau ona tatou fa'atalale i soo se mea lava o le a faamanuiaina ai se tagata. Ia aoao ma fa'apotopoto a'e mea uma lava o le a fesoasoani ai i manaoga o tagata fia aai o le lalolagi. O le fa'aeteete lava lea e tasi e tatau ai ona tatou teufatuina le areto mai i le lagi ina ia faamalie ai manaoga o le agaga. E tatau ona tatou ola i upu ta'itasi uma lava a le Atua. E le tatau ona leiloa ese atu se mea lava e tasi ua fetalai mai e le Atua. E le tatau ona tatou fa'atalale i se upu e tasi e mo lo tatou fa'aolataga e faavavau. Aua ne'i i ai se upu e tasi e pa'u le aoga i le eleele.”—*The Ministry of Healing*, p. 48.

b. Tusa lava pe foliga mai e le fetau pe e le mafai fo'i ona faia, o le a le uiga faakerisiano ua faatonuina i tatou ina ia fausia a'e? Isaia 58:6–8; 1 Peteru 4:9.

“I mea uma lava e tutupu fa'afuase'i e tatau ai lava ona tatou sailia le fesoasoani mai ia te Ia, o Le o loo i ai oa le mafa'amutalia i Lana faatonuga. . . .

“A'o tatou vaaia manaoga o tagata matitiva, o tagata le malamalama, o e puapuagatia, e matua tele lava taimi e faavaivai ai o tatou loto. Tatou te fesili faapea, 'E fa'apefea ona lava lo tatou vaivai ma a tatou meatotino itiiti e faamalieina ai lea manaoga tele manaomia vave? O le a tatou le faatali ea mo se tasi e sili atu lona malosia na te fa'atonuina le galuega, poo se isi fo'i fa'alapotopotoga na te faia le galuega?' Ua fetalai mai Keriso, 'Ia foa'i atu ia i latou meaai e aai ai.' Fa'aaoga oa, ma le taimi, ma le malosia ua ia te oe. Aumai au areto karite ia Iesu.

“E ui lava ina atonu e le lava au meaai e fafaga ai le to'a afe o tagata, ae atonu e lava lelei e fafaga ai le tagata e to'atasi. Peita'i, i le aao o Keriso e mafai ona fafagaina ai tagata e to'atele. E faapei o le au so'o, foa'i atu mea ua ia te oe. O Keriso o le a Ia fa'atuputeleina le meaalofa. O le a Ia tauia le faalagolago faamaoni, faigofie atu i luga ia te Ia. O le meaai na foliga mai o se meaai faatauva'a, o le a faamaonia o se taumafataga tamaoaiga.”—*Ibid.*, pp. 49, 50. [Author's emphasis.]

5. O LO TATOU ATUA-FOAFOA O LE NA TE FOA'I MAI

a. O le a le uiga matagofie o le Atua e le tatau lava ona tatou fa'agaloina? Salamo 37:25, 26; Filipi 4:19.

“O le alofa tunoa o le Atua i mea iti lea e fa'alava atoatoa ai. E mafai e le aao o le Atua ona fa'atuputeleina fa'aselau. Mai i Ana oa uma e mafai ai ona Ia fofolaina se laulau i le vao. O le pa'i a Lona aao e mafai ai ona Ia fa'atuputeleina le meaai itiiti ma fa'alava atoatoa ai mo tagata uma. O Lona mana lea sa fa'ateleina ai areto ma saga i lima o le atalii o perofeta. . . .

“Ina ua faatonu atu Iesu i Ona so'o ina ia foa'i atu i le motu o tagata latou te aai ai, na latou tali mai, ‘E leai se isi a tatou meaai ae ua na o areto e lima ma i'a e lua; se'iloga tatou te o e faatau mai meaai mo nei tagata uma.’ Luka 9:13. Ae aumā ea ia mea ia i latou e toatele?

“O le lesona e mo le fanau a le Atua i augatupulaga ta'itasi uma. A tu'uina mai e le Alii se galuega e tatau ona faia, aua ne'i fa'atali tane ina ia fesili i le ta'uamionuina o le faatonuga poo le iuga fo'i o le a i ai, o a latou taumafaiga ina ia usitai. O mea ua i o latou lima atonu e matua itiiti ifo nai lo le manaoga e tatau ona faamalieina; peitai i aao o Ieova o le a faamaonia e sili atu nai lo le matua lava lelei. . . .

“O se iloaina sili atu ona atoatoa o le so'otaga a le Atua ia i latou ua Ia faatauina i le meaalofo o Lona Alo, o se faatuatua sili atu ona tele i le agai i luma o Lana galuega i le laueleele—o le manaoga tele lenei o le ekalesia i le taimi lenei. Aua lava ne'i fa'ama'imauiina e se tasi le taimi i lona matua le fiafia ma faanoanoa ona o le le lava ma le leai o ni a latou meatotino va'aia. O le va'aiga i fafo atonu e foliga mai e le manuia, peitai o le malosi ma le talitonu faatuatua i le Atua o le a foafoaina ai mea e manaomia. O le meaalofo e aumaia ia te Ia ma le faafetai ma le tatalo mo Lana faamanuiaga, o le a Ia faateleina e faapei ona Ia faateleina meaai na foa'iina atu i atalii o perofeta ma le motu e toatele o tagata vaivai.”—*Prophets and Kings*, pp. 241–243.

FESILI TOE FAAMANATU

1. Fa'amatala uiga o tagata i lo latou faalogo atu i upu a Keriso.
2. Na faapefea ona foa'i e le Alii a latou meaai faaletino?
3. O le a se mea tatou te a'oa'oina mai i le auala na faatulaga lelei ai e Keriso le motu o tagata?
4. O le a se mea e tatau ona ou manatua i so'o se taimi lava e fa'atonuina pe fautuaina ai fo'i a'u, “Ia outou avatu ia i latou meaai latou te 'aai ai”?
5. Ta'u mai taimi na matua iloga ai lava le foa'i a le Atua mo oe.

Fa'ava'a i tua

Lesona Sapati Muamua

Sapati, Ianuari 4

Nofoaga Autu o Auaunaga Esee mo le Soifua Maloloina ma A'oga i Paraguay

O la outou foa'i alofa o le a toe fa'afo'isia ai le ola maloloina ma le faatuatua o le toatele (see p. 3).

Sapati, Fepuari 1, 2025

Fesoasoani mo Fa'alavelave Tutupu i le Lalolagi

O lenei taulaga e fesoasoani ai i tagata ta'itasi i nofoaga ua a'afia i fa'alavelave tutupu, fa'ama'i, oti, poo tulaga faigata (see p. 24).

Sapati, Mati 1, 2025

Nofoaga Autu mo A'oga a "Fanau o Amioga Lelei"

Fesoasoani e fa'a'uma ai le fausiaina o se fale fou mo A'oga Fa'ata'ita'i mo fanau laiti i Romania (see p. 45).